

## ORE I MEXŮ GA CUÁŮ ŮMATŮXŮ

### *Tupana Nane rü duŷxŷãcü nangox*

<sup>1</sup> Naxŷpa ga guxŷma, rü marü nayexma ga Tupana Nane. Rü Tupanamaã nayexma rü woetama Tupana nixĩ ga nümax. Nüma rü Tupanaãrü Ore nixĩ i naega erü tamaã nüxŷ nixu i Tupanachiga.

<sup>2</sup> Rü naxŷpa ga guxŷma rü nüma ga Tupana Nane rü naxŷtatatama nayexma.

<sup>3</sup> Rü guma Nanexŷ nixĩ ga namuxŷ ga Tupana na naxŷãxŷcèx ga guxŷma. Rü nataxuma i tacü i ñuxma ngèxmaxŷ i tama nüma naxŷxŷ.

<sup>4</sup> Rü Nanewa nixĩ i nangexmaxŷ i maxŷ. Rü ngema maxŷ rü guxŷ i duŷxŷgüarü ngóonexèèruŷ nixĩ.

<sup>5</sup> Rü yima Nane rü woo chixexŷ íporaxŷwa rü duŷxŷgŷxŷ nüxŷ nacuèxèè i Tupanachiga. Rü ngèma chixexŷ rü taxucü-rüwama ngèma mexŷxŷ narüyexera.

<sup>6-7</sup> Rü nayexma ga wüxi ga yatü ga Cuáŷ ga baiŷxèèruŷgu ãegacü. Rü guma nixĩ ga Tupana núma namucü na nüxŷ yaxuxŷcèx ga nachiga ga guma ngóonexèèruŷ na yemaãcü guxãma nüxŷ yaxôgŷxŷcèx.

<sup>8</sup> Rü nüma ga Cuáŷ rü tama Tupana Nane ya duŷxŷgüarü ngóonexèèruŷ nixĩ. Natürü nüma nixĩ ga Tupana núma namuxŷ na nüxŷ yaxuxŷcèx ga nachiga ga guma ngóonexèèruŷ.

<sup>9</sup> Rũ ñoma ga naãnewa nangu ya yima aixcũma Tupana Nane ixĩcũ i guxũma i duũxũgũxũ ngóonetanũxẽẽcũ.

<sup>10</sup> Rũ nũma ga guma Nane ga Tupanaãrũ Ore ixĩcũ rũ ñoma ga naãnewa nayexma. Rũ woo nagagu nixĩ ga naxũãxũ ga guxũma ga ñoma ga naãne, natürũ ñoma ga naãne-cũãx ga duũxũgũ rũ tama nũxũ nacuèxgũ na texe yĩxũ.

<sup>11</sup> Nuã norũ naãnewatama nangu, natürũ norũ duũxũgũ ga Yudíugũ rũ tama nanayauxgũ.

<sup>12</sup> Natürũ guxema nayauxgũxe rũ nũxũ yaxõgũxe rũ tũxũ nanatauxchaxẽẽ na Tupanaxãcũgũ tixĩgũxũ.

<sup>13</sup> Rũ ñuxma rũ Tupanaxãcũgũ tixĩgũ ga guxema yaxõgũxe. Natürũ tama noxri tabuexũgagu nixĩ i ngẽma rũ tama tũmanatũgũarũ ngũchaũgagu nixĩ. Natürũ i ñuxma rũ Tupanaxãcũgũ tixĩgũ ga guxema yaxõgũxe yerũ nũmatama ga Tupana rũ naxãcũgũxũ tũxũ nixĩgũxẽẽ.

<sup>14</sup> Rũ nũma ya yima Nane ya Tupanaãrũ ore ixĩcũ rũ duũxũãcũ nangox. Rũ totanũwa nayexma rũ poraãcũ toxũ nangechaũ rũ aixcũma nixĩ ga norũ ore. Rũ toma nũxũ tadaugũ ga ñuxãcũ na naxũünexũ. Rũ Nanatũxũtawã nanayaxu ga yema üüne yerũ nũgũmaã nũxũ nawüxicèx ga nũma.

<sup>15</sup> Rũ gumachigaxũ nixĩ ga yaxuxũ ga Cuáũ ga yexguma ñaxgu: —Daa nixĩ ga guma pemaã nũxũ chixuchigacũ ga yexguma ñachaxgu:

“Rũ yima choweama ne ücũ rũ choxũ rüyexeracũ nixĩ, yerũ woetama marũ nayexma ga tauta chabuxgu ga chomax”, ñanagürũ ga Cuáũ.

<sup>16</sup> Rũ yima Tupana Nane rũ namecũmaxũchi rũ

naxmẽxwa nangẽxma i guxũma. Rũ naxũtawa nixĩ i nayauxgũxũ i guxũma i ngũxẽẽgũ.

<sup>17</sup> Rũ Moĩchéxũ nixĩ ga namuxũ ga Tupana na tũxũ nangúexẽẽxúcèx ga yema norũ mugũ. Natürũ Ngechuchu ya Cristuxũ nixĩ ga namuxũ na tũxũ nangúexẽẽxúcèx na yigũ ingechaũgũxũ rũ nagu imaxẽxúcèx i ore i aixcũma ixĩxũ.

<sup>18</sup> Taguma texé ñuxgu nũxũ tadau ga Tupana. Natürũ Nane ya nũgũmaã nũxũ wũxicacũ nixĩ ya tũxũ nũxũ cuèxẽẽcũ. Rũ yima Nane rũ Tupanaxũchi nixĩ, rũ Nanatũmaã wũxiwa nangẽxmagũ.

*Cuáũ ga baiũxẽẽruũ rũ nũxũ nixu ga Ngechuchu ya Cristuchiga*

*(Mt 3.11-12; Mr 1.7-8; Lc 3.15-17)*

<sup>19</sup> Rũ yema Yudíugũarũ ãẽxgacũgũ ga Yerucharéũcũãx rũ Cuáũ ga baiũxẽẽruũxũtawa nanamugũ ga paigũ rũ Lebítanũxũgũ na nũxna yacagũexúcèx na texe yĩxũ.

<sup>20</sup> Rũ nũma ga Cuáũ rũ meãma nũgũ nixu, rũ ñanagürũ: –Tama nixĩ i Cristu chíxũ i chomax – ñanagürũ.

<sup>21</sup> Rũ wenaxãrũ nũxna nacagũ rũ ñanagürũgũ: –¿Texé ẽxna quixĩ? ¿Éxna cuma ga nuxcũmaũcũ ga Tupanaãrũ orearũ uruũ ga Ería quiixũ? – ñanagürũgũ. Rũ Cuáũ nanangãxũ rũ ñanagürũ: –Tama Ería chixĩ –ñanagürũ. Rũ nũmagũ rũ wenaxãrũ nũxna nacagũe rũ ñanagürũgũ: –¿Éxna cuma quiixũ ya yima orearũ uruũ ga Moĩché nũxũ ixucũ ga ínguxchaũcũ? –ñanagürũgũ. Rũ Cuáũ nanangãxũ rũ ñanagürũ: –Tama yima chixĩ – ñanagürũ.

22 Rŭ yexguma ñanagŭrŭgŭama: —¿Éxna texé quiixŭ? Erŭ tanaxwexe i ngẽma núma toxŭ mugŭxŭxŭtawa tanange i curŭ ngâxŭga. ¿Rŭ ñuxŭ ñacuxŭ i ñuxma na texé quiixŭ? —ñanagŭrŭgŭ.

23 Rŭ Cuáŭ nanangãxŭ rŭ ñanagŭrŭ nŭxŭ: — Choma nixĩ i ngẽma duixŭ i dauxchitawa i ngextá taxúema íxãpataxŭwa tagaãcü ñachaxŭ:

“¡Rŭ nŭxŭ perŭxoe i pecŭma i chixexŭ rŭ ipeyanawẽxãchixẽẽx i perŭ maxŭ naxcèx ya Cori ya Tupana!” ñachaxŭ, guma nuxcŭmaŭcü ga orearŭ uruŭ ga Ichaxía nŭxŭ ixuxŭrŭŭ —ñanagŭrŭ.

24-25 Rŭ yexguma ga yema paigŭ rŭ Parichéugŭ yéma mugŭxŭ ga Cuáŭmaã na yanadexagŭxŭcèx rŭ wenaxãrŭ nŭxna nacagŭe, rŭ ñanagŭrŭgŭ: — Rŭ ngẽxguma tama Cristu quixĩgu, rŭ tama Ería quixĩgu, rŭ tama yima orearŭ uruŭ ya ínguxchaŭcü quixĩgu, ¿rŭ tŭxcŭŭ i duixŭgŭxŭ ícubaiŭxẽẽxŭ i ñuxmax? —ñanagŭrŭgŭ nŭxŭ.

26-27 Rŭ Cuáŭ nanangãxŭ rŭ ñanagŭrŭ: —Choma rŭ dexáwamare íchanabaiŭxẽẽ i duixŭgŭ. Natŭrŭ petanŭwa nangẽxma ya yima tama nŭxŭ pecuácŭ ya choweama ne ŭcü. Rŭ choma rŭ napẽxewa rŭ taxuwama chame, rŭ bai i norŭ chapatu-cunŭgŭarŭ wẽgŭwa chame —ñanagŭrŭ ga Cuáŭ.

28 Rŭ yema nachica ga Betániãgu ãegaxŭwa nixĩ ga Cuáŭ ga nŭxŭ yaxuxŭ ga yema ore. Rŭ natŭ ga Yudáŭãrŭ tocutŭwa nixĩ ga yema nachica ga ngextá Cuáŭ duixŭgŭxŭ íbaiŭxẽẽxŭwa.

*Ngechuchu nixĩ ga Tupana núma namucŭ na duixŭgŭarŭ pecaducèx nayuxŭcèx*

29 Rŭ moxŭãcü ga Cuáŭ rŭ Ngechuchuxŭ nadau ga naxcèx na yaxŭxŭ. Rŭ ñanagŭrŭ ga Cuáŭ: —¡Rŭ

dücax! Daa nixĩ ya yima Tupana núma namucü na nayuxücèx na ñoma i nañnecũãx i duũxügüarü pecaduxũ iyanaxoxẽẽxücèx.

<sup>30</sup> –Rü choma rü daa Ngechuchuchigaxũ nixĩ ga chixuxũ ga yexguma ñachagu:

“Rü choweara ne naxũ ya wüxi ya chorü yexeracü, yerü nüma rü woetama nayexma ga tauta chabuxgu ga chomax”, ñachagu.

<sup>31</sup> –Rü chomatama ga noxri rü tama nüxũ chacuèx ga texe na yĩxũ ga nümax. Natürü núma chaxũ na dexáwamare duũxügüxũ íchibaiũxẽẽtanũxücèx na tatanũxũ i Yudíugü nüxũ cuèxgüxücèx na texé yĩxũ –ñanagürü.

<sup>32</sup> Rü ñanagürü ta ga Cuáũ: –Rü chomatama nüxũ chadau ga Tupanaãẽ ga Üünexũ ga yexguma wüxi ga muxtucurũ daxüwa ínaxexeegu rü Ngechuchuxũnegu yanawèxgux.

<sup>33</sup> –Choma rü noxri tama nüxũ chacuèx ga texe na yĩxũ ga nümax. Natürü ga Tupana ga choxũ mucü na dexáwamare duũxügüxũ íchabaiũxẽẽxücèx, rü ñanagürü choxũ:

“Rü yima nüxũ cudadü ya chauãẽ i Üünexũ naetügu íruxexeeçü, rü yima tá nixĩ ya chauãẽ i Üünexũ duũxügüna nguxẽẽçü”, ñanagürü choxũ.

<sup>34</sup> –Choma rü marü yima Ngechuchuxũ chadau rü pemaã nüxũ chixu na nüma rü aixçüma Tupana Nane yĩxũ –ñanagürü.

### *Nüxĩraũxũ ga norü ngúexũgü ga Ngechuchu*

<sup>35</sup> Moxũãçü rü wenaxârü Cuáũmaã yema nachicawa tayexmagü ga toma ga taxre ga norü ngúexũgü.

<sup>36</sup> Rŭ yexguma Ngechuchuxŭ nadèuxgu ga yéma na naxüpetüxŭ, rŭ Cuáŭ rŭ ñanagürü toxŭ: — ¡Dücèx! Yima nixĩ ya Tupana núma namucü na pecaducèx nayuxŭcèx —ñanagürü.

<sup>37</sup> Rŭ toma ga Cuáŭârü ngúexügü rŭ nüxŭ taxĩnüē ga yexguma yema ñaxgu. Rŭ Ngechuchuwe tarüxĩ.

<sup>38</sup> Rŭ nügü ínidaŭ ga Ngechuchu, rŭ toxŭ nadaŭ ga nawe na tarüxĩxŭ. Rŭ toxna naca rŭ ñanagürü toxŭ: —¿Tacücèx pedau? —ñanagürü. Rŭ tomagü rŭ ñatarügügü: —Pa Ngúexēeruŭx, ¿ngexta nixĩ i cupexŭ? —ñatarügügü.

<sup>39</sup> Rŭ Ngechuchu toxŭ nangãxŭ, rŭ ñanagürü toxŭ: —¡Nuã chowe perüxĩ rŭ ípeyadèux! — ñanagürü. Rŭ nawe tarüxĩ, rŭ nüxŭ tadaugü ga na ngexta napexŭ. Rŭ yexguma yéma tangugügu, rŭ marü ägümücüarü orawa nangu ga na nayáuanexŭ. Rŭ yexma naxŭtagu tarücho rŭ ñuxmata nachüta.

<sup>40</sup> Rŭ choma chixĩ ga noxri Cuáŭ ga baiüxēeruŭxŭ chaxĩnüxŭ ga yixcama Ngechuchuwe charüxŭxŭ. Rŭ chomücü rŭ Aŭdré nixĩ. Rŭ nüma rŭ Pedru ga Chimáüēneē nixĩ.

<sup>41</sup> Rŭ yexgumatama ga Aŭdré, rŭ naēneē ga Chimáücèx nayadaŭ. Rŭ ñanagürü nüxŭ: —Rŭ marü nüxŭ itayangau ya yima Cristu ga nuxcüma Tupana nüxŭ unetacü —ñanagürü.

<sup>42</sup> Rŭ yemawena, rŭ Ngechuchu íyexmaxŭwa Chimáüxŭ naga ga Aŭdré. Rŭ yexguma Ngechuchu Chimáüxŭ dèuxgu, rŭ ñanagürü nüxŭ: —Cuma nixĩ i Chimáü i Cuáŭ nane quiixŭ. Natürü i ñuxmawena rŭ Nuta tá nixĩ i cuéga —ñanagürü. Rŭ ngēma naega rŭ Pedru ñaxŭchiga nixĩ.

*Ngechuchu rü naxcèx naca ga Piripi rü Natanae*

43 Rŭ moxũãcũ ga Ngechuchu rü nũgũ namexẽẽ na Gariréaanewa naxũxũcèx. Rŭ Piripixũ inayan-gau rü ñanagũrũ nũxũ: —¡Chowe rũxũ! —ñanagũrũ.

44 Rŭ nũma ga Piripi rü ñãne ga Bechaídacũãx nixĩ. Rŭ yémacũãx ta nixĩ ga Aũdré rü Pedru.

45 Rŭ Piripi rü Natanaecèx nayadau, rü ñanagũrũ nũxũ: —Marũ nũxũ itayangau ya yima Cristu ga Moĩché nachiga naxũmatũcũ ga mugũarũ pop-erawa, rü nuxcũmaũgũxũ ga Tupanaãrũ orearũ uruũgũ ta nachiga naxũmatũgũcũ. Yima nixĩ ya Yũche nane ya Ngechuchu ya Nacharétucũãx — ñanagũrũ.

46 Rŭ ñanagũrũ ga Natanae: —¿Ñuxãcũ i ñacũ rü mexũ i Nacharétuwa ne naxũxũ? —ñanagũrũ. Rŭ Piripi nanangãxũ, rü ñanagũrũ nũxũ: —¡Dũcèx, ngĩxã rü Ítayadau! —ñanagũrũ.

47 Rŭ yexguma Ngechuchu Natanaexũ dèuxgu ga naxcèx na yaxũxũ, rü ñanagũrũ: —¡Dũcèx! Yéa ne naxũ i wũxi i yatũ i aixcũma Yudíu ixĩxũ i aixcũma ngearũ chixexũãxũ —ñanagũrũ.

48 Rŭ yexguma ga Natanae rü Ngechuchuna naca, rü ñanagũrũ nũxũ: —¿Ñuxãcũ i choxũ cu-cuãxũ? —ñanagũrũ. Rŭ Ngechuchu nanangãxũ rü ñanagũrũ nũxũ: —Naxũpa ga Piripi cuxcèx na yaçaxũ, rü choma rü cuxũ chadau ga yexguma orĩx ga igueratũũgu curũxãũxgux —ñanagũrũ.

49 Rŭ Natanae nanangãxũ rü ñanagũrũ nũxũ: — Pa Ngúexẽeruũx, cuma rü Tupana Nane quixĩ. Rŭ cuma nixĩ i guxũma i Yudíugũarũ Æxgacũ quiĩxũ —ñanagũrũ.

50 Rŭ Ngechuchu nanangãxũ, rü ñanagũrũ

nüxŭ: —Cuma rü choxŭ cuyaxõ erü cumaã nüxŭ chixu na igueratüŭwa cuxŭ na chadauxŭ. Rü ngẽmacèxicatama nixĩ i cuyaxõxŭ. Natürü ngẽma ñuxma nüxŭ cudauxŭârü yexera tá nixĩ i nüxŭ cudauxŭ i yixcüra —ñanagürü.

<sup>51</sup> Rü ñanagürü ta ga Ngechuchu: —Rü aixcüma pemaã nüxŭ chixu rü tá nüxŭ pedaugü na yawãxnaxŭ i daxŭguxŭ i naãne. Rü tá nüxŭ pedaugü i Tupanaârü orearü ngeruŭgü i daxŭcüãx i ngẽma daxŭ ïgüxŭ rü íruxïgüxŭ i naetüwa ya Tupana Nane ya duŭxŭxŭ ixĩcü —ñanagürü.

## 2

*Ngïarü peta ga ïãne ga Canáwa üxŭ ga Gariréaanewa*

<sup>1</sup> Rü yexguma marü tomaẽxpŭx ga ngunexŭ Gariréaanearü ïane ga Canáwa nayexmagu ga Ngechuchu, rü nayexma ga wüxi ga ngïarü peta. Rü yemawa ngxina naxugü ga naẽ ga Ngechuchu.

<sup>2</sup> Rü Ngechuchuna rü toxna rü ta naxugüe na yéma taxĩxçèx.

<sup>3</sup> Rü nagux ga norü axexŭ ga binu. Rü Ngechuchu naẽ ngïgürügü nüxŭ ga Ngechuchu: —Marü nagúarü binuãxgü —ngïgürügü.

<sup>4</sup> Natürü Ngechuchu ngïxŭ nangãxŭ, rü ñanagürü: —Pa Mamax, çtŭxcüŭ chomaã nüxŭ quixu i ngẽma? Erü tauta nawa nangu na chanaxüxçèx i çacü rü mexŭ i Tupanaârü poramaã üxŭ —ñanagürü.

<sup>5</sup> Natürü ga ngïma ga naẽ rü ngïgürügü nüxŭ ga yema baegüxŭ namaã ga binuchiü: —¡Penaxŭx i



guxŭma i ngẽma nŭma pemaã nŭxŭ yaxuxŭ! — ngĩgŭrŭgŭ.

<sup>6</sup> Rŭ yema iyexma ga 6 ga tŭxŭ ga nutagŭngĩxcèx. Rŭ wŭxichigŭ ga yema tŭxŭwa rŭ maneca yexma name ga 50 rŭ ěxna 70 litrugŭ ga dexá. Rŭ yema tŭxŭgŭ iyixĩ ga yema Yudíugŭ ngĩxŭ ixŭgŭãcugŭcŭ ga yexguma dexámaã nŭgŭ yayauxmẽxgŭchaŭgu na Tupanacèx nŭgŭ yamexẽegŭxŭcèx.

<sup>7</sup> Rŭ Ngechuchu rŭ yema baegŭxŭxŭ namu, rŭ ñanagŭrŭ: —¡Dexámaã ngĩxŭ pixŭgŭãcu i ñaã tŭxŭgŭ! —ñanagŭrŭ. Rŭ nŭmagŭ ga yema baegŭxŭ rŭ meãma ngĩxŭ nixŭgŭãcu.

<sup>8</sup> Rŭ Ngechuchu ñanagŭrŭ nŭxŭ: —Rŭ ñuxma chanaxwèxe i íraxŭ peyaxu, rŭ petaarŭ yoraxŭtawa penange —ñanagŭrŭ. Rŭ yemaãcŭ nanaxŭgŭ ga yema baegŭxŭ.

<sup>9</sup> Rŭ yema petaarŭ yora nŭxŭ naxaxneta ga yema dexá ga binuxŭ nacèxichixŭ. Natŭrŭ tama nŭxŭ nacuèx ga ngextá na nayauxgŭãxŭ. Rŭ yema baegŭxŭxĩcatama nixĩ ga nŭxŭ cuèxgŭxŭ ga dexámare na yĩxŭ ga noxrix. Rŭ yexgumatama ga yema petaarŭ yora rŭ yema yatŭ ga ingĩxŭcèx naca.

<sup>10</sup> Rŭ ñanagŭrŭ nŭxŭ: —Guxŭ i naãnewa rŭ duŭxŭgŭ rŭ noxri rŭ namaã nabae ya mecŭ ya binu. Rŭ ngẽxguma marŭ meãma guxŭma axegŭgu i ngẽma nŭxna naxuxŭ, rŭ ngẽmawena rŭ nŭxna nanaxã ya ngexcŭrŭcŭmare ya binu. Natŭrŭ i cuma rŭ marŭ nagŭxchaŭgu i peta, rŭ mexẽchicŭ ya binumaãtama cuyaxaxegŭxẽe i duŭxŭgŭ — ñanagŭrŭ.

<sup>11</sup> Rŭ guma Gariréaanewa yexmane ga ñãne ga Canáwa nixĩ ga yema naxŭxŭ ga Ngechuchu. Rŭ

yema nixĩ ga nüxĩraũxũ ga cuèxruũ ga Tupanaãrũ poramaã üxũ ga nawa nügũ inawéxũ ga Tupana Nane na yĩxũ. Rũ toma ga norũ ngúexũgũ rũ nüxũ tayaxõgũ.

<sup>12</sup> Rũ yemawena rũ Capernáũ ga ãñewa naxũ ga Ngechuchu. Rũ naẽ rũ naẽneẽgũ rũ toma ga norũ ngúexũgũ rũ ta itayaxümücũgũ. Rũ yéma guma ãñewa tayexmagũ ga ñuxre ga ngunexũ.

*Ngechuchu rũ tupauca ga taxũnewa ñanawoxũ ga yema duũxũgũ ga yéma taxegũxũ*

*(Mt 21.12-13; Mr 11.15-18; Lc 19.45-46)*

<sup>13</sup> Rũ toma ga Yudíugũ rũ marũ ningaica ga torũ peta ga Üpetũchiga. Rũ yemacèx ga Ngechuchu rũ Yerucharéũwa naxũ.

<sup>14</sup> Rũ yexma tupauca ga taxũnegu nüxũ nayan-gau ga duũxũgũ ga yéma norũ wocagũmaã rũ carnerugũmaã rũ muxtucugũmaã taxegũxũ. Rũ yéma nüxũ nadau ta ga duũxũgũ ga norũ taxechi-cawa rütogũxũ rũ Tupanaarũ ãmarewa mexũ ga dñerumaã yéma taxegũxũ.

<sup>15</sup> Rũ yexguma yemaxũ nadèuxgu ga Ngechuchu, rũ nanaxũ ga wüxi ga cuaixruũ ga naxchèxmünaxcèx. Rũ yemamaã tupauca ga taxũnewa ñanawoxũ ga yema duũxũgũ guxũma ga norũ carnerugũmaã rũ wocagũmaã. Rũ yema dñerucèx taxegũxũãrũ dñeru rũ ngĩxũ narũwoũ ñaxtũanegu. Rũ norũ mechagũ rũ ta nüxũ nawoneta.

<sup>16</sup> Rũ yema muxtucugũmaã taxegũxũxũ ñanagürü: —Ípeyana i ngẽma perũ muxtucugũ i nuã! Tama name i taxepataũxũ peyaxĩxẽẽ ya daa Chaunatuãpata —ñanagürü.

17 Rŭ yexguma ga toma ga norŭ ngúexŭgŭ rŭ nŭxna tacuèxãchie ga nuxcŭmaŭxŭ ga ũmatŭxŭ ga ñaxŭ:

“Duŭxŭgŭ rŭ tá chauxchi naxaie erŭ chanachuxu i tacŭ i chixexŭ na naxŭgŭxŭ i Tupanapatawa”,

ñaxŭ.

18 Rŭ yexguma ga yema ãëxgacŭgŭ rŭ Ngechuchuna nacagŭ, rŭ ñanagŭrŭgŭ: —¿Tacŭ rŭ cuèxruŭxŭ toxŭ cudauxëë na nawa nŭxŭ tacuáxŭcèx na aixcŭma Tupana yŭxŭ ya cuxŭ mucŭ na ícunawoxŭxŭcèx i ñaã duŭxŭgŭ i nuã? —ñanagŭrŭgŭ.

19 Rŭ Ngechuchu nanangãxŭ, rŭ ñanagŭrŭ: —¡Nagu pepogŭe ya daa tupauca ya taxŭne! Rŭ choma rŭ tomaèxpŭx i ngunexŭgu rŭ tá wena íchanadaxëë —ñanagŭrŭ.

20 Rŭ yexguma ga yema ãëxgacŭgŭ rŭ nanangãxŭgŭ, rŭ ñanagŭrŭgŭ: —Rŭ 46 ga taunecŭ nawa napuracŭe ga duŭxŭgŭ na naxŭgŭãxŭcèx ga daa tupauca ya taxŭne. ¿Rŭ ñuxãcŭ tá i cuma i tomaèxpŭx i ngunexŭ tátama wena ícunadaxëëxŭ? —ñanagŭrŭgŭ.

21 Natŭrŭ guma Tupanapata ga Ngechuchu nachiga idexane rŭ naxŭnechigatama nixŭ.

22 Rŭ yemacèx ga toma ga norŭ ngúexŭgŭ, rŭ yexguma Ngechuchu yuwa írŭdaxgu, rŭ nŭxna tacuèxãchie ga yema ore ga Ngechuchu nŭxŭ ixuxŭ. Rŭ aixcŭma tayaxŭgŭ ga yema ore ga nŭxŭ yaxuxŭ rŭ yema Tupanaãrŭ ore ga nuxcŭmaŭgŭxŭ ga orearŭ uruŭgŭ Ngechuchuchigagu ũmatŭgŭxŭ.

*Ngechuchu rŭ nŭxŭ nacuèx i guxŭma i duŭxŭgŭ*

23 Rŭ yexguma Ngechuchu Ŧpetŭchigaarŭ petacèx Yerucharéŭwa yexmagu, rŭ muxŭma ga duŭxŭgŭ rŭ nŭxŭ nayaxŭgŭ, yerŭ nŭxŭ nadaugŭ ga yema taxŭ ga mexŭgŭ ga Tupanaarŭ poramaã naxŭxŭ.

24 Natŭrŭ ga nŭma ga Ngechuchu rŭ tama yema duŭxŭgŭmèxèwa nŭgŭ nayexmaxèèchaŭ, yerŭ woetama marŭ nŭxŭ nacuèx ga tacŭgu na naxŭnŭèxŭ ga guxŭma ga yema duŭxŭgŭ.

25 Rŭ yemacèx ga nŭma rŭ taxucèxma texé namaã nŭxŭ tixu na tacŭgu naxŭnŭèxŭ ga yema duŭxŭgŭ. Yerŭ nŭmatama marŭ nŭxŭ nacuèx ga tacŭgu na naxŭnŭèxŭ ga naãèwa ga wŭxichigŭ.

### 3

#### *Ngechuchuxŭtagu nanaxŭãne ga Nicodému*

1 Nayexma ga wŭxi ga Parichéu ga Nicodémugu àegacŭ. Rŭ nŭma rŭ wŭxi ga àèxgacŭ ga nŭxŭ nangechaŭgŭcŭ nixŭ ga Yudŭgŭtanŭwa.

2 Rŭ guma Nicodému rŭ Ngechuchuxŭtagu nanaxŭãne ga chŭtacŭ. Rŭ ñanagŭrŭ Ngechuchuxŭ: —Pa Ngúexèèruŭx, toma nŭxŭ tacuèx na aixcŭma Tupana nŭma cuxŭ muxŭ na toxŭ cungúexèèxŭcèx. Erŭ taxucŭrŭwa texé cuxrŭ tanaxŭ i ngèma taxŭ i mexŭgŭ i Tupanaarŭ poramaã ŭxŭ, ega tama Tupana tŭmaxŭtawa ngèxmagu —ñanagŭrŭ.

3 Rŭ Ngechuchu nanangãxŭ rŭ ñanagŭrŭ nŭxŭ: —Aixcŭma cumaã nŭxŭ chixu, rŭ yŭxema tama we-naxarŭ buxe rŭ taxucŭrŭwama Tupana àèxgacŭ íixŭxŭwa tangu —ñanagŭrŭ.

4 Rŭ Nicodému rŭ Ngechuchuna naca, rŭ ñanagŭrŭ nŭxŭ: —¿Natŭrŭ ñuxãcŭ i wŭxi i yatŭ i

marü yaxů i wena nabuxů? ¿Éxna wena naēñnügu naxůcuxů rü ngēmaācü wena nabuxů? —ñanagürü.

<sup>5</sup> Rů Ngechuchu nanangāxů rü ñanagürü: — Rů aixcůma cumaā nüxů chixu rü yixema tama nüxů růxoxe i tümaārü pecadu rü tama Tupanaāē i Üünexůwa nayaxúxe i maxů i ngexwacaxůxů, rü taxucürüwama Tupana āēxgacü íxixůwa tichocu

<sup>6</sup> —Yixema duůxůwa buxe rü duůxůtama tixí. Natürü yixema Naāē i Üünexůwa nayaxúxe i maxů i ngexwacaxůxů, rü Tupanaxācü tixí.

<sup>7</sup> —¡Tāütáma cubaixāchiāē na cumaā nüxů chixuxů na Tupana naxwēxexů na guxůma i duůxůgů rü wena nabuexů!

<sup>8</sup> —Ya buanecü rü nüma ínanaxwēxexůwa nabu. Rů nüxů cuxínü i naga, natürü tama nüxů cucuèx na ngextáama ne naxůxů rü ngextáama na naxůxů. Rů ngēxgumarüů ta tixígů ya guxāma ya yixema Naāē i Üünexůwa nayaxúxe i maxů i ngexwacaxůxů —ñanagürü.

<sup>9</sup> Rů Nicodému wenaxârü Ngechuchuna naca, rü ñanagürü: —¿Natürü ñuxācü nixí i ngēma? —ñanagürü.

<sup>10</sup> Rů Ngechuchu nanangāxů, rü ñanagürü nüxů: —Cuma rü Yudíugüarü ngúexēeruů i nüxů cuáxů quixí. ¿Rů ñuxācü chi i cuma i tama nüxů cucuáxů i ngēma?

<sup>11</sup> —Aixcůma cumaā nüxů chixu rü toma rü namaā tidexagů i ngēma nüxů tacuáxů. Rů norü uruů tixígů i ngēma nüxů tadaugůxů. Natürü pema rü tama toxů peyaxōgů i ngēma pemaā nüxů tixuxů.

<sup>12</sup> —Rů ñuxma na tama choxů peyaxōgůxů i ngēma pemaā nüxů chixuxů i ñoma i naāneärü ngēmaxůchiga, rü ¿ñuxācü tá peyaxōgůxů ega

pemaã nüxũ chixuxgu i daxũguxũ i naãnewaãrũ ngẽmaxũchiga?

13 —Taguma texé daxũguxũ i naãnewa taxũ. Natürü i choma i Tupana Nane na duũxũxũ chiixũ, rü chaxicatama nixĩ i ngema ne chaxũxũ rü ngema tá chaxũxũ.

14-15 —Pema nüxũ pecuèx ga ñuxãcü nuxcümaxũchima yema nachica ga ngextá taxúema íxãpataxũwa, rü Moiché wüxi ga naĩgu nanaxünagü ga yema ãxtape ga dñerumünaxcèx. Rü ngẽxgumarũũ tá ta i choma i Tupana Nane i duũxũxũ chiixũ, rü wüxi i naĩgu tá choxũ naxünagügü i duũxügü na guxãma ya texé ya choxũ yaxõgüxe rü tüxũ nangẽxmaxüçèx i maxũ i taguma gúxũ.

*Tupana rü poraãcü nüxũ nangechaũ i ñoma i naãnecũãx*

16 —Rü Tupana rü poraãcü nüxũ nangechaũ i ñoma i naãnecũãx i duũxügü. Rü yemacèx inanamu ga Nane ga nügümaã wüxicacü na guxãma ya texé ya nüxũ yaxõgüxe rü tama itarütaxexüçèx rü tüxũ nangẽxmaxüçèx i maxũ i taguma gúxũ.

17 —Yerü ga Tupana rü tama ñoma ga naãnewa nanamu ga Nane na duũxügümaã naxueguãxüçèx na napoxcuxũ. Natürü núma nanamu na namaxẽẽãxüçèx i duũxügü.

18 —Rü yíxema Tupana Naneãxũ yaxõxẽ, rü Tupana rü tama tümamaã nanaxuegu na tapoxcuxũ. Natürü yíxema tama nüxũ yaxõxẽ, rü marü tümamaã nanaxuegu na tapoxcuxũ, erü tama

nüxŭ tayaxõ ya yima Tupana Nane ya nügümaã wüxicacü.

19 —Rü yíxema tama nüxŭ yaxõgüxe, rü Tupana rü marü tümamaã nanaxuegu na tapoxcuexŭ. Yerü yexguma ñoma ga naãnewa nanguxgu ga Tupana Nane ya duŭxŭgüarü ngóonexëëruŭ, rü tama nawe tarüxŭchaŭ. Natürü yexera tümaãrü me nixŭ ga ëänexŭwaama na tayexmagüxŭ, yerü chixexŭ taxügü.

20 —Guxãma ya yíxema chixexŭ ügüxe rü naxchi taxaie i ngóonexŭ. Rü tama nüxna tangaicam-agüchaŭ erü tama tanaxwèxe na nangóxŭ i ngëma chixexŭ i ítaxügüxŭ.

21 —Natürü yíxema aixcüma Tupanaãrü ore nüxŭ ixuxŭãcüma meã maxëxë rü nüxna tangaicama i ngëma ngóonexŭ. Rü ngëmaãcü tanaxü na meã nangóxŭcèx na Tupanaãrü ngüchaŭãcüma na yíxŭ i guxŭma i ngëma taxügüxŭ —ñanagürü.

### *Cuáŭ ga baiŭxëëruŭ rü wenaxãrü nüxŭ nixu ga Ngechuchuchiga*

22 Rü yemawena rü tomaã Yudéaanewa naxŭ ga Ngechuchu. Rü ñuxre ga ngunexŭ tomaã yéma nayexma rü yéma duŭxŭgüxŭ ítabaiŭxëëgü.

23 Rü Cuáŭ ga baiŭxëëruŭ rü Enóãrü ñãnewa ga Charíarü ngaicamana rü ínanabaiŭxëë ta ga duŭxŭgü yerü yéma nayexma ga taxŭ ga dexá. Rü yema yéma íngugüetanüxŭ ga duŭxŭgü, rü Cuáŭ ínayabaiŭxëëtanü.

24 Rü yemaãcü nangupetü naxŭpa ga na poxcu-pataŭgu yatèxcuchixŭ ga Cuáŭ.

25 Rü yexguma rü ñuxre ga norü ngüexŭgü ga Cuáŭ, rü wüxi ga Yudíumaã niporagatanücüü

nachiga ga nacümagü na ñuxãcü namexü na Tupanacèx nügü yamexëëgüxü ga duüxügü.

26 Rû CuáŦmaã nüxü nayarüxugüe, rû ñanagürügü: —Pa Ngúexëëruüx, dücax guma yatü ga tomaã nüxü quixucü rû cumaã yexmacü ga natü i YudáŦârü tocutüwa, rû yima rû ñuxma rû duüxügüxü ínabaiüxëë, rû guxüma i duüxügü rû nawe narüxĩ —ñanagürügü.

27 Rû CuáŦ nanangãxü rû ñanagürü nüxü: —Taxúema tacü tüxü nangëxma ega Tupana tama tüxna naxãxgu.

28 —Pematama rû marü choxü pexĩnüë ga yexguma ñachagu:

“Choma rû tama Cristu chixĩ. Natürü choma chixĩ i Tupana yima Cristupëxegu choxü imuxü na nüxü chixuxüçèx i nachiga”, ñachagu.

29 —Rü wüxi i ngĩgüwa rû yima yatü ya ingïcü rû naxmèxãrü yora nixĩ. Rû yima yatümücü i naxütawa ngëxmaxü rû nüxü inarüxĩnü i norü ore. Rû nataãë i ngëxguma nüxü naxĩnügu i ngëma na yadexaxü. Rû ngëxgumarüü i choma rû aixcüma Cristumaã chataãëxüchi i ñuxmax.

30 —Nüma rû tá nixĩnagüchigü na ãëxgacü yĩxü, natürü i choma rû tá ícharüxĩchigü.

### *Yima daxüwa ne üxcüchiga*

31 —Rü yima Cristu ya daxüwa ne üxcü rû guxãëtüwa nangëxma. Natürü i choma rû ñoma i naãnewa changëxma, rû ñoma i naãnecüãx chixĩ, rû ngëma ñoma i naãnewa ngëxmaxüchigaxü chixu. Natürü i nüma ya Cristu ya daxüwa ne üxcü, rû guxãëtüwa nangëxma.



32 –Rü nüma rü tamaã nüxũ nixuchiga ga yema nüxũ nadauxũ rü nüxũ naxĩnüxũ. Natürü noxre-tama nüxũ nayaxõgü i ngẽma nüxũ yaxuxũ.

33 –Natürü ngẽxguma texé nüxũ yaxõxgu i norü ore, rü ngẽmaãcü tanangoxẽẽ na aixcüma yĩxũ i ngẽma Tupana nüxũ ixuxũ.

34 –Rü yima Tupana núma namucü, rü Tupanaãrü orexũ nixu. Erü Tupana rü nüxna nanamu i Naãẽ i Üünexũ na guxũguma naxütawa nangẽxmaxũcèx.

35 –Rü Tanatü ya Tupana rü Nanexũ nangechaũ. Rü ngẽmacèx marü naxmẽxwa nanangẽxmaxẽẽ i guxũma i tacü i ngẽxmaxũ.

36 –Rü yixema Tupana Naneãxũ yaxõxẽ rü tüxũ nangẽxma i maxũ i taguma gúxũ. Natürü yixema tama nüxũ yaxõxchaũxẽ ya Tupana Nane, rü tãütáma tüxũ nangẽxma i ngẽma maxũ i taguma gúxũ. Natürü tá tanayaxu i ngẽma ãücümaxũ i poxcu i Tupana tá namaã tüxũ poxcuxũ – ñanagürü ga Cuáũ ga baiũxẽẽruũ.

## 4

### *Ngechuchu rü Chamáriaanecũãx ga ngecü*

1 Rü Parichéugü rü nüxũ nacuáchigagü ga Ngechuchu rü Cuáũãrü yexera nüxũ na nayexmaxũ ga norü ngúexũgü, rü norü yexera duũxũgüxũ na ínabaiũxẽẽxũ.

2 Natürü tama Ngechuchu nixĩ ga ínabaiũxẽẽcü ga duũxũgü. Rü toma ga norü ngúexũgü tixĩ ga tanaxũxũ ga yema.

3 Rŭ yexguma Ngechuchu nüxŭ ĩnügu ga Parichéugŭ rŭ nachigagu na yadexagŭxŭ, rŭ yéma Yudéaanewa ítachoxŭ na Gariréaanecèx tawoeguxŭ.

4 Natürŭ ga yema nama ga nagu tawoeguxŭ rŭ Chamáriaanewa nadapetŭ.

5 Rŭ yemacèx ga toma rŭ nawa tangugŭ ga wŭxi ga Chamáriaaneärŭ ĩâne ga Chicaru. Rŭ guma ĩâneärŭ ngaicamana nayexma ga yema naâne ga nuxcŭmaŭcŭ ga Acobuaxŭ yexmaxŭ rŭ yixcama rŭ nane ga Yŭchena naxãxŭ.

6 Rŭ yéma nayexma ga wŭxi ga puchu ga duŭxŭgŭ dexácèx ixaixmaŭgŭcŭ ga Acobuarŭ Puchugu äegacŭ. Rŭ poraãcŭ nipa ga Ngechuchu ga namagu na yaxŭxŭ. Rŭ yemacèx guma puchuxŭtawa nayarŭtoŭchi. Rŭ tocuchiwa nanguxchaŭ ga yexguma.

7-8 Rŭ toma ga norŭ ngúexŭgŭ rŭ guma ĩänewa taxŭ na torŭ ònacèx tayataxegŭxŭcèx. Rŭ towena yéma ingu ga wŭxi ga ngecŭ ga Chamáriaanecŭãx ga guma puchuwa dexáwa ŭcŭ. Rŭ Ngechuchu rŭ ñanagŭrŭ ngŭxŭ: —ĭÍraxŭ i dexá choxna naxã! — ñanagŭrŭ.

9 Natürŭ ga yema nge rŭ ĩbaixãchiãe yerŭ ga Yudŭgŭ rŭ Chamáriaanecŭãxgŭmaã nügŭchi naxaie rŭ yemacèx ga yema nge rŭ inangãxŭ rŭ ngŭgŭrŭgŭ nüxŭ: —ĭÑuxãcŭ i cuma na Yudŭ quiŭxŭ i dexácèx choxna cuçaxŭ i choma na Chamáriaanecŭãx chiŭxŭ? —ngŭgŭrŭgŭ.

10 Rŭ Ngechuchu ngŭxŭ nangãxŭ, rŭ ñanagŭrŭ: —Ngèxguma chi nüxŭ cucuèxgu i ngèma mexŭ i Tupana cuxna ãxchaŭxŭ, rŭ chi nüxŭ cucuèxgu na texé yŭxŭ ya yima dexá cuxna taçacŭ, rŭ cuma

rü chi nüxnata cuca i dexá i maxũ nawa ngẽxmaxũ  
rü nüma rü chi cuxna nanaxã i ngẽma dexá —  
ñanagürü.

11 Rü yema ngecũ inangãxũ, rü ngĩgürügü nüxũ:  
—Pa Corix, ¿ñuxãcü tá i dexáta cuyaxu? Erü daa  
puchu rü namátamaxũchi rü cuxũ nataxuma na  
ñacümaã cunayaxuxúcèx i dexá. ¿Rü ngextá tá i  
cunayaxuxũ i ngẽma dexá i maxũ nawa ngẽxmaxũ  
na choxna cunaxãxúcèx?

12 —Nuxcümaũcü ga tórü oxi ga Acobu toxcèx  
núma Chamáriaanewa nanatèx ga daa puchu. Rü  
gumawa nixĩ ga naxaxexũ ga nüma rü nanegü rü  
norü wocagü. ¿Rü ñuxãcü chi i cuma i norü yexera  
quiixũ? —ngĩgürügü.

13 Rü Ngechuchu ngĩxũ nangãxũ, rü ñanagürü: —  
Rü guxãma ya texé ya daa puchuarü dexáwa axexe,  
rü wena táxarü tiñawae.

14 —Natürü texé ya yixema choma tüxna chaxãxũ  
i dexáwa axexe, rü tagutáma wena tiñawa. Erü  
ngẽma dexá i choma tüxna chaxãxũ rü wüxi ya  
puchu ya guxüguma ibaibecürüũ tá nixĩ i tümawa,  
erü ngẽma dexáwa nangẽxma i maxũ i taguma gúxũ  
—ñanagürü.

15 Rü ngĩma ga yema nge rü inangãxũ rü  
ngĩgürügü: —Pa Corix, ¿choxna naxã i ngẽma dexá  
na taguma wena chiñawaxúcèx, rü taguma wena  
daa puchuwa dexáwa chaxũxúcèx! —ngĩgürügü.

16 Rü Ngechuchu ñanagürü ngĩxũ: —¡Íyadau ya  
cute, rü naxcèx yaca, rü nuã pexĩ! —ñanagürü.

17 Rü yema ngecũ rü inangãxũ, rü ngĩgürügü  
nüxũ: —Nataxuma ya chaute —ngĩgürügü. Rü  
Ngechuchu ñanagürü ngĩxũ: —Aixcüma nixĩ i  
ngẽma nüxũ quixuxũ na nataxuũma ya cute.

18 –Yerü wüximēēxpüxchirēx nixī ga cute, rü yima ñuxma cuxütawa ngēxmacü rü tama aixcüma cutexüchi nixī. Rü ngēmacèx aixcüma nixī i curü ore i chomaã nüxü quixuxü –ñanagürü.

19 Rü yexguma yemaxü naxīnügu ga yema ngecü, rü ngīgürügü: –Pa Corix, nüxü chicuèxãchi rü cuma rü wüxi i Tupanaãrü orearü uruü quixī.

20 –Nuxcümaügüxü ga torü oxigü ga Chamáriaanecüãxgü rü daa mèxpüne ga Garachíüwa Tupanaxü nicuèxüügü. Natürü i pema i Yudíugü rü ñaperügü:

“Rü Yerucharéü nixī i nachica i mexü i ngextá Tupanaxü ticuèxüügü”, ñaperügü.

21-22 Rü Ngechuchu ngixü nangãxü rü ñanagürü: –Pema i Chamáriaanecüãxgü rü tama aixcüma nüxü pecuèxgü ya yima nüxü picuèxüügücü. Natürü toma i Yudíugü rü aixcüma nüxü tacuèx ya yima nüxü ticuèxüügücü, erü Yudíugügagu nixī i Tupana namaxēxēxü i guxüma i duüxügü. ¡Choxü yaxõ, Pa Ngecüx! Rü aixcüma ínangu tá i ngunexü na täütáma daa mèxpünewa rü ēxna Yerucharéüwa tá nüxü na picuèxüügüxü ya Tanatü ya Tupana.

23 –Erü yíxema aixcüma Tupanaxü icuèxüügüxe rü nüetama nixī i ngēxürüüxümare i nachicawa Tupanaxü ticuèxüügü. Erü ñuxma rü ngēma Naãe i Ünexü naxwèxexü nixī na guxüma i tümaãemaã rü tümaãrü maxümaã aixcüma Tupanaxü ticuèxüügüxü. Rü ngēmaãcü nixī i nanaxwèxexü ya Tanatü na nüxü ticuèxüügüxü.

24 –Erü Tupana rü wüxi i Naãe nixī. Rü ngēmacèx yíxema texé ya nüxü icuèxüügüxe rü

tanaxwèxe i guxũma i tümaãẽmaã rü tümaãrũ  
maxũmaã na aixcũma nüxũ ticuèxüügüxũ, ngẽma  
Naãẽ i Üünexũ naxwèxexũãcũma –ñanagürü.

25 Rũ yema ngecũ inangãxũ rü ngĩgürügü:  
—Choma nüxũ chacuèx rü tá ñoma i naãnewa  
nangu ya yima Cristu ya Tupana nüxũ unetacũ.  
Rũ ngẽxguma yima núma ũxgu rü tá tamaã  
nanangoxẽẽ i guxũma i Tupanachiga —ngĩgürügü.

26 Rũ Ngechuchu rü ñanagürü ngĩxũ: —Choma na  
cumaã chidexaxũ, rü yima chixĩ —ñanagürü.

27 Rũ yexguma íyadexayane rü ítangugũ ga toma  
ga norü ngúexügü. Rũ tabaixãchiãẽgü yerü ga  
Ngechuchu rü wüxi ga ngecũmaã ínidexa. Natürü  
taxúema ga toma rü togü taporaxẽẽ ga nüxna  
na tacagüxũ ga tacü ngĩmaã na nanaxwèxexũ rü  
tacüchiga yĩxũ ga ngĩmaã na íyadexaxũ.

28 Rũ yexguma ga yema ngecũ rü yéma ngĩxũ itèx  
ga ngĩrũ tüxũ. Rũ ñãnewa ixũ na duũxügümaã nüxũ  
yanaxuxücèx.

29 Rũ ngĩgürügü: —¡Ngĩxã rü ítayadaugü i wüxi  
i yatü i chomaã nüxũ ixuxũ ga guxũma ga tacü  
ga chaxüxũ! ¿Taux õxna yima yĩxũ ya Cristu? —  
ngĩgürügü.

30 Rũ inaxĩãchi ga yema ñãnecũãx, rü Ngechuchu  
íyexmaxũwa naxĩ.

31 Rũ yoxni ga toma ga norü ngúexügü rü  
Ngechuchuxũ tachixewegü na nachibüxücèx.

32 Natürü ga nüma rü ñanagürü toxũ: —Choma  
rü choxũ nangẽxma i chowemü i pema tama nüxũ  
pecuáxũ —ñanagürü.

33 Rũ yexguma ga toma ga norü ngúexügü rü  
togüna tacagüe, rü ñatarügügü: —Bexmana marü

¿texé nuã tanange i nawemü? –ñatarügügü.

<sup>34</sup> Natürü ga Ngechuchu rü ñanagürü toxü: – Ngẽma õna i choxü poraxẽẽxü nixĩ na chanaxüxü i norü ngúchaü ya yima nuã choxü mucü ya Chau-natü, rü na chayanguxẽẽxü i norü puracü.

<sup>35</sup> –Rü pema rü ñaperügügü:

“Rü ägümücü ya tauemacü nataxu na yabuxgüxü i trigu”, ñaperügügü. Natürü i choma rü ñacharügü pexü:

“¡Düçèx, rü meã penangügü i duüxügü! Erü marü ínamegü na Tupanaxü nayauxgüxüçèx, ngẽxgumarüü i wüxi i trigunecü i marü nawa nanguxü na yabuxgüxü erü marü nidau”.

<sup>36</sup> –Rü yíxema Tupanacèx nadexe i duüxügü rü tá tanayaxu i tümaärü natanü. Rü guxüma i ngẽma duüxügü i tüxü irüxĩnüẽxü rü tá nanayauxgü i maxü i taguma gúxü. Rü ngẽmaäcü rü wüxigu tá tataãgü ya yíxema tüxira ngẽma duüxügümaã Tupanaärü orexü ixuxe rü yíxema yixcama ngẽma duüxügüxü Tupanacèx dexe.

<sup>37</sup> –Rü aixcüma nixĩ i ngẽma ore i ñaxü:

“Wüxie tixĩ ya namaã toexe i trigu rü togue tixĩ ya yíxema yabuxgüxe i norü o”, ñaxü. [Rü ngẽxgumarüü rü wüxie tixĩ ya tüxira duüxügümaã nüxü ixuxe i Tupanaärü ore, rü togue tixĩ ya yixcama ngẽma duüxügüxü dexe Tupanacèx.]

<sup>38</sup> –Rü noxri rü togü nixĩ ga duüxügümaã nüxü ixuxü ga Tupanaärü ore, natürü ga duüxügü rü tama nayaxõgü ga yexguma. Rü yemawena rü pexü chamu na yema duüxügümaã nüxü pixuxüçèx ga yema ore. Rü pema nixĩ ga yema duüxügüxü pedexü Tupanacèx, yerü nayaxõgü ga

yexguma namaã nüxŧ pixuxgu ga yema ore. Rü yemaãcü ga pema rü marü peyoxniẽ nawa ga togüarü puracü —ñanagürü.

<sup>39</sup> Rü muxŧma ga guma Chamáriaanewa yexmane ga ãnecŧãx rü Ngechuchuaxŧ nayaxögü, yerü nüxŧ nayaxögü ga yema ore ga yema ngecü namaã nüxŧ ixuxŧ ga yexguma ngixgu:

“Guxŧma ga tacü ga ŧpa chaxüxŧ rü chomaã nüxŧ nixu” ngixgu.

<sup>40</sup> Rü yemacèx ga yema Chamáriaanecŧãxgü rü yexguma Ngechuchuxŧtawa nangugügu rü nüxŧ nacèèxŧgü ga yexma natanügu na naxãxŧcèx. Rü taxre ga ngunexŧ yexma natanügu narüxãxŧ ga Ngechuchu.

<sup>41</sup> Rü muxŧma ga togüamachigü ga Chamáriaanecŧãxgü rü Ngechuchuaxŧ nayaxögü ga yexguma nüxŧ naxĩnüëgu ga yema norü ore ga nümatama nüxŧ yaxuxŧ.

<sup>42</sup> Rü yexguma ga yema duŧxŧgü rü ñanagürügü ngixŧ ga yema ngecü: —Ñuxma waxi nixĩ i aixcüma nüxŧ tayaxögüxŧ erü tomatama nüxŧ taxĩnüë i ngẽma norü ore i tomaã nüxŧ yaxuxŧ. Rü ngẽmawa nüxŧ tacuèx na aixcüma yima yiixŧ ya Cristu ya ñoma i naãnecŧãx i duŧxŧgüarü maxèèeruŧ. Rü tama ngẽma cuma tomaã nüxŧ quixuxŧcèxicatama tayaxögü —ñanagürügü.

*Ngechuchu rü nanamexẽẽ ga wüxi ga ãëxgacü nane*

<sup>43</sup> Rü taxre ga ngunexŧguwena ga Ngechuchu rü tomaã inaxŧãchi ga Chamáriaanewa na Gariréanewa naxŧxŧcèx.

<sup>44</sup> Rü nümatama ga Ngechuchu ga ŧpaacü rü ñanagürü: —Wüxi i Tupanaãrü orearü uruŧ,

rü norü nañnewatama i duñxügü rü tama meã nanayauxgü —ñanagürü.

<sup>45</sup> Natürü yexguma Gariréanewa tangugügu, rü yema nañnecũãx ga duñxügü rü meãma nanayauxgü. Yerü nümagü ga yema nañnecũãxgü rü Yerucharéüwa naxĩ ta naxcèx ga Üpetüchigaarü peta, rü yéma nüxũ nadaugü ga yema taxũ ga mexügü ga Tupanaärü poramaã naxüxũ ga Ngechuchu ga yexguma.

<sup>46</sup> Rü ga Ngechuchu rü tomaã nataegu naxcèx ga guma ñãne ga Caná ga Gariréanewa yexmane. Rü guma ñãnewa nixĩ ga binuxũ nanguxuchixëẽãxũ ga dexá. Rü ñãne ga Capernáüwa nayexma ga wüxi ga tacü ga ãëxgacü, rü niðaawe ga wüxi ga nane.

<sup>47</sup> Rü yexguma guma ãëxgacü nüxũ cuáchigagu ga Ngechuchu rü Gariréanewa na nanguxũ ga Yudéanewa na ne naxüxũ, rü naxütawa naxü. Rü nüxũ nayacèèxũ na napatawa naxüxüçèx, rü naxcèx na yanataanexëẽãxüçèx ga guma nane ga marü turaxüchicü.

<sup>48</sup> Rü Ngechuchu nanangãxũ, rü ñanagürü nüxũ: —Pema rü tama peyaxõgü ega tama nüxũ pedauxiragu i taxũ i cuèxruũgü i Tupanaärü poramaã üxũ —ñanagürü.

<sup>49</sup> Natürü ga guma ãëxgacü rü ñanagürü nüxũ: — Pa Corix, ipaxa chowe rüxũ naxüpa na nayuxü ya chaune! —ñanagürü.

<sup>50</sup> Rü Ngechuchu nanangãxũ rü ñanagürü nüxũ: —¡Nataegu i cupatawa! Erü cune rü marü naxcèx nitaane —ñanagürü. Rü guma yatü rü nayaxõ ga yema ore ga Ngechuchu namaã nüxũ ixuxũ. Rü napatacèx nataegu.

<sup>51</sup> Rü yexguma napatawa nanguxchaũgu ga



guma ãëxgacü, rü norü duïxügü napëxegu nayayi, rü ñanagürügü nüxü: –Cune rü marü naxcèx nitaane –ñanagürügü.

<sup>52</sup> Rü yexguma rü norü duïxügüna naca, rü ñanagürü nüxü: –¿Tacü rü oragu inaxügüxü na naxcèx yataanexü? –ñanagürü. Rü yema norü duïxügü nanangãxü rü ñanagürügü: –Ïne tocuchiguwena nixi ga nüxü nangupetüxü ga na yaxaxünexü –ñanagürügü.

<sup>53</sup> Rü guma bucü nanatü rü nüxna nacuèxãchi ga yema oragu na yiïxü ga Ngechuchu ga ñaxü nüxü: “Cune rü marü naxcèx nitaane” ñaxü. Rü nüma ga guma ãëxgacü rü guxüma ga napatacüãx rü Ngechuchuaxü nayaxögü.

<sup>54</sup> Rü yexguma Yudeáanewa ne naxüxgu ga Ngechuchu, rü yema nixi ga norü taxre ga cuèxruü ga taxü ga Tupanaärü poramaã duïxügüxü nawéxü ga Gariréanewa.

## 5

*Ngechuchu rü nanamexëë ga wüxi ga yatü ga idaawexü ga Betechawa yexmaxü*

<sup>1</sup> Rü ñuxre ga ngunexügü ngupetüguwena rü nayexma ga wüxi ga peta ga Yudiügü auregüxü na yemaãcü Tupanaxü yacuèxüügüxücèx. Rü yemacèx ga Ngechuchu rü Yerucharéücèx nataegu.

<sup>2</sup> Rü guma ñãneärü poxeguxü rü nüxü nayexma ga wüxi ga iãx ga Carneruarü Choxüchicagu ãëgaxü. Rü yema iãxärü ngaicamana nayexma ga wüxi ga puchu ga Yudiügügawa Betechagu ãëgaxü. Rü guma puchuanacüwa nayexma ga wüximëëxpüx ga chopetüchica ga ãxpataüetügüxü.

<sup>3</sup> Rŭ yema chopetŭchicagu nacagŭ ga muxŭma ga duŭxŭgŭ ga idaaweexŭ. Rŭ nŭmaxŭ rŭ nangexetŭgŭ, rŭ togŭ rŭ nachixeparagŭ, rŭ togŭ rŭ nanawãixãchigŭ. Rŭ yema idaaweexŭ rŭ yema nananguxẽegŭ ga guma puchu ga na naxĩãxãchichiŭxcèx.

<sup>4</sup> Yerŭ ñuxguacŭ rŭ guma puchugu ínarŭxĩxŭ ga wŭxi ga daxŭcŭãx ga Tupanaãrŭ orearŭ ngeruŭ, rŭ nayaxĩãxchiŭcŭxẽexŭ. Rŭ guxema tŭxira tŭgŭ yema táexe nachiŭwa ga guma puchu ga yexguma yaxĩãxchiŭcŭgu, rŭ tŭmacèx nitaane woo ga ngẽxŭrŭmare ga daawe tŭxŭ yexmaxẽ.

<sup>5</sup> Rŭ yema natanŭwa nayexma ga wŭxi ga yatŭ ga marŭ 38 ga taunecŭ idaawecŭ.

<sup>6</sup> Rŭ yexguma Ngechuchu nŭxŭ dèuxgu ga guma yatŭ ga yexma na nacaxŭ, rŭ nŭxŭ nacuáchiga ga marŭ mucŭma ga taunecŭ na yadaawexŭ. Rŭ yemacèx nŭxna naca rŭ ñanagŭrŭ nŭxŭ: —¿Cunaxwèxexŭ i cuxcèx na yataanexŭ? —ñanagŭrŭ.

<sup>7</sup> Rŭ Ngechuchuxŭ nangãxŭ ga guma idaawecŭ, rŭ ñanagŭrŭ: —Pa Corix, tataxuma ya texé ya choxŭ rŭngŭxẽẽxẽ na ngema choxŭ tataexŭcèx i ngẽxguma naxĩãxãchichiŭgu ya daa puchu. Rŭ guxŭguma i ngẽxguma ngema chaugŭ chatáechaŭgu, rŭ yoxni i togŭ rŭ marŭ nŭxira nŭgŭ ngema natáegŭ —ñanagŭrŭ.

<sup>8</sup> Rŭ Ngechuchu rŭ ñanagŭrŭ nŭxŭ: —¡Inachi, rŭ nayaxu i curŭ caruŭ, rŭ íixŭ! —ñanagŭrŭ.

<sup>9-10</sup> Rŭ yexgumatama naxcèx nitaane ga guma yatŭ. Rŭ nanayaxu ga norŭ caruŭ, rŭ ínixŭ. Natŭrŭ ga yema ngunexŭ rŭ ngŭxchigaarŭ ngunexŭ nixĩ. Rŭ yemacèx ga yemacŭãxgŭ ga Yudíugŭarŭ ãẽxgacŭgŭ rŭ ñanagŭrŭgŭ nŭxŭ ga

guma yatü ga naxcèx itaanecü: –Ñoma nixĩ i ngüxchigaarü ngunexü. Rü ngẽmacèx nachuxu nixĩ na cuyangexü i curü caruü erü yemaãcü tamaã nüxü nixu ga Moïché –ñanagürügü.

<sup>11</sup> Natürü ga guma yatü rü yema Yudíugüarü ãëxgacügüxü nangãxü, rü ñanagürü: –Yima choxü rümexëëcü rü ñanagürü choxü:

“¡Nayaxu i curü caruü rü íxü!” ñanagürü.

<sup>12</sup> Rü yexguma ga yema ãëxgacügü rü nüxna nacagü, rü ñanagürügü: –¿Texé ngẽma ñatarügü cuxü:

“¡Nayaxu i curü caruü rü íxü!” ñatarügü cuxü? – ñanagürügü.

<sup>13</sup> Natürü ga guma yatü rü tama nüxü nacuèx ga texé naxcèx na yataanexëëxü, yerü namuxüchi ga duüxügü ga yéma, rü yexma nayarütaxu ga Ngechuchu.

<sup>14</sup> Natürü yixcama ga Ngechuchu rü tupauca ga taxünegu nüxü nayangau ga guma yatü, rü ñanagürü nüxü: –¡Dücèx i ñuxma marü cuxcèx na yataanexü, rü tãütáma wena chixexü cuxü na tama quidaawexüçèx namaã i wüxi i ñaawe i ngẽma marü cuxü ngupetüxüãrü yexera íxü! – ñanagürü.

<sup>15</sup> Rü ínixü ga guma yatü, rü Yudíugüarü ãëxgacügümaã nüxü nayarüxu ga Ngechuchu na yíxü ga guma namexëëcü.

<sup>16</sup> Rü yemacèx nixĩ ga yema ãëxgacügü ga Ngechuchucèx nadaugüxü na yamëxgüãxüçèx, yerü ngüxchigaarü ngunexügu napuracü.

<sup>17</sup> Natürü ga Ngechuchu rü ñanagürü nüxü: – Chaunatü ya Tupana rü guxü i ngunexügu napu-

racü rü mexŭ naxü. Rü ngẽmacèx i choma rü ta naxrüŭ chapuracü —ñanagürü.

<sup>18</sup> Rü yemacèx ga yema Yudíugüarü ãëxgacügü rü yexeraãcü Ngechuchuxŭ nimèxgüchaŭ. Yerü tama naxrüŭ nanaxaure ga ngüxchigaarü ngunexŭ rü ñuxŭchi nüxŭ nixu ga Nanatüxüchi na yĩxŭ ga Tupana, rü yemaãcü nügü nixu ga Nanatü ga Tupanamaã na nawüxiguxŭ.

*Nüma ga Tupanatama nixĩ ga Nanena naxããxŭ ga pora*

<sup>19</sup> Rü yexguma ga Ngechuchu rü ñanagürü nüxŭ ga yema ãëxgacügü: —Aixcüma pemaã nüxŭ chixu rü choma i Tupana Nane rü tama chorü poramaã chanaxü i tacü rü puracü i mexŭ. Natürü ngẽma nüxŭ chadauxŭ i Chaunatü üxŭxĩcatama nixĩ ichaxüxŭ. Rü guxŭma i ngẽma Chaunatü üxŭ, rü choma ya Nane rü ta chanaxü.

<sup>20</sup> —Chaunatü ya Tupana rü choxŭ nangechaŭ, rü ngẽmacèx choxŭ nüxŭ nadauxẽẽ i guxŭma i tacü i nüma naxüxŭ. Rü ngẽma ñuxma choxŭ nüxŭ nadauxẽẽxŭarü yexera tá choxŭ nüxŭ nadauxẽẽ i yixcüra. Rü ngëxguma i pema ega ngẽmaxŭ pedaugügu, rü tá pebaixãchiãëgü namaã.

<sup>21</sup> —Rü Chaunatü rü ínanadagüxẽẽ i yuexŭgü rü wena nanamaxẽẽ. Rü ngëxguma-rüŭ ta i choma i Nane rü tüxna chanaxã i maxŭ ya yixema chatümawèxexe na tüxna chanaxãxŭ.

<sup>22-23</sup> —Rü tama Chaunatü nixĩ ya duüxŭgüxŭ icagücü i norü maxŭchiga. Natürü choxŭ nixĩ i namuxŭ na chanaxüxcèx i ngẽma, na choxŭ yacuèxüügüxcèx i duüxŭgü, ngẽma Chaunatüxŭ na yacuèxüügüxŭrŭ. Rü yixema tama choxŭ

icuèxüxüxë, rü tama nüxü ticuèxüü ta ya Chaunatü ya choxü nuã mucü.

24 —Aixcüma pemaã nüxü chixu rü yíxema texé ya choxü irüxĩnüxë i chorü ore, rü nüxü yaxõxë ya yima Chaunatü ya núma choxü mucü, rü tüxü nangëxma i maxü i taguma gúxü. Rü Chaunatü rü tãütãma tümamaã nanaxuegu na tapoxcuxü erü marü nawa ítanguxuchi na tayuxü, rü tüxü nangëxma i maxü i taguma gúxü.

25 —Rü aixcüma pemaã nüxü chixu rü marü nawa tá nangu i ngunexü rü ñuxmatama nixĩ i chauga naxĩnüèxü tá i ngëma duüxügü i norü pecadugu yuexü rü iyarütauxexü. Rü texé ya chauga ñnüèxë rü tá tamaxë.

26 —Nüma ya Chaunatü rü nüxü nangëxma i pora na namaxëxëãxüçèx i duüxügü. Rü ngëma pora rü choxna nanaxã ya Chaunatü na choma rü ta duüxügüxü chamaxëxëxüçèx.

27 —Rü Chaunatü ya Tupana choxü namu na duüxügüna chaçaxüçèx naxçèx i norü maxüchiga, erü choma nixĩ i Nane i duüxüxü chíxü.

28 —¡Tãxü i pebaixãchiãëgüxü namaã i ñãã ore i pemaã nüxü chixuxü! Erü tá ínangu i ngëma ngunexü i nagu guxüma i duüxügü i yuexü rü tá na nüxü naxĩnüèxü i chauga.

29 —Rü naxmaügüwa tá ínachoxü. Rü ngëma meã maxëxü, rü tá ínarüdagü na nayauxgüãxüçèx i maxü i taguma gúxü. Natürü ngëma chixexü ügüxü, rü tá ínarüdagü na napoxcuexüçèx.

*Nawa nüxü icuáxü na Tupana yĩxü ga Ngechuchuna naxãcü ga pora*

30 –Choma rü taxucürüwa tacü chaxü chaecheamatama ega tama choxü naxüxëẽãgu ya Chaunatü. Rü Chaunatü chomaã nüxü ixuxüãcüma nixĩ i nüxna chaçaxü i duũxügü i norü maxüchiga. Rü ngëxguma nüxna chacaxgu rü aixcüma meãma chanangugü i duũxügü. Erü tama choxrütama ngúchaũ nixĩ i ngëma chaxüxü, natürü Chaunatü ya nuã choxü mucüarü ngúchaũ nixĩ i ngëma chaxüxü.

31 –Rü ngëxguma chi chauchigaxütama chixuxgu rü taxuwama name i ngëma.

32 –Natürü nangëxma i to i chauchigaxü ixuxü. Rü nüxü chacuèx rü aixcüma nixĩ i norü ore i pemaã nüxü yaxuxü.

33 Pema rü Cuáũ ya baiüxëẽruũxütawa penamugü ga perü duũxügü na nüxü pecuáxücèx ga ore ga aixcüma ixixü ga chauchiga. Rü yema ore ga Cuáũ pexü namaã ngãxüxü rü aixcüma nixĩ.

34 –Natürü i choma rü tama chanaxwèxe i tacü rü yatü chauétüwa nachogü, erü choma tátama chaugüna chadau. Natürü pemaã nüxü chixu i ngëma Cuáũãrü ore na choxü peyaxögüxücèx rü na penayauxgüxücèx i maxü i taguma gúxü.

35 –Cuáũ rü wüxi ga omü ga iyauracüüxü rü pexü báxixü-rüü nixĩ ga pexcèx. Rü pema rü paxaãchi namaã petaãëgü.

36 –Natürü nangëxma i tacü i Cuáũãrü orearü yexera chauétüwa íchogüxü. Rü ngëma nixĩ ga yema taxügü ga cuèxruügü ga Chaunatü choxü muxü na norü poramaã chanaxüxücèx. Rü yemawa pexü nüxü chadauxëẽ na aixcüma Chaunatü ya Tupana yiixü ga núma choxü mucü.

37 –Rü ngëxgumarüü ta ya Chaunatü ga guma

núma choxŭ mucü, rü marü chauétüwa ínachogü, woo taguma nüxŭ pexĩnüë ga naga rü taguma nüxŭ pedau.

<sup>38</sup> —Rü ngëma Chaunatüarü ore rü ta tama peãëwa nixücu, erü tama choxŭ peyaxögü woo Chaunatü núma choxŭ na muxŭ.

<sup>39-40</sup> —Pema meãma nawa pengúe i Tupanaãrü ore i ümatüxŭ, erü nagu perüxĩnüë rü ngëmawa tá nüxŭ ipeyangau i perü maxŭ i taguma gúxŭ. Natürü woo ngëmatama Tupanaãrü ore i ümatüxŭwa rü chauchiga meã na yadexaxŭ, natürü i pema rü tama choxŭ peyaxögüchaŭ na ngëmaãcü penayauxgüxŭcèx i ngëma maxŭ.

<sup>41-42</sup> —Rü choma rü tama chanaxwèxe na choxŭ picuèxüügüxŭ erü meãma pexŭ chacuèx, rü nüxŭ chacuèx na tama aixcüma Tupanaxŭ pengechaügüxŭ.

<sup>43</sup> —Chaunatü ya Tupana nixĩ ga núma choxŭ mucü, natürü i pema rü tama choxŭ peyauxgüchaŭ. Natürü ngëxguma chi tomare i yatü nagagutama núma ũxgu, rü ngëma chi nixĩ i taãëãcüma peyauxgüxŭ.

<sup>44</sup> —¿Rü ñuxãcü chi choxŭ peyaxögü ega penaxwèxegu na pemücügütama pemaã taãëxŭ rü tama naxcèx pedaugügu na Tupanaxŭchi pemaã taãëxŭ?

<sup>45</sup> —¡Tãxŭ i nagu perüxĩnüëxŭ na choma tá yïxŭ na pexŭ chixugüxŭ i Chaunatüxütawa! Erü Moïché ga guma perü maxŭcèx nüxŭ peyaxögücü tátama nixĩ ya yima pexŭ ixugücü i Chaunatüxütawa.

<sup>46</sup> —Rü ngëxguma chi peyaxögügu i ngëma ore ga Moïché ümatüxŭ, rü choxŭ rü chi ta

peyaxögü. Yerü ga Moïché rü chauchigagu nixĩ ga naxümatüãxü ga norü poperawa.

47 —Natürü ngëxguma tama peyaxögügu i ngëma Moïché ümatüxü i ore, ¿rü ñuxãcü tá peyaxögü i ngëma choma pemaã nüxü chixuxü? —ñanagürü ga Ngechuchu.

## 6

*Ngechuchu rü nanachibüexëẽ ga 5000 ga yatügü (Mt 14.13-21; Mr 6.30-44; Lc 9.10-17)*

1 Rü yemawena ga Ngechuchu rü nextaxa ga Gariréagu äeganearütocutüwa tomaã naxü. Rü norü toéga ga guma nextaxa rü Tibéria nixĩ.

2 Rü muxüma ga duüxügü rü nawe narüxĩ. Yerü üpaacü rü marü nüxü nadaugü ga ñuxãcü Ngechuchu na naxüxü ga taxü ga mexügü ga Tupanaärü poramaã üxü ga yexguma duüxügü ga idaaweegüxücëx yataanexëëgüãgu.

3 Rü yexguma ga Ngechuchu rü wüxi ga mëxpúnewa tomaã inaxüãchi. Rü wüxigu tomaã yéma narüto.

4 Rü marü ningaica ga yema Yudiügüarü peta ga Üpetüchiga.

5 Rü yexguma Ngechuchu nüxü dawenügu rü nüxü nadau ga muxüma ga duüxügü ga nawe rüxixü. Rü yemacëx Piripina naca, rü ñanagürü: —¿Rü ngextá tá naxcèx tataxe i nawemü i ñãã duüxügü na nachibüexëëxücèx? —ñanagürü.

6 Rü nümatama ga Ngechuchu rü marü nüxü nacüex ga tacü tá na naxüxü. Natürü yema ñanagürü Piripixü, yerü nüxü nacuáxchaü ga tacümaã tá na nangãxüãxü.



7 Rŭ yexguma Ngechuchuxŭ nangãxŭ ga Piripi, rŭ ñanagŭrŭ: —Woo chi naxcèx itaxegŭgu i 200 i dŭeru naguxŭ i pãũ, rŭ tãũ chima nŭxŭ ningu ega woo wŭxichigŭna íraxŭ íxãchigŭgu —ñanagŭrŭ.

8-9 Rŭ yexguma ga Aŭdré ga Ngechuchuarŭ ngúexŭ ga Pedru ga Chimáũ naēneē, rŭ ñanagŭrŭ: —Nuã nangēxma i wŭxi i buxŭ rŭ nŭxŭ nangēxma i 5 i pãũ i chebadanaxcèx rŭ taxre ta i choxni. ¿Natŭrŭ tacŭwa name i ngēma naxcèx i ñãã muxŭchixŭ i duŭxŭgŭ? —ñanagŭrŭ.

10 Rŭ yexguma ga Ngechuchu rŭ ñanagŭrŭ toxŭ: —¡Ēcŭ, namaã nŭxŭ pixu i duŭxŭgŭ na ínatogŭxŭcèx! —ñanagŭrŭ. Rŭ yema nachicawa rŭ nametēxeane ga guma maxē. Rŭ gumatēxewa narŭtogŭ ga duŭxŭgŭ. Rŭ maneca 5000 wa nangu ga yexguma yatŭgŭxica íxugŭgu.

11 Rŭ yexguma ga Ngechuchu rŭ nanade ga yema pãũgŭ, rŭ Tupanana moxē naxã. Rŭ yemawena rŭ toxŭ nayanu na yema duŭxŭgŭ ga yéma rŭtogŭxŭxŭ tayanuxŭcèx. Rŭ yexgumarŭũ ta ga choxni rŭ nŭxŭ toxŭ nayanuxēē, ñŭxmata meãma nachibŭe ga guxŭma ga yema duŭxŭgŭ.

12 Rŭ yexguma marŭ meã nachibŭegu ga guxŭma, rŭ Ngechuchu toxŭ namu rŭ ñanagŭrŭ toxŭ: —¡Penade i ngēma naxchipēxegŭ i íyaxŭgŭxŭ na tama inaxaiyèxŭxŭcèx! —ñanagŭrŭ.

13 Rŭ tanade ga yema naxchipēxegŭ ga yema 5 ga pãũwa íyaxŭxŭ, rŭ 12 ga pexchi namaã tanaxŭãcugŭ.

14 Rŭ yexguma yema duŭxŭgŭ nŭxŭ daugŭgu ga yema mexŭ ga taxŭ ga Tupanaãrŭ poramaã naxŭxŭ ga Ngechuchu, rŭ ñanagŭrŭgŭ: —

Aixcūmaxŭchi daa nixĩ ya Tupanaãrŭ orearŭ uruŭ ga guma ínanguxěěcŭ –ñanagŭrŭgŭ.

<sup>15</sup> Natŭrŭ ga Ngechuchu rŭ nŭxŭ nicuèxãchi ga duŭxŭgŭ rŭ na norŭ ãëxgacŭxŭ yangucuchixěëgŭchaŭãxŭ. Rŭ yemacèx nŭxna nixŭgachi rŭ yéamaxŭra naxŭ nawa ga guma mèxpŭne na nŭxĩcatama nayexmaxŭcèx.

*Dexáétŭgu nixŭ ga Ngechuchu*

*(Mt 14.22-27; Mr 6.45-52)*

<sup>16</sup> Rŭ yexguma marŭ nachŭtagu, rŭ toma ga Ngechuchuarŭ ngúexŭgŭ rŭ wenaxãrŭ naxtaacutŭwa taxĩ.

<sup>17</sup> Rŭ poraãcŭ naxěãne. Rŭ tama ínangu ga Ngechuchu. Rŭ yemacèx wŭxi ga ngue ga taxŭnegu tichoŭ, rŭ itaxĩãchi ga na tocutŭwa taxĩxŭ ga Capernáũãrŭ ãñewa na tangugŭxŭcèx.

<sup>18</sup> Rŭ yexguma tixãŭyane rŭ inaxŭgŭ ga na poraãcŭ yabuaxŭ. Rŭ yemagagu rŭ poraãcŭ nayuape.

<sup>19</sup> Rŭ yexguma marŭ 5 ga kilómetru tixãŭgu, rŭ Ngechuchuxŭ tadaugŭ ga na dexáchiŭétŭgu yaxŭxŭ. Rŭ toma ga norŭ ngúexŭgŭ rŭ poraãcŭ tamuŭě.

<sup>20</sup> Natŭrŭ nŭma ga Ngechuchu rŭ ñanagŭrŭ toxŭ: –Choma chixĩ. ¡Rŭ tãxŭ i pemuŭěxŭ! –ñanagŭrŭ.

<sup>21</sup> Rŭ yexguma ga toma ga norŭ ngúexŭgŭ rŭ taãěãcŭma tanayauxgŭchaŭ ga toweŭwa. Rŭ yexgumatama ítangugŭ ga yema ítaxĩxŭwa.

*Ngechuchucèx nadaugŭ ga duŭxŭgŭ*

<sup>22</sup> Rŭ moxŭãcŭ ga yema duŭxŭgŭ ga naxtaxaarŭ tocutŭgu rŭchoxŭ, rŭ nŭxŭ nicuèxãchitanŭ ga toma ga Ngechuchuarŭ ngúexŭgŭ ga marŭ nagu

na taxĩxũ ga guma ngue ga taxũne ga nũgũmaã wũxicane. Rũ nũxũ nacuèxgũ ta ga Ngechuchu rũ tama towe na naxũxũ.

<sup>23</sup> Rũ yexguma yemagu ínaxĩnũëyane, rũ yox-ocũne ínangugũ ga náígũ ga ngue ga itaxũne ga Tibériaarũ íãnewa ne íxũne. Rũ norũ ngaicamana nangugũ ga yema nachica ga ngextá Ngechuchu ínachibũexẽxũwa ga yema muxũma ga duũxũgũ ga yexguma moxẽ ínaxãxgu naxcèx ga yema pãũ.

<sup>24</sup> Rũ yexguma yema duũxũgũ nũxũ daugũgu ga guma nguewa na Ngechuchu rũ toma ga na tatauxexũma rũ yexma guma nguegũgu nichoũ na Ngechuchucèx yadaugũxũ Capernáũârũ íãnegu.

### *Ngechuchu nixĩ i pãũ i maxũ tũxna ãxũ*

<sup>25</sup> Rũ yexguma guma naxtaxaarũ tocutũwa nangugũgu ga yema duũxũgũ, rũ Ngechuchuxũ yexma nayangaugũ. Rũ nũxna nacagũe, rũ ñanagũrũgũ: —Pa Ngúexẽëruũx, ¿ñuxgu nixĩ i nuã cunguxũ? —ñanagũrũgũ.

<sup>26</sup> Rũ Ngechuchu nanangãxũ, rũ ñanagũrũ nũxũ: —Aixcũma pemaã nũxũ chixu rũ tama yema nũxũ na picuèxãchitanũxũcèx ga yema mexũgũ ga Tupanaarũ poramaa chaxũxũ nixĩ i chauxcèx pedaugũxũ. Natũrũ chauxcèx pedaugũ yerũ meãma pechibũe nawa ga yema õna ga pexna chaxãxũ.

<sup>27</sup> —¡Tãxũ i naxcèx pepuracũexũ i õna i paxama gũxũ! Rũ narũmemaẽ nixĩ i naxcèx pepuracũe i ngema maxũ i aixcũma ixĩxũ i taguma gũxũ. Rũ ngẽma nixĩ i maxũ i choma i Tupana Nane ya duũxũxũ chixĩcũ tá pexna chaxãxũ, erũ Chaunatu

ya Tupana rü marü nanangoxëẽ na aixcüma Nane chiĩxũ —ñanagürü.

28 Rü yexguma ga nümagü rü nüxna nacagü, rü ñanagürügü: —¿Tacü tá taxüe na tayanguxëẽxũcèx i ngëma Tupana toxũ naxwèxexũ? —ñanagürügü.

29 Rü Ngechuchu nanangãxũ rü ñanagürü nüxũ: —Rü Tupana rü núma choxũ namu. Rü ngëma nüma pexũ nanaxwèxexũ nixĩ na choxũ peyaxõgüxũ —ñanagürü.

30 Rü yexguma ga nümagü rü nüxna nacagü, rü ñanagürügü nüxũ: —¿Tacü rü cuèxruũxũ tá toxũ cudaduxëẽ na cuxũ tayaxõgüxũcèx na aixcüma Cristu quiĩxũ? ¿Rü tacü i to i mexũ tá toxcèx cuxũxũ i ñuxmax?

31 Yerü nuxcümaũgüxũ ga tórü oxigü, rü nanangõxgü ga yema pãũ ga Tupana nüxna ãxũ ga chianexũwa ga ngextá taxúema íxãpataxũwa. Rü Tupanaãrü ore i ümatüxũwa rü ñanagürü:

“Tupana rü daxũcũãx ga pãumaã nanachibüexëẽ ga duũxũgü”,

ñanagürü i ngëma orewa.

32 Rü Ngechuchu nanangãxũ rü ñanagürü nüxũ: —Aixcüma pemaã nüxũ chixu rü tama nixĩ ga Moĩché yiĩxũ ga nüxna naxãxũ ga yema pãũ ga daxũ- cũãx, natürü Chaunatü ga Tupana nixĩ ga nüxna naxãcü. Rü nüma nixĩ i ñuxma i pexna naxããxũ i pãũ i aixcüma ixĩxũ i daxũwa ne üxũ.

33 —Erü ngëma pãũ i Tupana ixãxũ, rü daxũguxũ i naãnewa ne naxũ rü nanamaxëxëẽ i ñoma i naãnecũãx i duũxũgü —ñanagürü.

34 Rü nümagü rü naxcèx ínacagü, rü ñanagürügü nüxũ: —Pa Corix, jguxũguma toxna naxãëcha i ngëma pãũ! —ñanagürügü.

35 Rŭ Ngechuchu ñanagŭrŭ nŭxŭ: –Choma nixŭ i ngĕma pãu i maxĕxĕĕruŭ chiixŭ. Rŭ yŭxema texĕ ya chauxŭtawa ũxĕ rŭ tagutãma tataiya. Rŭ texĕ ya choxŭ yaxŏxĕ rŭ tagutãma tiŭtawa.

36 –Natŭrŭ marŭ pemaã nŭxŭ chixu rŭ woo na choxŭ pedaugŭxŭ rŭ tama choxŭ peyaxŏgŭ i pemax.

37 –Rŭ guxãma ya yŭxema duŭxĕgŭ ya Chaunatŭ choxna tŭxŭ mugŭxe rŭ chorŭ duŭxŭgŭ tixŭgŭ. Rŭ texĕ ya choxŭ yaxŏgŭxe rŭ tãŭtãma tŭxŭ chaxoŭx.

38 –Yerŭ tama choxrŭtama ngŭchaŭ na chaxŭxŭcĕx nixŭ ga daxŭgŭxŭ ga naãnewa ne chaxŭxŭ. Natŭrŭ nŭma chaxŭ na chanaxŭxŭcĕx i norŭ ngŭchaŭ ya Chaunatŭ ya nŭma choxŭ mucŭ.

39 –Rŭ ngĕma norŭ ngŭchaŭ ya Chaunatŭ ya Tupana ya nŭma choxŭ mucŭ nixŭ i na taxŭexŭma ichayarŭtauxĕĕxŭ ya yŭxema choxna tŭxŭ namugŭxe. Erŭ nŭma ya Chaunatŭ nanaxwae na tŭxŭ yuwa ícharŭdagŭxĕĕxŭ i naãneãrŭ guxgu.

40 –Choma nixŭ i Tupana Nane chiixŭ. Rŭ ngĕma norŭ ngŭchaŭ ya Chaunatŭ ya Tupana ya nŭma choxŭ mucŭ nixŭ na tŭxŭ nangĕxmaxŭ i maxŭ i taguma gŭxŭ ya guxãma ya texĕ ya choxŭ daugŭxe rŭ choxŭ yaxŏgŭxe. Erŭ choma tá nixŭ i tŭxŭ ícharŭdagŭxĕĕxŭ i naãneãrŭ guxgu –ñanagŭrŭ.

41 Rŭ yexguma yema orexŭ naxŭnŭĕgu ga yema Yudŭgŭ, rŭ inanaxŭgŭe ga Ngechuchuchiga na yadexagŭxŭ. Yerŭ ñanagŭrŭ ga Ngechuchu: –Choma nixŭ i pãu i daxŭgŭxŭ i naãnewa ne chaxŭxŭ –ñanagŭrŭ.

42 Rŭ ñanagŭrŭgŭ: –¿Taux ĕxna ñaã yŭixŭ i Ngechuchu i Yŭche nane? Rŭ yixema rŭ tŭxŭ tacuĕx ya nanatŭ rŭ naĕ. ¿Rŭ ñuxãcŭ i nŭma i

“Daxŭwa ne naxŭxŭ”, ñaxŭ? —ñanagŭrŭgŭ.

43 Rŭ Ngechuchu ñanagŭrŭ nŭxŭ: —¡Nŭxŭ perŭxoe na choxŭ na pixuechaxŭ!

44 —Taxúema chauxŭtawa tangu ega tama choxna tŭxŭ namŭxgu ya chaunatu ga guma núma choxŭ mucŭ. Rŭ texé ya chauxŭtawa ngugŭxe rŭ choma rŭ tá wena tŭxŭ chamaxĕxĕ i nañeärŭ guxgu.

45 —Nuxcŭmaŭgŭxŭ ga Tupanaärŭ orearŭ uruŭgŭarŭ poperawa naxŭmatŭ i ore i ñaxŭ:

“Tupana tá guxãxŭ nangúexĕĕ”,

ñaxŭ. Rŭ ngĕmacĕx guxãma ya texé ya Chaunatuŭxŭ ĩnŭxĕ rŭ naxŭtawa ngŭxe, rŭ chauxŭtawa taxĭ.

46 —Taguma texé Chaunatu ya Tupanaxŭ tadau. Rŭ chaxicatama nixĭ i nŭxŭ chadauxŭ erŭ naxŭtawa ne chaxŭ.

47 —Aixcŭma pemaã nŭxŭ chixu rŭ texé ya choxŭ yaxŏxĕ rŭ tŭxŭ nangĕxma i maxŭ i taguma gŭxŭ.

48 —Choma nixĭ i pãŭ i maxĕxĕerŭŭ chiŭxŭ.

49 —Rŭ perŭ oxigŭ ga nuxcŭmaŭgŭxŭ rŭ nanangŏx ga yema pãŭ ga Tupana nŭxna ãxŭ ga yema nachica ga ngextá taxúema íxãpataxŭwa. Natŭrŭ woo nanangŏxgŭ ga yema pãŭ rŭ nayueamatama.

50 —Natŭrŭ ñaã pãŭ i pemaã nŭxŭ chixuxŭ i daxŭwa ne ŭxŭ rŭ chomatama chixĭ. Rŭ guxãma ya texé ya choxŭ yaxúxe ñoma pãŭ tangŏxŭrŭŭ rŭ tá tamaxĕcha.

51 —Chomatama nixĭ i pãŭ i maxĕxĕerŭŭ i daxŭwa ne chaxŭxŭ. Rŭ texé ya ñoma chomaã taxãwemŭxŭrŭŭ choxŭ yaxŏxĕ rŭ guxŭgutáma tamaxĕcha. Erŭ ngĕma pãŭ i choma tŭxna chaxãxŭ rŭ chaxunetama nixĭ. Rŭ ichanaxã i chaxune na namaxĕxŭcĕx i ñoma i nañecŭãx i duŭxŭgŭ —ñanagŭrŭ ga Ngechuchu.

52 Rů yexguma ga yema Yudíugů rů poragaãců nůgůna nacagůe, rů ñanagůrůgů: —¿Ñuxãců tá i ñãã yatů i naxůne tátama tůxů nangůxêxů? — ñanagůrůgů.

53 Rů Ngechuchu ñanagůrů nůxů: —Rů choma i Tupa na nane na duůxůxů chiůxů rů aixcůma pemaã nůxů chixu rů ngêxguma pema rů tama chaxunemaã pexãwemůgůgu rů tama nawa pexaxegůgu ya chaugů, rů tãůtãma pexů nangêxma i maxů i taguma gůxů.

54 —Texé ya chaxunemaã ãwemůxê rů chaugůwa axexe rů tůxů nangêxma i maxů i taguma gůxů. Erů choma rů tá tůxů chamaxêe ega naãneãrů guxgu.

55 —Erů chaxune rů ãnaxůchi nixů rů chaugů rů axexůxůchi nixů.

56 —Texé ya chaxunemaã ãwemůxê rů chaugůwa axexe rů chowa tayaxůx rů choma i tůmawa.

57 —Chaunatů ga núma choxů muců rů namaxů. Rů núma choxna nanaxã i maxů. Rů ngêxgumarůů ta i choma rů tá tůxna chanaxã i maxů ya yíxema choxů yaxúxe rů choxů yaxůxê.

58 —Marů pemaã nůxů chixu na choma rů pãů i daxůwa ne ůxů chiůxů. Natůrů choma rů tama yema pãů ga nuxcůmaůgůxů ga perů oxigů ngůxgůxů ga pãůrůů chixů. Yerů woo ga yema pãů na nangůxgůxů ga perů oxigů rů nayueamatama. Natůrů texé ya choxů yaxúxe, ñoma pãů tangůxůrůů, rů choxů yaxůxê rů guxůgutãma tamaxů —ñanagůrů.

59 Rů Ngechuchu rů duůxůgůmaã nůxů nixu ga yema ore ga yexguma nangůxêxůga ga Yudíugůarů ngutaquêxepataůwa ga ñãne ga

Capernáŭwa.

*Ngechucharü orewa nangẽxma i maxũ i taguma gúxũ*

<sup>60</sup> Rũ yexguma nüxũ naxĩnüẽgu ga yema nguxẽẽtae, rũ muxũma ga yema duũxũgũ ga nawe ruxĩxũ rũ ñanagürügũ: —Rũ ngẽma tamaã nüxũ yaxuxũ, rũ naguxchaxüchi na nüxũ icuáxũ na ñuxũ ñaxũ. ¿Ñuxãcü texé tüxũ natauxcha na naga taxĩnüxũ? —ñanagürügũ.

<sup>61</sup> Natürü ga Ngechuchu rũ nüxũ nacüexama ga yemaãcü nügümaã na íyadexagüxũ naxcèx ga yema nguxẽẽtae, rũ yemacèx nüxna naca, rũ ñanagürü: — ¿Éxna peãewa nangux i ngẽma ore?

<sup>62</sup> —Rũ ngẽxguma peãewa nanguxgu i ngẽma ore i pemaã nüxũ chixuxũ, rũ ¿tacügu chi perüxĩnüẽxũ ega choxũ pedèuxgu na wenaxãrũ daxũ na chaxĩxũ, ga noxri ne chaxũxüwa na chaxũxũ i choma i Tupana Nane na duũxũxũ chíixũ?

<sup>63</sup> —Tupanaãe i Üünexũ nixĩ i inaxãxũ i maxũ i taguma gúxũ. Rũ tama pexene nixĩ i pexũ maxẽẽẽxũ. Rũ ngẽma ore i pemaã nüxũ chixuxũ rũ peãècèx nixĩ, rũ nawa nangẽxma i maxũ i taguma gúxũ.

<sup>64</sup> —Natürü tangẽxma i petanüwa ya ñuxre ya tama yaxõgüxe —ñanagürü. Rũ yema ñanagürü ga Ngechuchu yerü noxriarü ügügumama marü nüxũ nacüex ga texé tá nüxũ na yaxõgüxũ, rũ texé tá cúãcü ínaxuaxũxũ.

<sup>65</sup> Rũ ñanagürü ta: —Rũ ngẽmacèx marü pemaã nüxũ chixu rũ taxuacüma texé chauxütawa tangu ega tama Chaunatü chauxütawa tüxũ gaxgu —ñanagürü.



<sup>66</sup> Rŭ yexguma inanaxŭgŭe ga nŭxna na yaxŭgŭxŭ ga muxŭma ga yema duŭxŭgŭ ga noxri nawe rŭxŭchirŭxŭ. Rŭ marŭ tama nawe ínaxŭxŭ.

<sup>67</sup> Rŭ yexguma ga Ngechuchu rŭ norŭ 12 ga ngŭexŭgŭna naca, rŭ ñanagŭrŭ nŭxŭ: —¿Éxna pema rŭ ta choxna pixŭgachitanŭchaŭ? —ñanagŭrŭ.

<sup>68</sup> Natŭrŭ Chimáŭ ga Pedru rŭ nanangāxŭ, rŭ ñanagŭrŭ: —Pa Corix, ¿Texŭtawa chi taxŭxŭ ega cuxna tixŭgachitanŭgu? Erŭ cuma rŭ cuxŭ nangŭxma i ore i nawa nangŭxmaxŭ i maxŭ i taguma gŭxŭ.

<sup>69</sup> —Toma rŭ marŭ cuxŭ tayaxŭgŭ, rŭ nŭxŭ tacuèx na cuma quiŭxŭ ya Cristu ya Ũnecŭ ya Tupana Nane —ñanagŭrŭ.

<sup>70</sup> Rŭ Ngechuchu toxŭ nangāxŭ, rŭ ñanagŭrŭ: —¿Taux éxna choma yŭxŭ ga pexŭ chidexechixŭ ga pema ga 12? Natŭrŭ nangŭxma i wŭxi i petanŭwa i Chatanáärŭ duŭxŭ ixŭxŭ —ñanagŭrŭ.

<sup>71</sup> Rŭ Yuda ga Icariúte ga Chimáŭ nanechiga nixŭ ga yadexaxŭ ga Ngechuchu. Yerŭ Yuda tá nixŭ ga cúácŭ ínaxuaxŭxŭ rŭ woo ga nŭma rŭ wŭxi ga totanŭxŭchirŭx na yŭxŭ.

## 7

### *Ngechuchueneĝŭ rŭ tama nŭxŭ nayaxŭgŭ*

<sup>1</sup> Rŭ yemawena ga Ngechuchu rŭ Gariréaanewa yexmagŭne ga íānegŭgu nixŭāgŭchigŭ. Rŭ tama Yudéaanewa nayexmachāŭ yerŭ yémacŭāx ga Yudŭgŭarŭ āĝxgacŭgŭ rŭ naxcèx nadaugŭ ga na yamèxgŭchaŭāxŭcèx.

<sup>2</sup> Natŭrŭ marŭ ningaica ga yema Yudŭgŭarŭ peta ga nagu norŭ dŭxenŭgŭ yaxŭgŭxŭ na

yemawa nüxna nacuèxãchiexücèx ga ñuxãcü nuxcümaügüxŭ ga norü oxigü na naxügüxŭ ga norü düxenügü ga naixátünaxcèx ga yexguma Moïchéwe naxixgu ga ngextá taxúema íxãpataxŭwa. Rŭ yemacèx nixĩ ga Düxenügüarü Petagu naxãegaxŭ.

<sup>3</sup> Rŭ naëneëgü ga Ngechuchu rŭ ñanagürügü nüxŭ: —Tama name i nuxã Gariréaarü nañegu curüxãŭx. Rŭ name nixĩ i petacèx Yudéawa cuxŭ, na ngëma duüxügü i cuwe rüxixŭ i ngëma ngëxmagüxŭ nüxŭ daugüxücèx i ngëma cuèxruügü i mexügü i Tupanaârü poramaã cuxüxŭ.

<sup>4</sup> —Erü ngëxguma chi wüxi ya yatü rŭ duüxügüxŭ nügü nacuèxëechaŭgu rŭ tama cúacü nanaxü i tacü i naxüxŭ. Rŭ ñuxma na cunaxüxŭ i muxüma i mexügü i Tupanaârü poramaã cuxüxŭ, rŭ name nixĩ i guxŭ i duüxügüpëxewa cunaxü —ñanagürügü.

<sup>5</sup> Rŭ yema ñanagürügü ga naëneëgü yerü woo ga nümagü rŭ ta tama nüxŭ nayaxögü.

<sup>6</sup> Rŭ yexguma ga Ngechuchu rŭ nanangãxŭ, rŭ ñanagürü nüxŭ: —Tauta nawa nangu i ngunexŭ na petawa chaxüxŭ. Natürü pexcèx rŭ ngëxürüxümare i ngunexŭ nixĩ i mexŭ na petawa nagu pexixŭ.

<sup>7</sup> —Ngëma duüxügü i ñoma i nañecŭãx rŭ tama pexchi naxaie. Natürü chauxchi naxaie erü chanangoxëë i ngëma naxügüxŭ rŭ na nachixexŭ.

<sup>8</sup> —Name nixĩ i petawa pexĩ i pemax. Choma rŭ tauta ngëma chaxü erü tauta nawa nangu i ngunexŭ i nagu ngëma chaxüxŭ —ñanagürü ga Ngechuchu.

<sup>9</sup> Rŭ yexguma yema ñaxguwena, rŭ Gariréaanegu

narüxãũx.

*Ngechuchu rü Düxenügiarü Petawa naxũ*

10 Natürü nawena ga naëneëgü ga petawa na naxĩxũ, rü Ngechuchu rü ta yéma naxũ. Natürü cúãcü yéma naxũ, rü tama poraãcü duũxügüxũ nügü nadauxẽẽ.

11 Rü yema Yudíugiäarü äëxgacügü rü naxcèx nadaugü ga yema petawa, rü ñanagürügü: —¿Ngextá nangëxma i ngëma yatü? —ñanagürügü.

12 Rü nügütanüwa ga yema duũxügü ga yéma yexmagüxũ, rü poraãcü Ngechuchuchiga índexagü. Rü ñuxre ga yema duũxügü rü ñanagürügü: —Yima rü wüxi ya yatü ya mecü nixĩ —ñanagürügü. Natürü ga togü rü ñanagürügü: —Ngëma yatü rü tama name erü duũxügüxũ nawomüxẽẽ —ñanagürügü.

13 Natürü taxuüma ga duũxügü rü mea togüpëxewa Ngechuchuxũ nicuèxüügüchaũ, yerü yema Yudíugiäarü äëxgacügüxũ namuüẽ.

14 Rü yexguma marü yema petaarü ngãxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxẽëtaexũ.

15 Rü yema Yudíugiäarü äëxgacügü, rü nãaixãchiãëgü namaã ga yema ore ga Ngechuchu nüxũ ixuxũ. Rü ñanagürügü: —¿Ñuxãcü i ngëmaãcü poraãcü nüxũ nacuáxũ, rü taguma texé nanguxẽẽ? —ñanagürügü.

16 Rü Ngechuchu nanangãxũ rü ñanagürü nüxũ: —Ñãã chorü nguxẽëtae rü tama choxrü nixĩ, erü Chaunatü ya núma choxũ mucüarü nixĩ.

17 —Ngëxguma texé naxüxchaŭgu i Tupanaärü ngúchaŭ rü yíxema tá nüxü tacuèx ngoxi aixcüma Tupanaxütawa chanayaxu i ngëma chorü nguxêetae rü êxna chaugxütawatama chayaxuxü yixí i ngëma.

18 —Yíxema texé ya mexü i tümachigaxütama ixuxe rü ngëmaâcü tanaxü erü tanaxwëxe i duüxügü na tüxü icuèxüügüxü. Natürü texé nüxü tixu i ore i mexü nachiga i ngëma tüxü muxü, rü aixcüma nixí i tümaärü ore. Rü tama dora nixí i ngëma nüxü tixuxü.

19 —¿Tama êxna aixcüma yíxü ga Moíché pexna naxâxü ga Tupanaärü mugü? Natürü taxúema i pema naga pexínüë i ngëma mugü. ¿Rü ñuxma rü tüxcüü nixí i choxü pimèxgüchaŭxü? —ñanagürü.

20 Rü yema duüxügü nanangâxügü, rü ñanagürügü: —Cuma rü ngoxo cuwa nangëxmamare. ¿Êxna texé cuxü timèxgüchaŭ? —ñanagürügü.

21 Natürü ga Ngechuchu rü ñanagürü nüxü: —Choma rü ngüxchigaarü ngunexügu chanamexëë ga wüxi ga yatü. Rü guxâma i pema rü penuãëgü naxcèx ga yema wüxitama ga mexü ga ngüxchigaarü ngunexügu chaxüxü.

22 —Natürü pema rü ta ngüxchigaarü ngunexügu pepuracüe na nagu pexíxüçèx ga Moíchéarü mugü. Rü Moíché pemaã nüxü nixu na tüxü ípewiechèxmüpêxechiraŭxü ya guxâma ya yatüxe ya buxe. Natürü tama Moíché nixí ga inaxügücü ga yema, yerü nuxcümaügüxü ga perü oxigüwa nixí ga ne naxüxü. Rü ñuxma i pema rü yema mugagu rü tüxü ípewiechèxmüpêxechiraŭ

ya guxãma ya buxe ya yatüxe woo ngüxchigaarü ngunexü yixĩgu.

23 —Rü ngẽmaãcü i pema rü ngüxchigaarü ngunexügu buxexü ípewiechẽxmüpẽxechiraũ erü naga pexĩnüẽchaũ i Moĩchẽarü mugü. ¿Rü ñuxma rü tüxcüũ yĩxü i chomaã penuẽxü naxcèx na ngüxchigaarü ngunexügu chanamexẽẽxü ga wüxi ga yatü ga idaaweecü?

24 —Rü ngẽmacèx tama name i ngürümare penangugü i ngẽma chaxüxü. Rü penaxwèxe i meã nagu perüxĩnüẽxira, na aixcüma meã penangugüxüçèx —ñanagürü ga Ngechuchu.

### *Ngechuchu rü Tupana Nane nixĩ*

25 Rü ñuxre ga yema duũxügü ga Yerucharẽügu ãchiũgüxü rü nüguna nacagüe, rü ñanagürügü: —¿Taux êxna daa yĩxü ya yima yatü ya ãẽxgacügü naxcèx daugücü na yamèxgüchaũãxüçèx?

26 —¡Düçèx! Gua nixĩ rü yéa guxü i duũxügüpẽxewa nidexa rü taxúema ñuxü ñatarügü nüxü. ¿Taux êxna i tórü ãẽxgacügü i marü nüxü yaxõgüãxü na aixcüma Cristu na yĩxü i nümax?

27 —Natürü i yixema rü nüxü tacuèxgü na ngextá ne naxüxü i nümax. Natürü ngẽxguma aixcüma Cristu núma üxgu rü taxúetáma nüxü tacuèx na ngextá na ne naxüxü —ñanagürügü.

28 Rü nüma ga Ngechuchu rü tupauca ga taxünewa ínanangúexẽẽ ga duũxügü. Rü yexguma nüxü naxĩnügu ga yema ore ga Yudíugü nüxü ixugüexü ga nachiga, rü tagaãcü ñanagürü: —Pema rü marü choxü pecuèx rü nüxü pecuèx na ngextá na ne chaxüxü. Natürü tama chaugagu nixĩ i núma chaxüxü. Choma núma chaxü yerü núma choxü

namu ga Tupana ya naxwèxecü na nüxŦ yaxõgüxŦ natürü i pema rü tama nüxŦ pecuácü.

29 —Choma rü nüxŦ chacuèx yerü naxŦtawa ne chaxŦ, rü nüma nixŦ i núma choxŦ namuxŦ —ñanagürü.

30 RŦ yexguma ga yema ãëxgacügü rŦ NgechuchuxŦ niyauxgüchaŦ. Natürü taxuŦma nayayauxgü, yerü tauta nawa nangu ga ngunexŦ ga na yayauxgüãxŦ rŦ na yamèxgüãxŦcèx.

31 Natürü muxŦma ga duŦxügü rŦ nüxŦ nayaxõgü. RŦ ñanagürügü: —¿Ngëxguma Ínanguxgu ya Cristu rŦ tacü rŦ cuèxruŦ i taxŦ tá naxü ya daa yatü tama üxŦ i ñuxmax? —ñanagürügü.

### *Parichéugü rŦ NgechuchuxŦ niyauxgüchaŦ*

32 RŦ yema Parichéugü rŦ duŦxügüxŦ naxŦnüe ga yemaácü Ngechuchuchiga na yadexagüxŦ. RŦ yemacèx ga nümagü rŦ paigüarü ãëxgacügü rŦ yéma nanamugü ga tupauca ga taxŦneärü purichíagü na NgechuchuxŦ yanayauxgüxŦcèx.

33 RŦ yexguma ga Ngechuchu rŦ ñanagürü nüxŦ: —Paxaãchi tátama nixŦ i petanüwa changëxmaxŦ, rŦ ñuxŦchi tá chataegu naxŦtawa ya yima núma choxŦ mucü.

34 —Pema rŦ tá chauxcèx pedaugü, natürü tãütáma choxŦ ipeyangaugü. Erü ngëma ngextá tá íchangëxmaxŦwa rŦ taxuacü ngema pengügü.

35 RŦ yexguma ga yema Yudíugüarü ãëxgacügü rŦ nügüna nacagüe, rŦ ñanagürügü: —¿Ngextá tá naxŦ ega taxuacütáma nüxŦ iyarüngaugügu? ¿Éxna ngëma Yudíugü i to i nachíüãnewa ngëxmagüxŦtanüwa tá naxŦ rŦ éxna ngëma

tama Yudíugü ixĩgüxũtanüwa tá naxũ na yangúexẽãxũcèx?

<sup>36</sup> —¿Rü tacüchiga nixĩ i ngẽma na ngẽma ñaxũ:

“Tá chauxcèx pedaugü natürü tãütáma choxũ ipeyangaugü, erü taxuacütáma ngẽma pexĩ i ngẽma tá íchangẽxmaxũwa”, ñaxũ? —ñanagürügü.

### *Dexá i maxẽẽruũchiga nidexa ga Ngechuchu*

<sup>37</sup> Rü yema nawa iyacuáxũ ga petaarü ngunexũ nixĩ ga guxũ ga togü ga ngunexũãrü yexera rümemaẽxũ naxcèx ga Yudíugü. Rü yema ngunexũgu nixĩ ga inachixũ ga Ngechuchu rü tagaãcü ñaxũ: —Rü ngẽxguma texé itawaxgu rü jnuã chauxütawa taxũ rü tayaxaxe!

<sup>38</sup> —Rü “texé ya choxũ yaxõxẽ rü tümaãrü maxũnewa tá nibaibe i taxũ i dexá i maxẽẽruũ” ngẽma Tupanaãrü ore i ümatüxũ nüxũ ixuxũrũ —ñanagürü.

<sup>39</sup> Rü yexguma yema ñaxgu ga Ngechuchu rü Tupanaãẽ i Üünexũchiga nixĩ ga yadexaxũ. Rü nüxũ nixu ga guxũma ga yema nüxũ yaxõgüxũ rü tá na nayauxgüãxũ i Naãẽ i Üünexũ. Natürü tama yexgumatama nanayauxgü, yerü tauta wenaxãrü daxũguxũ ga naãnecèx nataegu ga Ngechuchu na guxũãrü ãẽxgacü na yĩxũcèx.

### *Ngechuchugagu nügü nitoye ga duũxũgü*

<sup>40</sup> Rü nümaxũ ga yema duũxũgü rü yexguma nüxũ naxĩnũẽgu ga yema Ngechuchu nüxũ ixuxũ, rü ñanagürügü: —Aixcüma ñaã yatü nixĩ i ngẽma Tupanaãrü orearü uruũ i ínguxchaũxũ —ñanagürügü.

41 Rŭ togŭ rŭ ñanagŭrŭgŭ: –Daa nixĩ ya Cristu –ñanagŭrŭgŭ. Natŭrŭ togŭ rŭ ñanagŭrŭgŭ: –Tama nixĩ, erŭ taxucŭrŭwa Gariréaanecŭãx nixĩ ya Cristu.

42 –Erŭ Tupanaärŭ ore i ũmatŭxŭwa rŭ ñanagŭrŭ:

“Cristu rŭ tá Dabítaa nixĩ, rŭ tá nangox i ñãne i Beréŭwa ga ngextá Dabí íbuxŭwa”, ñanagŭrŭgŭ.

43 Rŭ yemaãcŭ Ngechuchugagu nŭgŭ nitoye ga duŭxŭgŭ.

44 Rŭ ñuxre ga yema duŭxŭgŭ rŭ Ngechuchuxŭ niyauxgŭchaŭ, natŭrŭ taxuŭma nayayauxgŭ.

*Yudŭgŭarŭ ãëxgacŭgŭ rŭ tama Ngechuchuaxŭ nayaxŭgŭchaŭ*

45 Rŭ yema tupauca ga taxŭneärŭ purichíagŭ, rŭ Parichéugŭcèx rŭ paigŭarŭ ãëxgacŭgŭcèx na-woegu. Rŭ yema ãëxgacŭgŭ rŭ nŭxna nacagŭ, rŭ ñanagŭrŭgŭ: –¿Tŭxcŭŭ tama nuã penaga? –ñanagŭrŭgŭ.

46 Rŭ yema purichíagŭ rŭ nanangãxŭgŭ rŭ ñanagŭrŭgŭ: –Taguma texé tidexa i ñãã yatŭ idexaxŭrŭŭ –ñanagŭrŭgŭ.

47 Rŭ yexguma ga Parichéugŭ rŭ ñanagŭrŭgŭ nŭxŭ: –¿Éxna pexŭ rŭ ta marŭ nawomŭxëë i nŭmax?

48 –Dŭcèx, rŭ taxúema i tomox i Parichéugŭ rŭ taxuŭma i tórŭ ãëxgacŭgŭ rŭ nŭxŭ nayaxŭgŭ i ngëma Ngechuchu.

49 –Natŭrŭ ñãã duŭxŭgŭ i tama Tupanaärŭ mugŭxŭ cuèxgŭxŭ rŭ marŭ nachixexŭgugŭ –ñanagŭrŭgŭ.



50 Natürü Nicodému ga Parichéu ixïcü ga wüxicana Ngechuchuxŭtagu naxŭãñecü, rü ñanagürü nüxŭ:

51 —Ngēma tórü mugü i ümatüxŭwa rü ñanagürü:

“Taxuacüma wüxi i yatüxŭ tapoxcu ega tama nüxŭ ixĩnüëxĩragu i norü dexa na nüxŭ icuáxŭcèx na ñacü na naxŭxŭ”, ñanagürü.

52 Rü yexguma ga natanüxŭgü rü nanangãxŭgü, rü ñanagürügü nüxŭ: —¿Éxna cuma rü ta Gariréaanecŭãx quixĩ? ¡Nawa nangux i Tupanaärü ore i ümatüxŭ rü ngēma tá nüxŭ cudau rü taxuŭtáma i Tupanaärü orearü uruŭ rü Gariréaanecŭãx nixĩ! —ñanagürügü.

53 Rü yexguma ga wüxichigü rü nachiŭwa naxĩ.

## 8

### *Nge ga átecü ga naĩ ga yatümaã ngēãëxcü*

1 Rü Ngechuchu rü Oríbunecügu äegane ga mèxpŭnewa naxŭ.

2 Rü moxŭãcü ga yexguma yangunegu, rü we-naxärü tupauca ga taxŭñecèx nataegu. Rü ga duŭxŭgü rü naxcèx naxĩ. Rü nüma ga Ngechuchu rü inarŭto, rü inanaxŭgü ga na nangúexëëãxŭ ga duŭxŭgü.

3 Rü yema ngúexëëruŭgü ga Moĩchearü mugüwa nguxëëtaegüxŭ rü Parichéugü, rü Ngechuchuxŭtawa ngixŭ nagagü ga wüxi ga nge ga átecü ga ngixŭ nadaugücü ga naĩ ga yatümaã na inapexŭ. Rü guxŭma ga yema duŭxŭgü ga yéma yexmagüxŭpèxegu ngixŭ nayachixëëgü.

4 RŦ űanagŦrŦgŦ NgechuchuxŦ: –Pa NgŦexēēruŦx, űaã nge i ātecŦ rŦ ngŦxŦ itayangau na naŦ ya yatŦmaã na inapexŦ.

5 MoŦchēarŦ mugŦwa tamaã nŦxŦ nixu na nutamaã ngŦxŦ íimuxŦchiācŦma ngŦxŦ imáxŦ i wŦxi i nge i ngēmaācŦ maxŦcŦ. ¿NŦuxŦ űacuxŦ i cuma i űuxmax? –űanagŦrŦgŦ.

6 RŦ yema űanagŦrŦgŦ ga nŦmagŦ, yerŦ NgechuchuxŦ guxchaxŦgu nanguxēēgŦchaŦ na nŦxŦ nayexmaxŦcēx ga űacŦcēx na ínaxuaxŦgŦāxŦ. NatŦrŦ ga Ngechuchu rŦ inayarŦmaxāchi rŦ inanaxŦgŦ ga naxmēxmaã waixŦmŦwa na naxŦmatŦāxŦ.

7 NatŦrŦ nŦxŦ nacēxŦgŦama, rŦ yemacēx dŦxwa wenaxārŦ nadaunagŦ ga Ngechuchu, rŦ űanagŦrŦ nŦxŦ: –NgexerŦxe i petanŦwa ya ngearŦ pecaduāxē rŦ tŦxira nuta ngŦxŦ tanaűa –űanagŦrŦ.

8 RŦ wenaxārŦ inayarŦmaxāchi ga Ngechuchu rŦ naxmēxmaã nanaxŦmatŦ ga waixŦmŦwa.

9 NatŦrŦ yexguma nŦxŦ naxŦnŦēgu ga yema ore ga ParichēugŦ rŦ inanaxŦgŦe ga nŦgŦ na yawŦxŦxŦ ga nŦgŦwe na ínachoxŦxŦ. RŦ yaguāxgŦ ga ParichēugŦwa inaxŦgŦ ga na ínachoxŦxŦ rŦ dŦxwa guxŦma ínachoxŦ. RŦ yexguma marŦ guxŦma ga ParichēugŦ íchoŦxgu, rŦ Ngechuchu rŦ yema ngecŦxicatama yēma duŦxŦgŦpēxewa nayaxŦgŦ.

10 RŦ yexguma ga Ngechuchu rŦ wena nadaunagŦ. RŦ ngŦxna naca rŦ űanagŦrŦ ngŦxŦ: –Pa NgecŦx, ¿NgēxŦgŦ nixŦ i ngēma cuxŦ ixugŦexŦ? ¿RŦ taxuŦma cuxŦ imáxchaŦ? –űanagŦrŦ.

11 RŦ ngŦma rŦ ngŦgŦrŦgŦ nŦxŦ: –TaxuŦma Pa

Corix –ngĩgürügü. Rũ yexguma ga Ngechuchu rũ ñanagürũ ngĩxũ: –Choma rũ ta tama cuxũ chapoxcu. Ñuxma rũ marũ name rũ íquixũ rũ tama wena pecadu cuxũ –ñanagürũ.

*Ngechuchu rũ ñoma i naãneãrũ ngóonex- eẽruũ nixĩ*

<sup>12</sup> Rũ wenaxãrũ duũxũgũmaã nidexa ga Ngechuchu, rũ ñanagürũ nüxũ: –Choma nixĩ i ñoma i naãnecũãxãrũ ngóonexeẽruũ. Rũ yixema chowe ruxũxẽ rũ chorũ ngóonexũwa tangẽxma rũ tũxna chanaxã i maxũ. Rũ tá nüxna ítanguxuchi i tũmaãrũ chixexũ –ñanagürũ.

<sup>13</sup> Rũ yexguma ga Parichéugü rũ ñanagürügü nüxũ: –Cuma rũ cugũchigaxũtama quixu. Rũ ngẽma cuchiga i nüxũ quixuxũ rũ taxuwama name –ñanagürügü.

<sup>14</sup> Rũ Ngechuchu nanangãxũ rũ ñanagürũ nüxũ: –Rũ ngẽma ore i chauchiga nüxũ chixuxũ rũ aixcũma nixĩ woo chomatama yixĩgu i namaã chaugüétüwa chidexaxũ. Erũ choma rũ nüxũ chachuèx i ngextá ne chaxũxũ, rũ ngextá tá chaxũxũ. Natürũ pema rũ tama nüxũ pecuèx na ngextá ne chaxũxũ rũ tama nüxũ pecuèx na ngextá tá chaxũxũ.

<sup>15</sup> Pema rũ choxũ pengugü i ñoma i naãnecũãx i duũxũgü nagu ruxĩnüèxũãcũmamare. Natürũ i choma rũ taxúexũma changugü.

<sup>16</sup> Natürũ ngẽxguma chi texéxũ changugügu rũ aixcũma meãma tũxũ changugü. Erũ tama chaxicatama tũxũ changugü, natürũ yima Chaunatü ga núma choxũ mucũmaã nixĩ i wũxigu tũxũ tangugũxũ.

17 Rŭ ngẽma mugŭ ga Moĩché ũmatũxŭ i nagu pexĩxŭ, rŭ ñanagŭrŭ:

“Ngẽxguma taxre i duũxŭgŭ rŭ wŭxitama i orexŭ yaxugŭgu, rŭ ngẽmawa aẽxgacŭ nŭxŭ nacuèx na aixcŭma yĩxŭ i ngẽma nŭxŭ yaxugŭexŭ”, ñanagŭrŭ.

18 Rŭ dŭcax, choma nixĩ i wŭxi i chauchigaxŭ chixuxŭ rŭ Chaunatŭ ga nŭma choxŭ mucŭ nixĩ ya naĩ. ¿Rŭ tũxcŭũ tama choxŭ peyaxŭgŭchaũ i ñŭxmax? –ñanagŭrŭ.

19 Rŭ yexguma ga nŭmagŭ rŭ nŭxna nacagŭe rŭ ñanagŭrŭgŭ: –¿Ngexcŭ ya yima Cunatŭ? – ñanagŭrŭgŭ. Rŭ Ngechuchu nanangãxŭ rŭ ñanagŭrŭ: –Choxŭ rŭ tama pecuèx rŭ Chaunatũxŭ rŭ ta tama pecuèx. Rŭ ngẽxguma chi choxŭ pecuèxgŭgu rŭ Chaunatũxŭ rŭ chi ta pecuèxgŭ –ñanagŭrŭ.

20 Rŭ yema orexŭ nixu ga Ngechuchu ga yexguma nanguxẽẽtaegu ga tupauca ga taxũnewa naxũtawa ga yema nachica ga ngextá duũxŭgŭ tupaucana dĩẽru ngĩxŭ íxãgũxŭwa. Natŭrŭ taxuũma Ngechuchuxŭ niyauxgŭ, yerŭ tauta nawa nangu ga yema ngunexŭ ga nagu yayauxgũãxŭ.

*Ngechuchu rŭ Parichéugũmaã nŭxŭ nixu rŭ ngextá nŭma ínaxũxŭwa rŭ taxucŭrŭwa ngema naxĩ*

21 Rŭ Ngechuchu rŭ wenaxãrŭ namaã nŭxŭ nixu, rŭ ñanagŭrŭ: –Choma rŭ tá pexna chixŭ i nŭma, rŭ pema rŭ tá chauxcèx pedaugŭ, natŭrŭ tá perŭ pecadugu peyue. Rŭ ngextá íchaxũxŭwa rŭ taxucŭrŭwama ngema pexĩ –ñanagŭrŭ.

22 Rŭ yexguma ga yema Yudíugŭ rŭ ñanagŭrŭgŭ: –¿Éxna nŭgŭ tátama nimèx rŭ ngẽmacèx tamaã

nüxŭ yaxuxŭ na taxucürüwama ngema ixixŭ i ngẽma ínaxŭxŭwa? —ñanagürügü.

23 Rŭ Ngechuchu ñanagürü nüxŭ: —Pema rŭ ñoma i naãnecŭâx i duŭxŭgŭ pixĩgŭ, natürü i choma rŭ daxŭguxŭ i naãnewa ne chaxŭ. Pema rŭ ñoma i naãneärü duŭxŭgŭ pixĩgŭ natürü i choma rŭ tama ñoma i naãnecŭâx chixĩ.

24 —Rŭ ngẽmacèx pemaã nüxŭ chixu rŭ tá perü pepadugu peyue. Erü ngẽxguma tama choxŭ peyaxõgügu na choma chiixŭ ya Cristu, rŭ perü pepadugu tá peyue —ñanagürü.

25 Rŭ yexguma nüxna nacagüe, rŭ ñanagürügü: —¿Natürü texé quixĩ i cumax? —ñanagürügü. Rŭ Ngechuchu nanangãxŭ, rŭ ñanagürü: —Marü noxritama pemaã nüxŭ chixu na texé chiixŭ.

26 —Rŭ choma rŭ choxŭ nangẽxma i muxŭma i tacü i chomatama pexŭ changúexẽchaŭxŭ rŭ tacücèx pexna na chaçaxŭ, natürü tãütama chanaxü i ngẽma. Erü yima Chaunatü ga núma choxŭ mucü chomaã nüxŭ ixuxŭ i orexicatama nixĩ i ñoma i naãnecŭâxgümaã nüxŭ chixuxŭ. Rŭ guxŭma i ngẽma nüxŭ yaxuxŭ ya Chaunatü, rŭ aixcüma nixĩ —ñanagürü.

27 Natürü nümagü rŭ tama nüxŭ nacuèxgüéga ga Nanatü ya Tupanachiga na yiixŭ na yema ñaxŭ ga Ngechuchu.

28 Rŭ yemacèx ga Ngechuchu rŭ ñanagürü nüxŭ: —Choma nixĩ i Tupana Nane i duŭxŭxŭ chiixŭ. Rŭ yixcüra ngẽxguma curuchawa choxŭ pipotagügu, rŭ tá nüxŭ picuèxãchitanü na Cristu na chiixŭ. Rŭ tá nüxŭ pecuèx na taxuŭma chauechamatama chaxŭxŭ. Rŭ ngẽma Chaunatü chomaã nüxŭ ixuxŭxĩcatama nixĩ i pemaã nüxŭ chixuxŭ.

29 –Yima núma choxŦ mucü ya Chaunatü rü chauxŦtawa nangëxma. Rü taguma choxna nixŦgachi, erü choma rü guxŦguma chanaxü i ngëma norü ngúchaŦ ixŦxŦ –ñanagürü.

30 Rü yexguma yema ñaxgu ga Ngechuchu rü muxŦma ga duŦxŦgü nüxŦ nayaxŦgü.

*YŦxema TupanaxãcŦgü ixŦgüxechiga, rü yŦxema pecadutüŦwa ngëxmagüxechiga*

31 Rü yexguma ga Ngechuchu rü ñanagürü nüxŦ ga yema YudŦgüarü ãëxgacŦgü ga nüxŦ yaxŦgüxŦ: –Ngëxguma pema meãma peyaxŦgüechagu i ngëma pemaã nüxŦ chixuxŦ, rü aixcŦmaxŦchi tá chorü ngúexŦgü pixŦgü.

32 –Rü tá nüxŦ pecuèx i ore i aixcŦma ixŦxŦ. Rü ngëma ore tá pexŦ ínanguxŦxëë –ñanagürü.

33 Rü nümagü rü NgechuchuxŦ nangãxŦgü, rü ñanagürügü: –Toma rü nuxcŦmaŦcü ga torü oxŦ ga AbráŦtaa tixŦgü rü taguma texémëxëwa tangëxmagü. ¿Ñuxãcü i cumax rü tá na ítanguxŦxŦ, ñacuxŦ? –ñanagürügü.

34 Rü Ngechuchu ñanagürü nüxŦ: –AixcŦma pemaã nüxŦ chixu rü guxãma ya pecaduãxë rü pecadutüŦwa tangëxmagü.

35 –Wüxi i coriarü duŦxŦmare rü tama norü coripatacŦãx nixŦ. Natürü wüxi i cori nane rü guxŦguma nanatü nane nixŦ.

36 –Choma rü Tupana Nane chixŦ. Rü ngëxguma chi choma pecaduna pexŦ íchanguŦxëëgu, rü aixcŦma tá nüxna ípenguŦ.

37 –Marü nüxŦ chacuèx na AbráŦtaa pixŦgüxŦ i pemax. Natürü choxŦ pimëxgüchaŦ erü tama

aixcūma choxŭ peyaxōgŭ i ngēma ore i pemaã nŭxŭ chixuxŭ.

<sup>38</sup> —Choma rŭ yema Chaunatŭ choxŭ wéxŭ nixŭ i pemaã nŭxŭ chixuxŭ. Natŭrŭ pema rŭ penaxŭ i ngēma penatŭ pemaã nŭxŭ ixuxŭ —ñanagŭrŭ ga Ngechuchu.

<sup>39</sup> Rŭ nŭmagŭ rŭ Ngechuchuxŭ nangãxŭ rŭ ñanagŭrŭgŭ: —Torŭ ōxi nixŭ ga Abráŭ — ñanagŭrŭgŭ. Natŭrŭ Ngechuchu nanangãxŭ rŭ ñanagŭrŭ nŭxŭ: —Ngēxguma chi aixcūma Abráŭtaa pixŭgŭgu rŭ chi Abráŭ ŭxŭrŭŭ penaxŭ.

<sup>40</sup> —Natŭrŭ woo pemaã nŭxŭ chixu i ore i aixcūma ixŭxŭ ga Chaunatŭ ga Tupana choxŭ ngŭxēxŭ, rŭ pema rŭ choxŭ pimèxgŭchaŭ. Natŭrŭ ga Abráŭ rŭ taguma yemaãcŭ nanaxŭ.

<sup>41</sup> —Pema rŭ penaxŭ i penatŭgŭcŭmatama — ñanagŭrŭ. Rŭ yexguma ga nŭmagŭ rŭ ñanagŭrŭgŭ: —Toma rŭ tama tangŭrŭwaŭgŭmare, rŭ toxŭ nangēxma ya wŭxitama ya tonatŭ. Rŭ yima nixŭ ya Tupana —ñanagŭrŭgŭ.

<sup>42</sup> Rŭ Ngechuchu nanangãxŭ, rŭ ñanagŭrŭ nŭxŭ: —Ngēxguma chi aixcūma Tupana yixŭgu ya penatŭ rŭ choxŭ chi pengechaŭ, erŭ choma rŭ Tupanaxŭtawa nixŭ i ne chaxŭxŭ, rŭ ngēmacèx chanuxma. Rŭ tama chauechamatama nŭma chaxŭ, natŭrŭ nŭma chaxŭ yerŭ Chaunatŭ ya Tupana nŭma choxŭ namu.

<sup>43</sup> —¿Tŭxcŭŭ tama nŭxŭ pecuèxéga i ngēma pemaã nŭxŭ chixuxŭ? Pexŭ naguxcha erŭ woetama tama iperŭxŭñŭēchaŭ i ngēma pemaã nŭxŭ chixuxŭ i ore.

<sup>44</sup> —Penatŭ rŭ Chataná nixŭ rŭ pema rŭ naxãcŭgŭ pixŭgŭ. Rŭ ngēmacèx penaxŭ i ngēma

nüma pexũ nanaxwèxexũ. Rũ ngẽma Chataná rũ noxriarũ ügügumama wüxi i máétaxũ nixĩ. Rũ taguma ore i aixcũmaxũgu narũxĩnũ rũ taguma ore i aixcũmaxũ nixu. Rũ ngẽxguma yadeaxgu rũ doraxũxĩcatama nixu, erũ nüma rũ wüxi i doratèxáxũ nixĩ. Rũ guxũma i doratèxáxũnatũ nixĩ.

<sup>45</sup> —Natürũ i pema rũ tama choxũ peyaxõgũchaũ erũ ore i aixcũmaxũ chixu.

<sup>46</sup> —¿Texé ya petanüwa choxũ dauxe na pecadu chaxũxũ? Rũ ñuxma na nüxũ chixuxũ i ore i aixcũma ixĩxũ, rũ ¿tüxcüũ tama choxũ peyaxõgũ?

<sup>47</sup> —Texé ya Tupanaãrũ duũxũ ixĩxẽ rũ itarũxĩnũ i Tupanaãrũ ore. Natürũ i pema rũ tama Tupanaãrũ duũxũgũ pixĩgũ, rũ ngẽmacèx nixĩ i tama iperũxĩnũèchaũxũ i Tupanaãrũ ore —ñanagürũ.

### *Tauta nangõxgu ga Abráũ rũ Cristu rũ marũ nayexma*

<sup>48</sup> Rũ yexguma ga yema Yudíugüarũ ãëxgacügü rũ ñanagürügü nüxũ: —Rũ aixcũma nixĩ ga yema torũ ore ga yexguma ñatagügügu:

“Cuma rũ wüxi i Chamáriacũãx quixĩ, rũ ngoxo cuwa nangèxma”, ñatagügügu —ñanagürügü.

<sup>49</sup> Rũ Ngechuchu nanangãxũ, rũ ñanagürũ nüxũ: —Chowa rũ nataxuma i ngoxo. Rũ ngẽma chaxũxũ nixĩ na Chaunatũxũ chicuèxüũxũ, natürũ i pema rũ chixri chauchiga pidexagü.

<sup>50</sup> —Choma rũ tama naxcèx chadau na texé choxũ icuèxüügüxücèx. Natürũ Tupana nixĩ ya naxwèxecü na duũxũgũ choxũ icuèxüügüxũ. Rũ nüma tá nanapoxcue i ngẽma chauxchi aiexũ.



51 –Aixcüma pemaã nüxü chixu, rü texé ya naga ñnüxê i ngêma tümamaã nüxü chixuxü rü guxügutáma tamaxêcha –ñanagürü.

52 Rü yexguma ga yema Yudíugüarü âëxgacügü, rü Ngechuchuxü nangãxügü, rü ñanagürügü: –Ñuxma rü meãxüchima nüxü tacuèx na cuwa nangëxmaxü i wüxi i ngoxo. Yerü ga AbráŮ rü guxüma ga nuxcümaügüxü ga Tupanaärü orearü uruügü rü nayue. Natürü cuma rü ñuxma tomaã nüxü quixu rü texé ya naga ñnüxê i ngêma curü ore rü guxügutáma tamaxêcha –ñacurügü.

53 –¿Éxna cuma rü tórü oxí ga AbráŮärü yexera quixí? Yerü nüma rü nayu rü guxüma ga nuxcümaügüxü ga Tupanaärü orearü uruügü rü ta nayue. ¿Rü cugücèx rü texé quixí? –ñanagürügü.

54 Rü Ngechuchu nanangãxü, rü ñanagürü nüxü: –Ega chaugü chitama chicuèxüügu rü ngêma rü taxuwama name. Natürü yima choxü icuèxüücü rü Chaunatü nixí. Rü yima Chaunatütama nixí ya perü Tupana ixícü –ñapegücü nüxü.

55 –Natürü i pema rü tama aixcüma nüxü pecuèx ya Chaunatü ya Tupana. Natürü i choma rü ngêmaãcü nüxü chacuèx. Rü ngëxguma chí:

“Tama nüxü chacuèx”, ñachaxgu, rü pexrüü chí wüxi i doratèxáxü chixí. Natürü i choma rü aixcümaxüchima nüxü chacuèx ya Chaunatü ya Tupana, rü naga chaxñü i guxüma i norü ore i chomaã nüxü yaxuxü.

56 –Perü oxí ga AbráŮ rü nataãë yerü aixcüma nayaxõ rü tá na íchanguxü i ñoma i naãnewa. Rü yemaxü nacuèx rü yemacèx nataãë –ñanagürü ga Ngechuchu.

<sup>57</sup> Rŭ yexguma ga yema Yudíugŭarŭ ãêxgacŭgŭ rŭ Ngechuchuxŭ nangãxŭgŭ, rŭ ñanagŭrŭgŭ: —Cuma rŭ tauta 50 ya taunecŭ cuxŭ nangêxma. ¿Ñuxãcŭ Abráŭxŭ cudau ga tauta cungoxgux ga yexguma? —ñanagŭrŭgŭ.

<sup>58</sup> Rŭ Ngechuchu nanangãxŭ rŭ ñanagŭrŭ nŭxŭ: —Aixcŭma pemaã nŭxŭ chixu rŭ tauta Abráŭ ngoxgu rŭ choma rŭ marŭ chayexma —ñanagŭrŭ.

<sup>59</sup> Rŭ yexguma ga nŭmagŭ rŭ nutane nanayauxgŭ na gumamaã ínamuxŭchigŭãxŭcèx. Natŭrŭ ga Ngechuchu rŭ naxchaxwa inicux. Rŭ yemaãcŭ ínaxŭxŭ nawa ga guma tupauca ga taxŭne.

## 9

### *Ngechuchu nanamexêê ga wŭxi ga yatŭ ga norŭ bucŭma ngexetŭcŭ*

<sup>1</sup> Rŭ yexguma namagu tomaã yaxŭxgu ga Ngechuchu, rŭ yéma nŭxŭ nadau ga wŭxi ga yatŭ ga woetama norŭ bucŭma ngexetŭcŭ.

<sup>2</sup> Rŭ toma ga norŭ ngúexŭgŭ rŭ nŭxna tacagŭ, rŭ ñatarŭgŭgŭ: —Pa Ngúexêêruŭx, ¿Tŭxcŭŭ ngexetŭcŭma nabu ya daa yatŭ? ¿Éxna nanatŭ rŭ naêârŭ pecadugagu rŭ êxna norŭ pecadugagutama? —ñatarŭgŭgŭ.

<sup>3</sup> Rŭ Ngechuchu toxŭ nangãxŭ, rŭ ñanagŭrŭ toxŭ: —Tama norŭ pecadugagu rŭ tama i nanatŭ rŭ naêârŭ pecadugagu nixŭ i ngêmaãcŭ nabuxŭ. Natŭrŭ ngêmaãcŭ nabu na nawa nŭxŭ pedauxcèx na ñuxãcŭ Tupana tŭxŭ na rŭmexêêxŭ.

4 –Rü ñoma rü ta nangune rü name nixĩ na paxama na naxüxũ i ngẽma puracü ya Chaunatü ga núma choxũ mucü tüxna ãxũ. Erü paxa tá nachüta rü ngẽxguma rü taxucürüwama texé tá tapuracü.

5 –Rü ñuxma na ñoma i naãnewa changẽxmaxũ rü ñoma i naãneärü ngóonexẽẽruũ chixĩ –ñanagürü.

6 Rü yexguma yema ñaxguwena rü Ngechuchu waixũmüãnewa nacuaxi. Rü yema waixũmü ga iwaixũmaã nanachaxetü ga guma yatü ga ngexetücü.

7 Rü yexguma guma ngexetücüxũ ñanagürü: – ¡Dexámaã cugü yayauxetü i Chiruérü puchuwa! –ñanagürü. Rü ngẽma naega rü “Tüxũ muxũ”, ñaxũchiga nixĩ. Rü yéma naxü ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü.

8 Rü yexguma ga yema duũxügü ga guma ngexetücüpataarü ngaicamagu pegüxũ rü yema duũxügü ga ũpaacü nüxũ daugüxũ ga na nangexetüxũ, rü ñanagürügü: –¿Taux éxna i ñaã yĩxũ ga yema yatü ga ngexetüchiréxũ ga duũxügüxũ dīērucèx cèèxüxũ? –ñanagürügü.

9 Rü nümaxũ rü ñanagürügü: –Ngẽmáãcü nüma nixĩ –ñanagürügü. Rü togü rü ñanagürügü: –Tama nixĩ i yima yĩxũ, natürü nanangẽxgumaraũxũchi –ñanagürügü. Natürü nümatama ga guma yatü ga ngexetüchirécü, rü ñanagürü: –Ngẽmáãcü choma chixĩ –ñanagürü.

10 Rü yexguma ga yema duũxügü rü nüxna nacagü rü ñanagürügü: –¿Rü ñuxãcü nixĩ i marü quidauchixũ i ñuxmax? –ñanagürügü.

11 Rü nüma nanangãxũ rü ñanagürü: –Yima yatü

ya Ngechuchugu ãegacü rü yima waixŭmüãnewa nacuaxi. Rü yema waixŭmü ga iwaixŭmaã choxŭ nachaxetü. Rü ñanagŭrŭ choxŭ:

“¡Yéa Chiruéarü puchuwa naxŭ rü ngema dexámaã cugŭ yayauxetü!” ñanagŭrŭ choxŭ. Rü yéma chaxŭ, rü yexguma dexámaã chaugŭ chayauxetügu rü chidauchi —ñanagŭrŭ ga guma yatü.

<sup>12</sup> Rü yexguma nüxna nacagŭe, rü ñanagŭrŭgŭ: —¿Ngextá nangëxmaxŭ i ñuxma ya yima yatü ya cuxŭ rümexëëcü? —ñanagŭrŭgŭ. Rü nüma ga guma yatü ga ngexetüchirécü rü ñanagŭrŭ: —Tama nüxŭ chacuëx —ñanagŭrŭ.

*Parichéugŭ rü guma ngexetücü ga Ngechuchu namexëëcüna nacagŭe*

<sup>13-14</sup> Natŭrŭ yema ngunexŭ ga Ngechuchu nagu namexëëxŭ ga guma ngexetücü, rü ngŭxchigaarŭ ngunexŭ nixŭ. Rü yemacèx ga duŭxŭgŭ rü Parichéugŭxŭtawa nanagagŭ ga guma yatü ga ngexetüchirécü.

<sup>15</sup> Rü yexguma ga yema Parichéugŭ rü nüxna nacagŭe ga guma yatü, rü ñanagŭrŭgŭ: —¿Ñuxãcü i marü curümexëtŭxŭ i ñuxmax? —ñanagŭrŭgŭ. Rü nüma nanangãxŭ rü ñanagŭrŭ: —Waixŭmü ga naxbüxágŭmaã yawaixëëxŭmaã choxŭ nachaxetü ga Ngechuchu, rü ñuxŭchi dexámaã chaugŭ chayayauxetü, rü ngëmacèx marü chidauchi —ñanagŭrŭ.

<sup>16</sup> Rü yexguma ga ñuxre ga Parichéugŭ rü ñanagŭrŭgŭ: —Yema yatü ga cuxŭ rümexëëxŭ rü tama Tupanaarŭ duŭxŭ nixŭ, erü tama nanaxaure i ngŭxchigaarŭ ngunexŭ —ñanagŭrŭgŭ. Natŭrŭ

togü ga Parichéugü rü ñanagürügü: —¿Ñuxãcü nanaxü i ngëma cuèxruŧ i mexü i taxü ega wüxi i pecaduãxü yixĩxgux? —ñanagürügü. Rü yemaãcü nügü nitoye ga nagu naxĩnüëxüwa ga yema Parichéugü.

17 Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxü ñacuxü nachiga i ngëma yatü ga cuxü rümexëëxü? —ñanagürügü. Rü nüma nanangãxü, rü ñanagürü: —Chauxcèx rü wüxi i Tupanaärü orearü uruŧ nixĩ —ñanagürü.

18 Natürü ga yema Yudíugüarü ãëxgacügü rü tama nüxü nayaxõgüchaŧ ga nüma na yĩxü ga na nangexetüchiréxü ga noxrix, rü ñuxma rü marü na yadauchixü. Rü yemacèx ga yema ãëxgacügü rü tümacèx nangemagü ga nanatü rü naë ga guma yatü ga rümexëtücü.

19 Rü tüxna nacagü, rü ñanagürügü: —¿Daa yĩxü ga guma pene ga nüxü pixucü ga woetama ngexetüãcü bucü? ¿Ñuxãcü i ñuxma i yadauchixü? —ñanagürügü.

20 Rü nanatü rü naë tanangãxügü rü ñatarügügü: —Ngëmaãcü nüxü tacuèx rü daa nixĩ ya tone ga ngexetüãcüma buchirécü.

21 Natürü tama nüxü tacuèx ga ñuxãcü na yadauchixü i ñuxmax. Rü tama nüxü tacuèx ga texé na namexëtüxëëxü. ¡Ëcü nüxnatama pecagü! Erü nüma rü marü naya, rü nümatama pemaã nüxü na yaxuxüçèx —ñatarügügü.

22 Rü yema ñatarügügü ga nanatü rü naë, yerü tamuŧë. Yerü ga Yudíugüarü ãëxgacügü rü marü nügümaã nanamexëëgü na tüxü Ínatèxüchigüxüçèx

ga ngutaquēxepataŵwa ga texé ga Ngechuchuaxŵ  
yaxōxē na Cristu yīxŵ.

23 Rŵ yemacèx nixī ga nanatŵ rŵ naē ga  
ñatagŵgŵxŵ: “¡Ēcŵ, nŵxnatama pecagŵ! Erŵ nŵma  
rŵ marŵ naya rŵ nŵmatama pemaã nŵxŵ na  
yaxuxŵcèx”, ñatagŵgŵxŵ.

24 Rŵ yexguma ga yema Yudíugŵarŵ  
ãēxgacŵgŵ rŵ wenaxārŵ naxcèx nacagŵ ga guma  
ngexetŵchirécŵ. Rŵ ñanagŵrŵgŵ nŵxŵ: —Rŵ ñuxma  
tanaxwèxe i Tupanapēxewa rŵ aixcŵma tomaã  
nŵxŵ quixu na texé cuxŵ rŵmexēēxŵ. Erŵ toma rŵ  
meãma nŵxŵ tacuèx i ngēma Ngechuchu rŵ wŵxi i  
pecaduãxŵ na yīxŵ —ñanagŵrŵgŵ.

25 Rŵ nŵma nanangãxŵ rŵ ñanagŵrŵ nŵxŵ:  
—Choma rŵ tama nŵxŵ chacuèx ega wŵxi i  
pecaduãxŵ yixīgu rŵ ēxna tama. Rŵ ngēma nŵxŵ  
chacuáxŵ nixī ga na changexetŵchiréxŵ ga noxrix  
rŵ ñuxma rŵ na chidauchixŵ —ñanagŵrŵ.

26 Rŵ wenaxārŵ nŵxna nacagŵe, rŵ ñanagŵrŵgŵ:  
—¿Rŵ tacŵ nixī ga cumaã naxŵxŵ? ¿Rŵ ñuxãcŵ  
ga naxŵãxŵ ga cuxŵ na yadauchixetŵxēēxŵ? —  
ñanagŵrŵgŵ.

27 Rŵ nanangãxŵ rŵ ñanagŵrŵ nŵxŵ: —Marŵ pe-  
maã nŵxŵ chixu, rŵ tama choxŵ iperŵxīnŵēchaŵ.  
¿Tŵxcŵŵ penaxwèxe na wena pemaã nŵxŵ chix-  
uxŵ? ¿Éxna pema rŵ ta nŵxŵ peyaxōgŵchaŵ? —  
ñanagŵrŵ.

28 Rŵ yexguma rŵ guma yatŵmaã chixexŵ  
nixugŵe, rŵ ñanagŵrŵgŵ: —Cumaērŵ nixī i  
nŵxŵ cuyaxōxŵ i ngēma yatŵ, natŵrŵ i toma rŵ  
Moīchéarŵ oreaxŵ nixī i tayaxōgŵxŵ.

29 —Toma rŵ nŵxŵ tacuèx ga Tupana rŵ

aixcūma Moĩchémaã na yadexaxũ, natürü ngēma Ngechuchu rü tama nüxũ tacuèx na ngextá na ne naxũxũ —ñanagürügü.

<sup>30</sup> Rũ guma yatü nanangãxũ, rü ñanagürü nüxũ: —¿Ñuxãcü nixĩ i ngēma? Nũma rü marü choxũ narümexētüxēẽ, natürü ¿ñuxãcü i pema i tama nüxũ pecuáxũ na ngextá ne naxũxũ?

<sup>31</sup> —Rũ guxãma i yixema rü meãma nüxũ tacuèx rü Tupana tama nüxũ naxĩnü i pecaduãxgũxũãrũ yumüxẽ. Natürü Tupana rü tüxũ nüxũ naxĩnü i tũmaãrũ yumüxẽ ya yixema nüxũ icuèxüügüxe rü naxúxe i Tupanaãrũ ngúchaũ.

<sup>32</sup> —Taguma ñuxgu nüxũ taxĩnüchiga i wüxi i yatü na yadauchixēẽãxũ i wüxi i duũxũ i norü bucūma ngexetüxũ.

<sup>33</sup> —Rũ ngëxguma chi tama Tupana núma namuxgux ya daa yatü ya choxũ rümexēẽcü, rü taxuacü chima mexũ naxü —ñanagürü ga guma yatü ga ngexetüchirécü.

<sup>34</sup> Rũ yexguma ga yema Yudiugüarü ãëxgacügü, rü ñanagürügü nüxũ: —Cuma na pecadugu na cubuxũ, ¿rü ñuxãcü cunaxwèxe na toxũ cungúxēẽchaũxũ? —ñanagürügü. Rũ ñuxũchi ínanatèxüchigü ga ngutaquëxepataũwa.

*Duũxügü i tama yaxõgüxũ rü ngexetüxũrũü nixĩgü*

<sup>35</sup> Rũ Ngechuchu rü nüxũ nacuáchiga ga na ínatèxüchigüãxũ ga guma ngexetüchirécü. Rũ yexguma nüxũ nadeuxgu, rü ñanagürü nüxũ: —¿Nüxũ cuyaxõxũ ya Tupana Nane ya duũxũxũ ixĩcü? —ñanagürü.

36 Rŭ yexguma ga nŭma rŭ Ngechuchuxŭ nangãxŭ rŭ ñanagŭrŭ: —Pa Corix, jchomaã nŭxŭ ixu na texe yŭixŭ na nŭxŭ chayaxŏxŭcèx! —ñanagŭrŭ.

37 Rŭ Ngechuchu nanangãxŭ, rŭ ñanagŭrŭ: —Marŭ nŭxŭ cudau ya Tupana Nane. Rŭ chomatama nixŭ i cumaã na íchidexaxŭ chiixŭ —ñanagŭrŭ.

38 Rŭ yexguma ga guma yatŭ ga ngexetŭchirécŭ rŭ Ngechuchupéxegu nacaxãpŭxŭ, rŭ nŭxŭ nicuèxŭŭ, rŭ ñanagŭrŭ nŭxŭ: —Ngẽmáãcŭ cuxŭ chayaxŏ, Pa Corix —ñanagŭrŭ.

39 Rŭ yexguma ga Ngechuchu rŭ ñanagŭrŭ: —Rŭ ñoma i naãnewa chaxŭ na chayadexechixŭcèx i chorŭ duŭxŭgŭ nŭxna i ngẽma duŭxŭgŭ i tama choxrŭ ixŭgŭxŭ. Rŭ nuã chaxŭ na chanameèxèèxŭcèx i ngẽma duŭxŭgŭ i noxri tama Tupanaxŭ cuèxgŭxŭ. Rŭ ngèxgumarŭŭ ta núma chaxŭ na duŭxŭgŭ i tama choxŭ cuèxgŭchaŭxŭxŭ chanawéxŭ na duŭxŭgŭ i ngexetŭxŭrŭŭ na yixŭgŭxŭ, erŭ tama choxŭ nayaxŏgŭchaŭ —ñanagŭrŭ.

40 Rŭ ñuxre ga Parichéugŭ ga yéma Ngechuchumaã yexmagŭxŭ, rŭ yexguma yema orexŭ naxŭnŭègu, rŭ Ngechuchuna nacagŭ, rŭ ñanagŭrŭgŭ: —¿Éxna toma rŭ ta tama Tupanaxŭ tacuèxgŭ ñacuxŭ? —ñanagŭrŭgŭ.

41 Rŭ Ngechuchu nanangãxŭ rŭ ñanagŭrŭ nŭxŭ: —Ngèxguma chi tama aixcŭma Tupanaxŭ pecuèxgŭgu rŭ tãŭ chima pegagu nixŭ na pepecaduãxgŭxŭ. Natŭrŭ ngẽma na pegŭ pixuxŭ na Tupanaxŭ pecuáxŭ rŭ ngẽmacèx pegagutama nixŭ na pepecaduãxgŭxŭ i ñuxmax —ñanagŭrŭ.



# 10

## *Carnerugüarü dauruü rü norü carnerugü*

<sup>1</sup> Rü yexguma ga Ngechuchu rü ñanagürü: — Rü aixcüma pemaã nüxü chixu rü ngëma yatü i tama carnerupúxüârü ñaxwa ixücuxü rü wüxi i ngîtëxáxü nixĩ i ngëma, erü ngextámare nixücu.

<sup>2</sup>—Natürü ngëma carnerupúxüârü ñaxwa meãma ixücuxü, rü ngëma nixĩ i norü dauruüxüchi i carnerugü.

<sup>3</sup>—Rü ngëma yatü i carnerupúxüârü ñaxna dauxü rü nayawãxna i ñax na yaxücuxüçèx i carnerugüarü dauruü. Rü nüma i carnerugü rü nüxü nacuëxgü i naga i ngëma norü dauruü. Rü ngëma norü dauruü rü wüxichigü i norü carneru rü naegamaã naxcèx naca na ínamuxüãxüçèx i naxpúxüwa.

<sup>4</sup>—Rü ngëxguma ínamuxüãxgu i guxüma i norü carnerugü, rü nüma i norü dauruü rü napëxegu nixüchigü. Rü nümagü i carnerugü rü nawe narüxĩ, erü nüxü nacuëxgü i naga.

<sup>5</sup>—Natürü ngëxguma wüxi i yatü i tama aixcüma norü dauruü ixixü, rü tama nawe narüxĩ i ngëma carnerugü. Rü nüxna naxĩgü, erü tama nüxü nacuëxgü i naga i ngëma tama norü dauruü ixixü —ñanagürü ga Ngechuchu.

<sup>6</sup> Rü Ngechuchu rü duüxügümaã nüxü nixu ga yema ore ga cuëxruü, natürü ga nümagü rü tama nüxü nacuëxgüéga ga tacüchiga na yĩxü.

## *Ngechuchu rü carneruarü dauruü ya mecü nixĩ*

<sup>7</sup> Rü yexguma ga Ngechuchu rü wenaxârü ñanagürü nüxü: —Aixcüma pemaã nüxü chixu

rü choma nixĩ i carnerupúxũãrũ ããx i nawa ya-chocuxũxũ i carnerugũ.

<sup>8</sup> Guxũma ga yema chopegu nüxira núma ãxũ rü ngĩtèèxgũxũ rü máètagũxũ nixĩgũ. Natürũ yema carnerugũ rü tama naga naxĩnũè.

<sup>9</sup> Choma nixĩ i ããx. Rü texé ya chowa ixücuxe rü tá tamaxũ. Rü meãma tá tüxũ naxüpetü ngẽxgumarũũ i wüxi i carneru i naxpúxũgu ücuxũ rü íxũxũxũxũ rü nüxũ iyangaucü ya mecü ya maxẽ.

<sup>10</sup> Ngẽma ngĩtèxáxũ rü núma naxũ na yangĩxũcèx rü namáètaxũcèx rü nachixexèèãxũcèx. Rü ngẽmacèxicatama núma naxũ. Natürũ i choma rü núma chaxũ na chanamaxèxèèxũcèx i duũxũgũ rü na aixcũma nüxũ nangèxmaxũcèx i maxũ i taguma gúxũ.

<sup>11</sup> Choma nixĩ i carneruarũ dauruũ ya mecü chíĩxũ. Erü wüxi i carneruarũ dauruũ ya mecü rü norü carnerugũxũ ínapoxũ rü ñuxmata naxcèx nayux.

<sup>12</sup> Natürũ ngẽma dñèrucèxmare puracũxũ, rü ega ngẽxguma aixũ nadèuxgux rü carnerugũna ngẽma niña. Rü ngẽmaãcü nanaxü erü tama aixcũma norü dauruũ nixĩ i nümax, rü tama noxrü nixĩ i ngẽma carnerugũ. Rü ngẽma ai rü carnerugũxũ ínayauxũ rü ngèxma tüxũ naxüanexèèmare.

<sup>13</sup> Rü ngẽma yatü rü niña, erü norü dñèrucèxicatama ngẽma napuracü. Rü tama aixcũma carnerugũgu narüxĩnũ.

<sup>14-15</sup> Choma nixĩ i carnerugũarũ dauruũ ya mecü chíĩxũ. Rü ngẽxgumarũũ ya Chaunatu na choxũ nacuáxũ rü choma rü Chaunatũxũ na chacuáxũ, rü ngẽxgumarũũ ta nüxũ chacuèx i

chorü carnerugü, rü nümagü rü choxŭ nacuèxgü. Rü choma rü naxcèx chayü i chorü carnerugü.

16 Rü choxŭ nangëxmagü ta i togü i carnerugü i tama ñaã naxpúxŭwa ngëxmagüxŭ. Rü ngëmagü rü tá ta nuã chanagagü, rü tá chauga naxĩnŭë. Rü wüxitücumü tátama nixĩ rü choma tátama nixĩ i norü dauruŭ chíxŭ.

17 Chaunatü rü choxŭ nangechaŭ, erü chorü carnerugücèx chayü rü wena táxarü chamaxŭ.

18 Taxúema choxŭ tayuxëë, natürü chomatama chorü ngúchaŭmaãtama ichanaxã i chorü maxŭ. Erü choxmëxwa nangëxma na ichanaxãxücèx, rü wena na chanayaxuxücèx, yerü yemaãcü choxŭ namu ga Chaunatü –ñanagürü.

19 Rü yexguma yema orexŭ naxĩnŭëgu ga yema Yudíugüarü ãëxgacügü rü wenaxãrü nügü nitoye ga yema nagu naxĩnŭëxŭwa.

20 Rü muxŭma ga nümagü rü ñanagürügü: –¿Tüxcüŭ nüxŭ iperüxĩnŭë i ñaã yatü i ngëãëxŭ i ngoxo nawa ngëxmaxŭ? –ñanagürügü.

21 Natürü ga togü rü ñanagürügü: –Taxuŭma i yatü i ngoxo nawa ngëxmaxŭ rü ñaarüŭ meã nidexa. ¿Ñuxãcü i wüxi i yatü i ngoxo nawa ngëxmaxŭ rü tüxŭ narümexëtüxëë ya wüxi ya ngexetüxe? –ñanagürügü.

### *Yudíugüarü Æëxgacügü rü Ngechuchuxŭ naxoe*

22 Rü nawa nangu ga yema peta ga gucü ga taunecügu norü tupauca ga taxüñecèx naxügüxŭ ga Yudíugü na nüxna nacuèxãchigüxücèx ga yema ngunexŭ ga nagu yanguxŭ ga guma tupauca. Rü nagáuane ga Yerucharéŭwa ga yexguma.

23 Rŭ guma tupauca ga taxŭnewa nayexma ga wŭxi ga chopetŭchica ga Charumóũrŭ Chopetŭchicagu ãegaxŭ. Rŭ yemagu nayarŭxũxũ ga Ngechuchu.

24 Rŭ ga yema Yudíugŭarŭ ãẽxgacŭgŭ rŭ nŭxũ ínachomaẽguãchi, rŭ ñanagŭrŭgŭ nŭxũ: — ¿Ñuxguratáta tomaã quixaixcŭma na cugŭ quixuxũ na texé na quiĩxũ? Ega aixcŭma cuma rŭ Cristu quixĩgu, rŭ ¡meã noxtacŭma tomaã nŭxũ ixu! — ñanagŭrŭgŭ.

25 Rŭ Ngechuchu nanangãxũ, rŭ ñanagŭrŭ nŭxũ: —Marŭ pemaã nŭxũ chixu, natŭrŭ i pema rŭ tama choxũ peyaxõgŭ. Guxŭma i tacŭ i chaxũxũ rŭ Chaunatŭarŭ poramaã nixĩ i chanaxũxũ, rŭ ngẽmawa meãma pexũ nŭxũ chadauxẽ na choma rŭ Cristu na chiĩxũ.

26 —Natŭrŭ pema rŭ tama peyaxõgŭ, erŭ tama chorŭ carnerugŭtanũxũ pixĩgŭ.

27 —Chorŭ carnerugŭ rŭ nŭxũ nacuèx i chauga, rŭ choma rŭ chorŭ carnerugŭxũ chacuèx, rŭ nŭma rŭ chowe narũxĩ.

28 —Rŭ choma rŭ nŭxna chanaxã i maxũ i taguma gŭxũ. Rŭ nŭmagŭ rŭ tagutáma inayarŭtauxe, rŭ taxúetáma choxna tanapuxũ i choxmẽxwa.

29 —Rŭ yíxema Chaunatŭ choxna tŭxũ mugŭxe ya chorŭ carnerugŭ, rŭ guxũarŭ yexera tixĩ i napèxewa. Rŭ taxúema texé nŭxna tŭxũ tapuxũ.

30 —Chaunatŭ rŭ choma rŭ wŭxitama tixĩgŭ — ñanagŭrŭ.

31 Rŭ yexguma ga yema Yudíugŭarŭ ãẽxgacŭgŭ rŭ wenaxãrŭ nutane nanayauxgŭ na gumamaã Ngechuchuxũ ínamuxũchigŭxũcèx.

32 Natürü ga Ngechuchu rü ñanagürü nüxŦ: — Pepëxewa chanaxü i muxŦma i mexŦgü i Chau-natüarü poramaã chaxüxŦ. ¿Rü ngëxŦrüüxŦ i ngëma mexŦ i chaxüxŦcëx nixĩ i choxŦ nutamaã ípemuxŦchigüchaŦxŦ? —ñanagürü.

33 Rü yema Yudíugüarü ãëxgacügü rü NgechuchuxŦ nangãxŦgü, rü ñanagürügü: —Tama wüxi i puracü i mexŦcëx cuxŦ ítamuxŦchigüchaŦ. Natürü cuxŦ ítamuxŦchigüchaŦ erü Tupanamaã rü tacü quixugü. Cuma rü wüxi i duŦxŦmare quixĩ rü cügü TupanaxŦ quixĩëëchaŦ —ñanagürügü.

34 Rü nüma ga Ngechuchu rü ñanagürü nüxŦ: — Perü mugüpanewa rü naxümatü i Tupanaärü ore i ñaxŦ:

“Rü pematama nixĩ i tupanagü pixĩgüxŦ”,  
ñaxŦ.

35 —Rü ngëma Tupanaärü ore i ümatüxŦwa nüxŦ yaxuxŦ, rü nüxŦ tacuëx rü taxucürüwama texé itayanaxoxëë. Rü ngëma orewa rü Tupana rü ñanagürü:

“Guxãma ya yíxema texé yanayauxgüxe i chorü ore  
rü tupanagü tixĩgü”,

ñanagürü i ngëma orewa.

36 —Rü Tupana choxŦ nayaxu na chanaxüxŦcëx i norü puracü, rü yemacëx ñoma ga naãnewa choxŦ namu. ¿Rü ñuxãcü i pema nagu perüxĩnüëgu rü chixexŦ Tupanamaã chaxüxŦ i ngëxguma Tupana Nane chixĩ —ñachagu pemaã?

37 —Rü ngëxguma chi tama chanaxüxgu i ngëma mexŦ i Chaunatü üxŦ, rü marü name ega woo tama choxŦ peyaxögügu.

38 —Natürü ngëxguma chanaxüxgu i ngëma Chau-natü üxŦ, rü woo tama choxŦ peyaxögügu, rü

chanaxwèxe i nüxŭ peyaxōgŭ i ngēma taxŭ i mexŭgŭ i Chaunatŭarŭ poramaã chaxŭxŭ. Erŭ ngēmawa tá nüxŭ pecuèx na Chaunatŭ rŭ chowa nangēxmaxŭ rŭ choma i nawa –ñanagŭrŭ.

<sup>39</sup> Rŭ wenaxārŭ Ngechuchuxŭ niyauxgŭchaŭ ga yema Yudŭgŭarŭ ãēxgacŭgŭ. Natŭrŭ nŭma ga Ngechuchu rŭ naxchaxwa niña.

<sup>40</sup> Rŭ yexguma ga Ngechuchu rŭ natŭ ga Yudáŭārŭ tocutŭcèx tomaã nataegu. Rŭ yema nachica ga Cuáŭ duŭxŭgŭxŭ ũpaacŭ nawa íbaiŭxēēxŭgu tomaã narŭxãŭx.

<sup>41</sup> Rŭ muxŭma ga duŭxŭgŭ rŭ Ngechuchuxŭ ínayadaugŭ, rŭ ñanagŭrŭgŭ: –Cuáŭ rŭ taxuŭma ga taxŭ ga mexŭ ga cuèxruŭ naxŭ ga Tupanaārŭ poramaã. Natŭrŭ guxŭma ga ore ga Cuáŭ tamaã nüxŭ ixuxŭ ga ñaã yatŭchiga rŭ aixcŭma nixŭ –ñanagŭrŭgŭ.

<sup>42</sup> Rŭ yema nachicawa rŭ muxŭma ga duŭxŭgŭ rŭ Ngechuchuaxŭ nayaxōgŭ.

## 11

### *Dácharuarŭ yuxchiga*

<sup>1</sup> Nayexma ga wŭxi ga yatŭ ga ídaawecŭ ga Dácharugu ãegacŭ. Rŭ nŭma rŭ naēyèxgŭ ga María rŭ Marta rŭ íãne ga Betániãcŭŭx nixŭgŭ.

<sup>2</sup> Rŭ yema María iyixŭ ga Cori ga Ngechuchucutŭgu pumara bacŭ rŭ ñuxŭchi ngŭyaemaã ínapicutŭcŭ. Rŭ guma Dácharu ga ídaawecŭ nixŭ ga ngŭēneē.

<sup>3</sup> Rŭ poraãcŭ niŭaawe ga Dácharu. Rŭ yemacèx ga naēyèxgŭ, rŭ Ngechuchuxŭtawa imugagŭ, rŭ

ngĩgürügügü: “Pa Corix, cumücü ya Dácharu ya nüxũ cungechaũcũ rü nidaawe”, ngĩgürügügü.

4 Rũ yexguma yema orexũ naxĩnũgu ga Ngechuchu, rü ñanagürü: —Ngẽma ðaawe rü tãütáma yumaã inayacuèx. Natürü nidaawe na duũxũgü nüxũ nadaugũxũcèx na ñuxãcü naporaxũ ya Tupana rü ñuxãcü choma i Nane rü ta na chaporaxũ —ñanagürü.

5 Rũ Ngechuchu poraãcü María rü Marta rü Dácharuxũ nangechaũ.

6 Natürü yexguma nüxũ naxĩnũgu ga na yaðaawexũ ga Dácharu, rü tama paxa ínayadau. Rũ taxre ga ngunexũãmatama yexma narũxãũx ga yema nachica ga nawa nayexmaxũwa.

7 Rũ yixcama ga yemawena rü toxũ ñanagürü: — ¡Ngĩã rü wena Yudeaanewa taxĩ! —ñanagürü.

8 Rũ toma ga norü ngúexũgü rü ñatarügügü nüxũ: —Pa Ngúexẽẽruũx, yexwacatama nixĩ ga yemacũãx ga Yudiugüarü ãëxgacügü yexma nutamaã cuxũ ímuxũchigüchaũxũ. ¿Rũ tüxcüũ wena ngẽma cuxũchaũ i ñuxmax? —ñatarügügü.

9 Rũ Ngechuchu rü tomaã nüxũ nixu ga wüxi ga ore na nüxũ tacuèxgũxũcèx na tauta nawa nanguxũ na nayuxũ ga nümax. Rũ ñanagürü toxũ: —¿Taux èxna i wüxi i ngunexũ rü 12 i ora nawa ngẽxmaxũ? Ngẽxguma texé ngunecü ixũxgu rü tama ðacümaã itayarũña, erü tümacèx nangóone.

10 —Natürü ngẽxguma wüxie chütacü ixũxgu rü ngẽmaãcü ðacümaã itayarũña, erü tümacèx naxẽãne —ñanagürü. Rũ yemaãcü nanangoxẽẽ na tauta nawa nanguxũ na nayuxũ ga nümax.

11 Rũ yemawena ga Ngechuchu rü ñanagürü

toxŦ: –TamŦcŦ ya Dácharu rŦ napemare. NatŦrŦ ŦŦuxma rŦ tá chayabaixáchixēē –ŦŦanagŦrŦ.

12 RŦ yexguma ga toma ga norŦ ngŦexŦgŦ rŦ ŦŦatarŦgŦgŦ: –Pa Corix, ega napemaregu, rŦ ngēmawa nŦxŦ tacuèx na naxcèx tá yataanexŦ –ŦŦatarŦgŦgŦ.

13 NatŦrŦ ga Ngechuchu rŦ nŦxŦ nixuxchaŦchirēx ga Dácharu ga marŦ na nayuxŦ. NatŦrŦ ga toma nŦxŦ tacuèxgŦgu rŦ na napemarexŦchigaxŦ yŦxŦ ga tomaã yaxuxŦ.

14 RŦ yexguma ga Ngechuchu rŦ meãma tomaã nŦxŦ nixu rŦ ŦŦanagŦrŦ: –Dácharu rŦ marŦ nayu.

15 –NatŦrŦ choma rŦ chataãē na tama ngema changēxmaxŦ, erŦ ngēmaãcŦ nixŦ i namemaēxŦ i pexcèx na choxŦ peyaxōgŦxŦcèx. ¡RŦ ngŦxã rŦ ítayadaugŦ! –ŦŦanagŦrŦ.

16 RŦ yéma nayexma ga totanŦxŦ ga Tumachi ga WŦxigu BuexŦ ga TaxreēxpŦxŦmaã, naxugŦxŦ. RŦ nŦma ga Tumachi rŦ ŦŦanagŦrŦ toxŦ: –¡NgŦxã i yixema rŦ ta ngema taxŦ na wŦxigu Ngechuchumaã iyuexŦcèx! –ŦŦanagŦrŦ.

### *Ngechuchu nixŦ i wena namaxēxēēxŦ i yuexŦ*

17 RŦ yexguma Betániãwa tomaã nanguxgu ga Ngechuchu, rŦ marŦ āgŦmŦcŦ ga ngunexŦ nangu-petŦ ga na iyatēxgŦãxŦ ga Dácharu.

18 RŦ guma Betániã rŦ YerucharéŦrŦ ngaicamana nayexma. RŦ tomaēxpŦx ga kilómetru nixŦ ga norŦ yaxŦ.

19 RŦ muxŦma ga YudŦgŦ rŦ Dácharueyèx ga Marta rŦ MaríaxŦtawa naxŦ na ngŦxŦ yataãēxēēgŦxŦcèx, yerŦ nayu ga ngŦēneē.



20 Rũ yexguma Marta nüxũ cuèxgu ga marũ na ínanguxũ ga Ngechuchu, rũ nüxũ iyatũxãchi. Natürũ ga María rũ İxgutama irũxãũx.

21 Rũ Marta rũ ngĩgürũgũ nüxũ ga Ngechuchu: —Pa Corix, yexguma chi cuma cunumèxgu rũ tãũ chima nayu ga chaueneẽ.

22 —Natürũ choma nüxũ chacuèx na woo i ñuxma na nayuxũ, rũ Tupana tá cuxna nanaxã i guxũma i tacũ i naxcèx ícuçaxũ —ngĩgürũgũ.

23 Rũ Ngechuchu ngĩxũ nangãxũ rũ ñanagürũ: —Cueneẽ rũ wena tá namaxũ —ñanagürũ.

24 Rũ Marta ngĩgürũgũ nüxũ: —Ngẽmããcũ nüxũ chacuèx rũ wena tá namaxũ i ngèxguma naguxgu i naãne rũ ngèxguma wena namaxègu i guxũma i yuexũ —ngĩgürũgũ.

25 Rũ yexguma ga Ngechuchu rũ ñanagürũ: —Choma nixĩ i íchanadagũxèxũ i yuexũgũ, rũ wena chanamaxèxèxũ. Rũ yixema choxũ yaxõxè rũ woo tayuxgu rũ tá wenaxãrũ tamaxũ.

26 —Rũ guxãma ya texé ya maxũxè rũ choxũ yaxõxè, rũ guxũgutãma tamaxũ. ¿Cuyaxõxũ yĩxũ i ngẽma? —ñanagürũ ga Ngechuchu.

27 Rũ ngĩma rũ ngĩgürũgũ nüxũ: —Ngũ, Pa Corix, choma rũ chayaxõ na cuma rũ Tupana Nane ya Cristu ga ítananguxècũ na quiĩxũ —ngĩgürũgũ.

### *Dácharu itáxũwa naxaxu ga Ngechuchu*

28 Rũ yema ñaxguwena rũ Marta rũ ngĩyèx ga Maríacè x iyaca. Rũ bexma ngĩmaã nüxũ iyarũxu, rũ ngĩgürũgũ: —Marũ nuã nangu ya Ngúexèẽruũ ya Ngechuchu, rũ choxũ cuxcèx nayacaxèẽ —ngĩgürũgũ.

29 Rŭ yexguma María nüxŭ ĩnŭgu ga marŭ yéma na nanguxŭ ga Ngechuchu, rŭ paxa ichi, rŭ Ngechuchuxŭ ĩyadau.

30 Rŭ Ngechuchu rŭ tauta ĩñewa nangu ga yexguma, rŭ yema nachica ga Marta nüxŭ ĩdauxŭwatama nixĭ ga nayexmaxŭ.

31 Rŭ Mariápatawa nayexma ga ñuxre ga yémacŭãx ga Yudíugüarŭ ãëxgacügŭ ga ngĭxŭ yéma taãëxëëgŭxŭ. Rŭ yexguma ngĭxŭ nadaugügu ga paxa na inachixŭ rŭ na ĩnaxŭxŭxŭ, rŭ ngĭwe narŭxĭ. Yerŭ nüma nüxŭ nacuëxgügu rŭ yéma Dácharu itáxŭwa ixŭ na yéma yaxaxuxŭcèx.

32 Rŭ yexguma Ngechuchuxŭtawa nanguxgu ga María, rŭ napëxegu iyacaxãpŭxŭ, rŭ ngĭgŭrŭgŭ: —Pa Corix, yexguma chi cuma cunumëxgu rŭ tãũ chima nayu ga chaueneë ya Dácharu —ngĭgŭrŭgŭ.

33 Rŭ yexguma Ngechuchu ngĭxŭ dèuxgu ga na naxaxuxŭ rŭ na naxauxexŭ ga yema Yudíugüarŭ ãëxgacügŭ ga ngĭwe rŭxĭxŭ, rŭ poraãcŭ ngechaŭ nüxŭ nangux.

34 Rŭ Ngechuchu nüxna naca rŭ ñanagŭrŭ: —¿Ngexta nixĭ i ipenatáxŭ? —ñanagŭrŭ. Rŭ nümagŭ nanangãxŭ rŭ ñanagŭrŭgŭ: —Pa Corix, ĩdücax, nuã naxŭ, rŭ ĩyadau! —ñanagŭrŭgŭ.

35 Rŭ naxaxu ga Ngechuchu.

36 Rŭ yema Yudíugŭ rŭ ñanagŭrŭgŭ: —ĩDüçèx ñuxãcŭ poraãcŭ Dácharuxŭ nangechaŭ! —ñanagŭrŭgŭ.

37 Natŭrŭ ñuxre ga yema ãëxgacügŭ ga Yudíugüarŭ rŭ ñanagŭrŭgŭ: —Daa nixĭ ga guma yatŭ ga ngexetücŭxŭ rŭmexëëcŭ. ¿Rŭ tüxcŭŭ taxucŭrŭwa ŭacŭ rŭ mexŭ Dácharucèx naxŭ na

tama nayuxŭcèx? –ñanagürügü.

*Wenaxãrũ namaxŭ ga Dácharu*

38 Rũ Ngechuchu poraãcü ngechaŭ nüxŭ nangux rũ Dácharumaxŭcèx nixũ. Rũ wüxi ga mèxpũneãrũ ãxmaxŭ nixĩ ga yema naxmaxŭ. Rũ nayexma ga wüxi ga nuta ga norũ ngũxtaŭruũ.

39 Rũ Ngechuchu rũ ñanagürü: — ¡Ípenangũxgachix ya yima nuta ya namaã nangũxtaŭcü! —ñanagürü. Natürü ga Marta ga Dácharueyèx rũ ngĩgürügü: —Pa Corix, cuxá marü nayixane nixĩ, erü marü ãgümücü i ngunexŭ naetü nixĩ ga na nayuxŭ —ngĩgürügü.

40 Natürü ga Ngechuchu rũ ñanagürü ngixŭ: ¿Taux èxna i marü cumaã nüxŭ chixuchiréxŭ rũ ngèxguma cuyaxõxgu rũ tá nüxŭ cudau i wüxi i mexŭ i taxŭ i Tupana üxŭ? —ñanagürü.

41 Rũ yexguma ínanangũxgachigü ga guma nuta. Rũ Ngechuchu daxügu nadawenüãcüma ñanagürü: —Pa Chaunatü Pa Tupanax, moxè cuxna chaxã erü marü choxŭ cuxĩnü.

42 —Choma nüxŭ chacuèx rũ guxüguma choxŭ cuxĩnü. Natürü moxè cuxna chaxã i ñuxma erü chanaxwèxe i ñaã duŭxŭgü na yaxõgüãxŭ na cuma núma choxŭ cumuxŭ —ñanagürü.

43 Rũ yexguma yema ñaxguwena, rũ tagaãcü ñanagürü: —Pa Dácharux, ¡ínaxŭxŭ i ngema! —ñanagürü.

44 Rũ ínaxŭxŭ ga Dácharu ga naxchápenüümaã guxŭwama rübuxpüxŭcü. Rũ Ngechuchu ñanagürü nüxŭ ga duŭxŭgü: —¡Ípeyawèxpüxŭ na íyaxŭxŭcèx! —ñanagürü.

*Ãëxgacügü naxcèx nadaugü na ñuxãcü  
Ngechuchuxü yayauxgüxü*

*(Mt 26.1-5; Mr 14.1-2; Lc 22.1-2)*

<sup>45</sup> Rû yema Yudíugüarü ãëxgacügü ga Mariawe rüixü rü nüxü nadaugü ga yema Ngechuchu üxü, rü muxüma Ngechuchuaxü nayaxögü ga yexguma nüxü nadaugügu ga ñuxãcü wena Dácharuxü na namaxëëxü.

<sup>46</sup> Natürü ñuxre ga yema ãëxgacügü rü Parichéugümaã nüxü nayarüxugü ga yema Ngechuchu üxü.

<sup>47</sup> Rû yexguma ga yema Parichéugü rü paigüarü ãëxgacügü rü nangutaquëxegü namaã ga guxüma ga yema ãëxgacügütücümüwa ügüxü. Rû ñanagürügü: —¿Tacü tá taxüe? Erü ñãã yatü i Ngechuchu rü nanaxü i muxüma i mexü i cuëxruügü.

<sup>48</sup> —Ngëxguma chi tama yayauxgügu, rü guxütáma i duüxügü rü tá nüxü nayaxögü, rü Dumacüãxgüarü churaragü rü núma chi naxí rü nagu napogüe ya tórü tupauca ya taxüne, rü düxwa tãü chima tóxrü nixí i ñãã tachiüãne —ñanagürügü.

<sup>49</sup> Natürü guma taunecügu rü yema paigütanüwa rü Caipá nixí ga norü ãëxgacü. Rû nüma rü ñanagürü nüxü: —Pemagü rü taxuüma pecuèx.

<sup>50</sup> —¿Éxna tama nüxü pecuèx rü taxcèx rü na namemaëxü na wüxitama i yatü guxü i duüxügücèx na yuxü, na tama nayuexücèx i guxüma i tachiüãnecüãx i duüxügü? —ñanagürü.

<sup>51</sup> Natürü ga Caipá rü tama nüëchama yema ñanagürü, yerü guma taunecügu rü nüma nixí ga paigüarü ãëxgacü yíxü. Rû yemacèx rü Tupana

nixĩ ga Caipáwa idexacü ga yexguma nüxũ yax-  
uxgu na Ngechuchu rü guxũma i Yudíugücèx tá na  
nayuxũ.

<sup>52</sup> Rũ yema orewa rü nanangoxẽẽ na tama  
Yudíugücèxicatama tá na nayuxũ, natürü  
guxũma i Tupanaãrũ duũxũgü i guxũ i naãnewa  
ngẽxmagũxũcèx rü tá ta na nayuxũ, na ngẽmaãcü  
wüxigu nangutaquẽxexũcèx i guxũma i ngẽma  
duũxũgü i Tupanaãrũ ixĩgũxũ.

<sup>53</sup> Rũ yexgumaücüü nixĩ ga inaxügüeãxũ ga  
Yudíugüarũ ãẽxgacügü ga nagu na naxĩnüẽxũ ga  
ñuxãcü tá na Ngechuchuxũ yamèxgũxũ.

<sup>54</sup> Rũ yemacèx ga Ngechuchu rü marü tama  
yema Yudíugü ímuxũtanügu naxã. Rũ tomaã  
ínaxũxũ ga Yudeaanewa, rü wüxi ga ãnẽxãcü  
ga Efraĩgu ãeganewa naxũ. Rũ yexma tomaã  
narüxãũx. Rũ guma ããne rü wüxi ga nachica  
ga ngextá taxúema íxãpataxũãrũ ngaicamana  
nayexma.

<sup>55</sup> Rũ marü ningaica ga yema Yudíugüarũ peta  
ga Üpetüchiga. Rũ yemacèx muxũma ga duũxũgü  
ga náĩ ga ããnecũãx rü Yerucharéüwa naxĩ na Tu-  
panacèx nügü yamexẽẽgũxũcèx naxũpa ga yema  
peta.

<sup>56</sup> Rũ Ngechuchucèx nadaugü ga duũxũgü. Rũ  
tupaucã ga taxũnewa nügüna nicagüetanü, rü  
ñanagürügü: —¿Ñuxũ ñapegũxũ i pemax? ¿Ñoma i  
petawa tá naxũxũ rü ãxna tama? —ñanagürügü.

<sup>57</sup> Rũ yema Parichéugü rü paigüarũ ãẽxgacügü  
rü duũxũgüna naxãgagü, rü ñanagürügü: —  
Ngẽxguma ngextá nüxũ pedaugügu i ngẽma  
Ngechuchu, ¡rũ tomaã nüxũ peyarüxu na  
tayayauxgũxũcèx! —ñanagürügü.

# 12

*Wüxi ga nge rü Ngechuchucutügu pumara iba  
(Mt 26.6-13; Mr 14.3-9)*

<sup>1</sup> Rü 6 ga ngunexũ naxũpa ga Üpetüchigaarü peta, rü Ngechuchu rü tomaã Betániãwa naxũ. Rü guma ããne nixĩ ga nagu naxãchixũne ga Dácharu ga Ngechuchu wena namaxẽẽcü.

<sup>2</sup> Rü yéma Dácharuchixũwa Ngechuchucèx nanaxügü ga taxũ ga õna. Rü totanüwa ga yema mechawa yexmagüxe rü Dácharu nixĩ ga Ngechuchuxütawaama chibücü. Rü Marta iyixĩ ga inaxücü ga õna.

<sup>3</sup> Rü yexguma ga María rü yéma inange ga wüxi ga taxüraweũxũ ga pumara ga yixichixũ rü tatanüxũchixũ. Rü Ngechuchuxũ namaã iyixcutü. Rü ñuxũchi ngĩyaemaã ínapicutü. Rü guma ï rü guxũwama nayixmachĩã namaã ga yema pumara.

<sup>4-5</sup> Rü yexguma ga Yuda ga Icariúte ga wüxi ga totanüxũchirẽx ixĩxũ ga yixcama bexma cúãcü Ngechuchuxũ íxuaxũxũ, rü ñanagürü: —¿Tüxcüũ tama tatanüxũgu namaã itaxe i ngẽma pumara na ngẽma dīerumaã nüxũ nangũxẽẽxũcèx i ngẽma duũxügü i ngearü dīeruãxgüxũ? —ñanagürü.

<sup>6</sup> Natürü ga Yuda rü tama aixcüma nagu narüxĩnü ga yema ngearü dīeruãxgüxũ. Natürü yema ñanagürü yerü nüma rü wüxi ga ngĩtèxáxũ nixĩ. Rü naxmèxwa nayexma ga yema choca ga dīeru ngĩxũ nagu taxügüxũ ga guxãma ga toma ga Ngechuchuarü ngúexügü. Rü Yuda rü ñuxguacü rü noxrüxütama ngĩxne nangĩxĩxũ.

<sup>7</sup> Rü yexguma ga Ngechuchu rü ñanagürü nüxũ: —¡Tãxũ i ngĩxũ cuchixewexũ! Erü choma rü paxa

tá chayu rü tá ichatèx. Rü ngëmacèx nixĩ i ngëma pumaramaã choxũ nachaxũ.

<sup>8</sup> —Ngëma ngearü dġeruãxgũxũ rü guxũgutáma petanüwa nangëxmagü. Natürü i choma rü täütáma guxũgu petanüwa changëxma —ñanagürü.

*Paigüarü ãëxgacügü rü nügümaã nanamexëëgü ga ñuxãcü Dácharuxũ tá na yamëxgũxũ*

<sup>9</sup> Rü muxüma ga Yudiügu rü nüxũ nacuáchiga ga Betániãwa na nayexmaxũ ga Ngechuchu. Rü yéma naxĩ na nüxũ nadaugũxücèx. Rü tama Ngechuchuxũĩcatama nadaugüchaũ natürü nüxũ nadaugüchaũ ta ga Dácharu ga Ngechuchu wena namaxëëcü.

<sup>10</sup> Rü yexguma ga paigüarü ãëxgacügü rü nügümaã nanamexëëgü ga Dácharuxũ rü ta na yamëxgũxücèx.

<sup>11</sup> Yerü Dácharugagu nixĩ ga muxüma ga Yudiügu ga Ngechuchuaxũ yaxögüãxũ rü yema paigüna naxĩgũxũ.

*Ngechuchu rü Yerucharéügu naxücu  
(Mt 21.1-11; Mr 11.1-11; Lc 19.28-40)*

<sup>12</sup> Rü muxüma ga duũxügü rü Yerucharéüwa naxĩ naxcèx ga Üpetüchigaarü peta. Rü moxũãcü duũxügü nüxũ nacuáchigagü ga Ngechuchu rü guma ñãnewa na nanguxchaũxũ.

<sup>13</sup> Rü yexguma moruátüta nadaügü rü yemamaã Ngechuchuxũ nayatüxgütanüãchi. Rü tagaãcü ñanagürügü: —¡Rü naxüüne rü namecümaxüchi ya daa Tupanaégagu núma ücü! ¡Rü yixema na Iraétanüxũ ixĩgũxũ rü namecümaxüchi ya daa tórü ãëxgacü! — ñanagürügü.

14 Rŭ Ngechuchu nüxŭ inayangau ga wŭxi ga buru, rŭ naetŭgu naxaunagŭ ga yema Tupanaärŭ ore ga ũmatŭxŭ nüxŭ ixuxŭrŭŭ ga yexguma ñaxgu:

15 “;Tăxŭ i pemuŭĕxŭ, Pa Yerucharĕŭĕăxgŭx! ;Rŭ iperŭdaunŭ na ngema ne naxŭxŭ ya perŭăĕxgacŭ ya wŭxi i buru i íraxŭĕtŭgu aunagŭcŭ!”

ñaxŭ.

16 Rŭ noxri ga toma ga norŭ ngúexŭgŭ rŭ tama nüxŭ tacuĕxgŭĕga ga Ngechuchuchiga na yĩxŭ ga yema ore. Natŭrŭ yixcŭra marŭ Ngechuchu Tupanaxŭtawa ũxgu, rŭ yexguma nixĩ ga nüxna tacuĕxăchixŭ ga guxŭma ga yema Ngechuchuxŭ ngupetŭxŭ, rŭ yema Tupanaärŭ ore nüxŭ ixuxŭăcŭtama nüxŭ na nangupetŭxŭ.

17 Rŭ yema duŭxŭgŭ ga Ngechuchuxŭtawa yexmagŭxŭ ga yexguma Dăcharuxŭ wena namaxĕĕgu, rŭ nüxŭ nixugŭe ga yema nüxŭ nadaugŭxŭ.

18 Rŭ yemacĕx nixĩ ga duŭxŭgŭ ga Ngechuchuxŭ yatŭxăchitanŭxŭ na nayauxgŭăxĕcĕx, yerŭ nüxŭ nacuăchigagŭ ga yema taxŭ ga mexŭ ga Tupanaärŭ poramaă naxŭxŭ.

19 Natŭrŭ ga yema Parichĕugŭ rŭ nŭgŭmaă ñanagŭrŭgŭ: —Marŭ nüxŭ pedauxŭ i ñuxma na taxucŭrŭwama tacŭ namaă ixŭxŭ. ;Rŭ dŭcax, guxŭma i duŭxŭgŭ rŭ nawe narŭxĩ! —ñanagŭrŭgŭ.

### *Griĕgugŭ rŭ Ngechuchuxŭ nadaugŭchaŭ*

20 Rŭ muxŭma ga duŭxŭgŭ rŭ petacĕx Yerucharĕŭwa naxĩ na yĕma Tupanaxŭ na yanacuĕxŭŭgŭxĕcĕx. Rŭ yema duŭxŭgŭtanŭwa nayexma ga ñuxre ga Griĕgugŭ.



21 Rŭ yema Griégugŭ rŭ Piripicèx naxĩ. Rŭ nŭma ga Piripi rŭ Gariréaaneärŭ ãne ga Bechaídacŭãx nixĩ. Rŭ nüxŭ nacèèxŭgŭ rŭ ñanagŭrŭgŭ: — Pa Corix, nüxŭ tadauxchaŭ ya Ngechuchu — ñanagŭrŭgŭ.

22 Rŭ Piripi rŭ Aŭdrémaã nüxŭ nayarŭxu. Rŭ yema taxre rŭ wŭxigu Ngechuchuxŭtawa naxĩ, rŭ namaã nüxŭ nayarŭxugŭ.

23 Rŭ yexguma ga Ngechuchu rŭ ñanagŭrŭ nüxŭ: —Rŭ marŭ nawa nangu tá na chayuxŭ rŭ we-naxärŭ Chaunatŭxŭtawa tá na chaxŭxŭ i choma i Tupana Nane i duŭxŭxŭ chiŭxŭ.

24 —Rŭ aixcŭma pemaã nüxŭ chixu rŭ ngëxguma chi wŭxipŭxŭ i trigu tama waixŭmŭãnegu toxgu rŭ wŭxipŭxŭechatama nixĩ. Natŭrŭ ega waixŭmŭgu natoxgu, rŭ ngema naxŭxgu, rŭ muxŭchinema ínguxuchi. [Rŭ ngëxgumarŭŭ tá ta Tupanaxŭtawa nangugŭ i muxŭma i duŭxŭgŭ ega chayuxgux.]

25 —Rŭ pemaã nüxŭ chixu rŭ texé ya yíxema tŭmaärŭ maxŭxŭ ngechaŭxë i ñoma i naãnewa rŭ tá itayarŭtaxu. Natŭrŭ texé ya yíxema tama tŭmaärŭ maxŭxŭ ngechaŭxë rŭ tama yuxŭ muŭxë i ñoma i naãnewa, rŭ tá tŭxŭ nangëxma i maxŭ i taguma gŭxŭ.

26 —Rŭ ngëxguma texé choxŭ puracŭchaŭgu rŭ name nixĩ i chowe tarŭxŭ. Rŭ ngëma choma tá íchangëxmaxŭwa rŭ ngema rŭ tá ta tangëxma i tŭmax. Rŭ ngëxguma texé choxŭ puracŭgu rŭ Chau-natŭ ya Tupana rŭ tá tŭmamaã nataãë —ñanagŭrŭ.

### *Ngechuchu nanaxunagŭ ga norŭ yuxchiga*

27 —Rŭ Ngechuchu ñanagŭrŭ: —Rŭ ñŭxma rŭ po-raãcŭ changechaŭ rŭ chanaxixãchiãë. ¿Rŭ taçŭxŭ

tá Chaunatümaã chixuxũ? Taxucürüwa namaã nüxũ chixu na choxũ Ínanguxuchixẽẽxũcèx na tama chayuxũcèx, erü woetama ngẽmacèx núma chaxũ —ñanagürü.

28 Rũ ñanagürü: —Pa Chaunatüx, ¡Choxũ rüngũxẽẽ na duũxũgüpèxewa cuxũ chataxẽẽxũcèx! —ñanagürü. Rũ yexguma ga yema duũxũgü ga yema yexmagüxũ rü nüxũ naxĩnüẽ ga wüxi ga naga ga daxüwa inaxũxũ ga ñaxũ: —Marü cuxũ charüngũxẽẽ na choxũ cutaxẽẽxũ ga noxrix, rü wena táxarü cuxũ charüngũxẽẽ na choxũ cutaxẽẽxũcèx —ñanagürü ga yema naga.

29 Rũ yema duũxũgü ga yema yexmagüxũ ga nüxũ Ínüẽxũ ga yema naga, rü ñanagürügü: —Wüxi i duruanexũ nixĩ —ñanagürügü. Natürü togü rü ñanagürügü: —Wüxi i Tupanaârü orearü ngeruũ i daxũcüãx nixĩ i namaã idexaxũ —ñanagürügü.

30 Rũ yexguma ga Ngechuchu rü ñanagürü nüxũ: —Tama chauxcèx nixĩ i nüxũ pexĩnüẽxũ i ngẽma naga. Rũ pexcèxtama nixĩ i nüxũ pexĩnüẽxũ.

31 —Rũ ñuxma tá nixĩ i Tupana inaxüğüãxũ na tüxũ napoxcuexũ ya duũxẽ naxcèx i tümaârü pecadugü. Rũ ñuxma tá nixĩ i Tupana Ínatèxüchixũ i ngẽma ñoma i naãnewa poraxũ i Chataná.

32 —Rũ ngèxguma curuchawa chipotagu rü chaugüxütawa tá chanagagü i guxüma i duũxũgü —ñanagürü ga Ngechuchu.

33 Rũ yema orewa duũxũgümaã nüxũ nixu ga ñuxãcü tá na nayuxũ.

34 Rũ yema duũxũgü nanangãxũgü, rü ñanagürügü: —Torü mugü i ümatüxüwa nüxũ tadaugü na guxügutáma namaxèchaxũ ya Cristu. ¿Rũ ñuxãcü i cuma rü ñacurügü: “Rũ Tupana

Nane ya duŭxŭxŭ ixĩcŭ rŭ curuchawa tá nipota”, ñacurŭgŭ? ¿Rŭ texé tixĩ ya yíxema Tupana Nane ya duŭxŭxŭ ixĩxê? —ñanagŭrŭgŭ.

<sup>35</sup> Rŭ yexguma ga Ngechuchu rŭ ñanagŭrŭ nŭxŭ: —Ñoma rŭ ta petanŭwa changêxma na ñoma i nañewa pexŭ changúexêxŭcèx rŭ ngêmaâcŭ pexŭ changóonetanŭxêxŭcèx. Natŭrŭ paxaâchicèxicatama petanŭwa changêxma. Rŭ name nixĩ i paxa choxŭ peyaxôgŭ ñoma rŭ ta pexcèx chanangónexê naxŭpa na naxêñexŭ. Erŭ yíxema êñexŭwa ngêxmaxê rŭ tama nŭxŭ tacuèx na ngextá taxŭxŭ.

<sup>36</sup> —Rŭ ñoma rŭ ta petanŭwa changêxma rŭ name nixĩ i paxa choxŭ peyaxôgŭ na chorŭ ngónexŭwa pengêxmagŭxŭcèx —ñanagŭrŭ. Rŭ yema ñaxguwena rŭ natanŭwa ínaxŭxŭ ga Ngechuchu. Rŭ naxchaxwa inicŭx.

### *Tacŭcèx nixĩ ga Yudíugŭ ga tama Ngechuchuaxŭ yaxôgŭãxŭ*

<sup>37</sup> Rŭ woo ga Ngechuchu rŭ duŭxŭgŭpêxewa nanaxŭ ga muxŭma ga taxŭ ga mexŭ ga cuèxruŭgŭ ga Tupanaârŭ poramaã naxŭxŭ, natŭrŭ yexguma rŭ ta tama nŭxŭ nayaxôgŭ ga duŭxŭgŭ.

<sup>38</sup> Rŭ yemaâcŭ Tupana nayanguxê ga yema ore ga Ichaxía ũmatŭxŭ ga ñaxŭ:

“Pa Corix, taxúema tayaxô ga yema ore ga tŭxŭ tangúexêxŭ. Rŭ woo nŭxŭ tadaugŭ na ñuxâcŭ naporaxŭ ya Tupana, rŭ tama tayaxôgŭ”, ñaxŭ.

39-40 Rŭ yemaãcŭ ga yema duŭxŭgŭ rŭ tama nayaxŭgŭ yema Ichaxía ũmatŭxŭwa nŭxŭ yax-uxŭrŭŭ, rŭ:

“Yema duŭxŭgŭ rŭ tama nŭxŭ nadaugŭchaŭ rŭ tama nayaxŭgŭchaŭ rŭ tama Tupanacèx na-woeguchaŭ. Rŭ yemacèx ga Tupana rŭ nŭxna nixŭ na tama nŭxŭ nadaugŭxŭcèx rŭ tama yaxŭgŭãxŭcèx rŭ tama naxcèx na-woeguxŭcèx na nŭma nŭxna naxããxŭcèx i maxŭ i ngexwacaxŭxŭ”,

ñaxŭ.

41 Rŭ yema ñanagŭrŭ ga Ichaxía yerŭ nangoxetŭgu marŭ nŭxŭ nadau na ñuxãcŭ ãëxgacŭ ya tacŭxŭchi na yŭxŭ ya Ngechuchu ya Cristu. Rŭ yemaãcŭ nachiga nidexa.

42 Natŭrŭ muxŭma ga yema Yudŭgŭarŭ ãëxgacŭgŭ rŭ Ngechuchuaxŭ nayaxŭgŭ, rŭ woo ga ñuxre ga naërugŭ rŭ ta nayaxŭgŭ, natŭrŭ tama nŭgŭ nixugŭchaŭ ga duŭxŭgŭpëxewa, yerŭ namuŭë na Parichéugŭ ngutaquëxepataŭwa ínawoxŭxŭ.

43 Rŭ yemaãcŭ tama nŭgŭ nixugŭchaŭ, yerŭ norŭ me nixŭ ga duŭxŭgŭ namaã nataãëgŭxŭ rŭ tama aixcŭma naxcèx nadaugŭ na Tupana namaã taãëxŭ.

*Texé ya tama Ngechucharŭ oreaxŭ yaxŭxë rŭ tá tapoxcu*

44 Rŭ tagaãcŭ ñanagŭrŭ ga Ngechuchu: —Texé ya choxŭ yaxŭxë rŭ tama choxŭxŭcatama tayaxŭ. Natŭrŭ Chaunatŭ ya nŭma choxŭ mucŭaxŭ rŭ ta tayaxŭ.

45 —Rŭ texé ya choxŭ dauxe, rŭ Chaunatŭ ya nŭma choxŭ mucŭxŭ rŭ ta tadau.

<sup>46</sup> –Choma na ngónexēēruŭ chīxŭ, rŭ ñoma i nañewa changu na guxãma ya texé ya choxŭ yaxōxē rŭ tama ēānexŭwa na tangēxmagüechaxŭcèx.

<sup>47</sup> –Natürŭ ngēxguma texé nüxŭ ñnŭgu i chorŭ ore rŭ tama tayaxōxgu rŭ tama choma nixŭ i tüxŭ chapoxcuxŭ. Erŭ tama ñoma i nañewa changu na chanapoxcuexŭcèx i duŭxŭgŭ, natürŭ núma chaxŭ na chanamaxēxēxŭcèx.

<sup>48</sup> –Yixema texé ya tama choxŭ yaxōxē rŭ tama chauga ñnŭxē rŭ marŭ tüxŭ nangēxma na tacŭcèx tá Tupana tüxŭ poxcuxŭ. Erŭ ngēma ore i nüxŭ chixuxŭgagu tátama nixŭ ya Tupana i tüxŭ napoxcuxŭ i nañeärŭ guxgu, erŭ tama tayaxō i ngēma ore i nüxŭ chixuxŭ.

<sup>49</sup> –Tama chaugagutama chidexa, natürŭ guma Chaunatŭ ga núma choxŭ mucŭ, rŭ guma nixŭ ga chomaã nüxŭ ixucŭ na tacŭxŭ tá duŭxŭgŭmaã chixuxŭ rŭ ñuxäcŭ tá chanangüexēxŭ.

<sup>50</sup> –Rŭ nüxŭ chacuèx na Chaunatŭarŭ orewa nangēxmaxŭ i maxŭ i taguma gŭxŭ. Rŭ ngēmacèx i ngēma ore i nüxŭ chixuxŭ, rŭ ngēmatama ore nixŭ i Chaunatŭ choxŭ muxŭ na nüxŭ chixuxŭ – ñanagŭrŭ ga Ngechuchu.

## 13

### *Ngechuchu rŭ norŭ ngüexŭgŭxŭ niyauxgŭcutŭ*

<sup>1</sup> Rŭ wŭxi ga ngunexŭ nataxu ga nawa na nanguxŭ ga yema Yudŭgŭarŭ peta ga Üpetŭchiga. Rŭ Ngechuchu nüxŭ nacuèx ga marŭ nawa na nanguxŭ ga ñoma ga nañewa na yaxŭxŭ rŭ wenaxärŭ Nanatŭxŭtawa na naxŭxŭ. Rŭ nüma rŭ yexguma ñoma ga nañewa nayexmagu rŭ guxŭguma tüxŭ

nangechaŦ ga guxema noxrü ixĩgũxe. Rü yexgumarüŦ ta ga yexguma toxna yaxũxchaŦgu ga daxũguxŦ ga naãnewa na naxũxŦ, rü yemaãcü poraãcü toxŦ nangechaŦ.

<sup>2-4</sup> Natürü ga Chataná rü marü Yuda ga Chimáũ ga Icaríute nanena nangu na bexma cúcü NgechuchuxŦ ínaxuaxũxũcèx. Rü Ngechuchu rü marü nüxŦ nacuèx ga NanatũxŦtawa na ne naxũxŦ rü wena táxarü Nanatücèx na nataeguxŦ. Rü nüxŦ nacuèx ga Nanatü rü naxmèxgu na naxüãxŦ ga guxũma ga pora. Rü yemacèx ga yema chũtaxũgu ga yexguma mechawa ítachibüeyane, rü inachi ga Ngechuchu. Rü ínacuexuchi ga norü gáuxũchiru, rü wüxi ga tuayamaã nügü nigoye.

<sup>5</sup> Rü ñuxũchi yauxmèxũpáxũgu dexáta naba, rü toxŦ niyauxgücutü. Rü guma tuaya ga namaã yagoyecümaã toxŦ ínapiücutü.

<sup>6</sup> Rü yexguma Chimáũ ga PedruxŦ nayauxcutüchaŦgu rü ñanagürü ga Pedru: —Pa Corix, ¿ñuxãcü tá i cuma i choxŦ cuyauxcutüxŦ? — ñanagürü.

<sup>7</sup> Rü Ngechuchu nanangãxŦ rü ñanagürü: —Ñuxma rü tama nüxŦ cucuèx i tüxcüŦ na chanaxüxŦ i ñaã, natürü yixcama rü tá nüxŦ cucuèx —ñanagürü.

<sup>8</sup> Natürü ga Pedru rü ñanagürü: —Choma rü tãütáma chanaxwèxe na choxŦ cuyauxcutüxŦ — ñanagürü. Rü Ngechuchu nanangãxŦ rü ñanagürü nüxŦ: —Ngèxguma tama cuxŦ chayauxcutügu, rü tãütáma choxrü quixĩ —ñanagürü.

<sup>9</sup> Rü yexguma ga Chimáũ ga Pedru rü ñanagürü nüxŦ: —Pa Corix, ¡Tama choxŦ

cuyauxcutüxicatama! Natürü chanaxwèxe i choxü cuyauxmèx rü choxü cuyauxeru ta —ñanagürü.

10 Natürü Ngechuchu nanangãxü rü ñanagürü nüxü: —Texé ya ngexwacèx aiyaxe rü tanaxwèxe i tümacutüxicatama tayaxu, erü guxüwama tange-mata. Rü pema rü marü pingematagü, natürü tama guxãma aixcüma tingemata —ñanagürü.

11 Rü Ngechuchu nüxü nacuèx na texé tá bexma cúãcü ínaxuaxüxü, rü yemacèx ñanagürü nüxü: —Natürü tama guxãma aixcüma tingemata —ñaxü.

12 Rü yexguma toxü yayauxgücutüguwena, rü Ngechuchu wena nicüxcuchi ga norü gáxüchiru. Rü wenaxãrü mechawa narüto. Rü ñanagürü toxü: —¿Nüxü pecuáxü yüxü i ngẽma chaxüxü?

13 —Pema rü: “Pa Ngúexẽeruü” rü “Pa Corix”, ñaperügü choxü. Rü marü name i ngẽma ñaperügü, erü aixcümaxüchi ngẽma chixĩ.

14 —Rü ñuxma i choma na ngúexẽeruü chixĩxü rü pemaã na ichacuáxü, rü pexü chiyauxgücutü. Rü ngexgumarüxü ta i pema rü name i wüxichigü i pemücüxü piyauxgücutü..

15 —Choma rü pexü nüxü chadauxẽ na ñuxãcü tá penaxüxü na pema rü ngema pemaã chaxüxüãcü penaxüxüçèx.

16 —Rü aixcüma pemaã nüxü chixu rü taxuüma i wüxi i coriarü duüxü rü norü coriétüwa nügü nangexmaxẽ. Rü taxuxüma i ãëxgacüarü ore-arü ngeruxü i norü ãëxgacü i namuxüétüwa nügü nangexmaxẽ.

17 —Rü ngëxguma nüxü pecuèxgu i chorü ore rü penaxüxgu i ngẽma pemaã nüxü chixuxü, rü aixcüma tá petaãëgü.

18 –Rü tama guxãma i pechiga nixĩ i chidex-axũ. Erü choma rü tüxũ chachuex rü texégü tixĩ ya yíxema tüxũ chidexeçíxe. Natürü Tupana nayan-guxêêchaũ i norü ore i ümatüxũ i ñaxũ:

“Texé ya chomaã chibüxe rü chomaã tarüxuwanü”, ñaxũ. Rü ngêmaãcü tá nangupetü na yanguxüçèx i ngema Tupanaarü ore.

19 –Natürü naxüpa na nangupetüxũ i ngêma, rü pemaã nüxũ chixu na choxũ peyaxögüxüçèx i ngêxguma nangupetüxgu.

20 –Aixcüma pemaã nüxũ chixu rü texé ya tüxũ yaxúxe ya yíxema choma ngema tüxũ chamuxê, rü choxũ nixĩ i tayaxuxũ. Rü texé ya choxũ yaxúxe, rü Chaunatü ga núma choxũ mucüxũ nixĩ i tayaxuxũ –ñanagürü ga Ngechuchu.

*Ngechuchu nüxũ nixu ga Yuda rü tá bexma cúãcü na ítaxuaxũãxũ*

*(Mt 26.20-25; Mr 14.17-21; Lc 22.21-23)*

21 Rü yexguma yema ñaxguwena ga Ngechuchu rü poraãcü ngechaũ nüxũ nangux, rü meãma tomaã nanangoxêê, rü ñanagürü toxũ: –Aixcüma pemaã nüxũ chixu rü wüxie i petanüwa tá nixĩ i bexma cúãcü choxũ ítaxuaxũxũ –ñanagürü.

22 Rü yexguma ga toma ga norü ngúexũgü rü wüxichigü togü tadawenü, rü tama nüxũ tacuèxgü ga texéchiga na yema ñaxũ.

23 Rü choma ga norü ngúexũ ga poraãcü choxũ nangechaũxê rü nacüwawa charüto ga Ngechuchu ga mechawa.

24 Rü Chimáũ ga Pedru rü bexma choxũ naxuneta ga na Ngechuchuna chaçaxüçèx ga texéchiga na yĩxũ ga yema.



25 Rŭ yexguma ga choma rŭ yexeraãcŭ Ngechuchuna chimaxcuchi rŭ nŭxna chaca, rŭ ñacharŭgŭ: —Pa Corix, ¿texé tá tixĩ ya yixema? —ñacharŭgŭ.

26 Rŭ Ngechuchu choxŭ nangãxŭ, rŭ ñanagŭrŭ: —Wŭxi i pãũãrŭ bŭcuxŭ tá íchacŭe, rŭ yixema tŭxna chanaxãxŭ, rŭ yixema tixĩ —ñanagŭrŭ. Rŭ yexguma ínacŭe ga wŭxi ga pãũãrŭ bŭcuxŭ rŭ Yuda ga Icariŭte ga Chimãũ nanena nanaxã.

27 Rŭ yexgumatama Yuda nayauxgu ga yema pãũãrŭ bŭcuxŭ rŭ ngoxo ga Chataná rŭ Yudagu naxŭcu. Rŭ yexguma ga Ngechuchu rŭ ñanagŭrŭ nŭxŭ: —Rŭ ngẽma cuxŭxchaŭxŭ, ¡rŭ paxa naxŭ! —ñanagŭrŭ.

28 Natŭrŭ taxŭema ga toma ga mechawa chibŭexe nŭxŭ tacuèxgŭ ga tacŭchiga na yĩxŭ ga yema ñaxŭ ga Ngechuchu.

29 Rŭ nŭma ga Yuda rŭ dŭeruchiũãrŭ dauruũ nixĩ. Rŭ yemacèx ñuxre ga toma nŭxŭ tacuèxgŭgu rŭ Ngechuchu taxewa nanamu, na tacŭcèx yatax-exŭcèx naxcèx ga peta, rŭ êxna duŭxŭgŭ ga ngearŭ dŭeruãxŭna ngĩxŭ na naxãxŭcèx ga dŭeru.

30 Rŭ yexguma Yuda nayauxgu ga yema pãũ, rŭ ínaxŭxŭ ga yema ucapuwa. Rŭ marŭ nachŭta ga yexgumax.

*Ngechuchu norŭ ngúexŭgũmaã nŭxŭ nixu ga yexwacaxŭxŭ ga norŭ mu*

31 Rŭ yexguma Yuda íxŭxguwena, rŭ Ngechuchu rŭ ñanagŭrŭ: —Rŭ ñuxma rŭ tá aixcŭma nangox na ñuxãcŭ naporaxŭ ya Tupana Nane ya duŭxŭxŭ íxŭcŭ. Rŭ yimawa tá nixĩ i nangoxẽẽãxŭ ya Tupana i norŭ pora.

<sup>32</sup> –Rü ngëxguma yima Tupana Nane nangoxëxgu i Tupanaârü pora, rü ngëxgumarüü tá ta ya Tupana rü nanangoxëë i Naneârü pora. Rü paxa tá nixĩ i ngëma.

<sup>33</sup> –Pa Chauxacüãxgüx, tâütáma muxü i ngunexü petanüwa changëxma. Rü pema rü tá chauxcèx pedaugü, natürü ngëma choma íchaxüxüwa rü taxucürüwama ngema pexĩ. Rü ñaätama ore nixĩ ga marü Yudíugüarü äëxgacügümaã nüxü chixuxü, rü ñuxma rü pemaã rü ta nüxü chixuxü.

<sup>34</sup> –Rü pemaã nüxü chixu i wüxi i ngexwacaxüxü i mu. Rü ngëma pexü chamuxü nixĩ i pemücügüxü na pengechaüxü i wüxichigü. Rü ngëma na choma pexü changechaüxürüü, rü chanaxwëxe i wüxichigü i pema rü pemücügüxü pengechaügu.

<sup>35</sup> –Rü ngëxguma wüxichigü pemücügüxü pengechaügu, rü guxüma i duüxügü tá nüxü nicuëxächitanü na chorü ngúexügü pixīgüxü –ñanagürü.

*Ngechuchu nüxü nixu rü Pedru rü tãxütáma nügü nixu na norü ngúexü yixüxü*

*(Mt 26.31-35; Mr 14.27-31; Lc 22.31-34)*

<sup>36</sup> Rü Chimáü ga Pedru rü Ngechuchuna naca, rü ñanagürü: –Pa Corix ¿ngextá tá cuxü? –ñanagürü. Rü Ngechuchu nanangãxü, rü ñanagürü: –Ngema íchaxüxüwa rü taxucürüwa chowe curüxü i ñuxmax. Natürü yixcama rü ngëmáãcü tá chowe curüxü –ñanagürü.

<sup>37</sup> Rü yexguma ga Pedru rü ñanagürü: –Pa Corix, ¿tüxcüü taxucürüwa cuwe charüxü i ñuxmax?

Erü marü íchamemare na cuxcèx na chayuxŭ — ñanagürü.

<sup>38</sup> Rŭ Ngechuchu nanangãxŭ, rŭ ñanagürü: — ¿Aixcŭma yïxŭ i marü ícumemarexŭ na chauxcèx cuyuxŭ? Aixcŭma cumaã nüxŭ chixu rŭ tãütátama yacaxgu ya otá, rŭ tomaëpŭxcŭna tá nüxŭ quixu na tama choxŭ cucuáxŭ — ñanagürü ga Ngechuchu.

## 14

*Ngechuchu rŭ nama i Nanatŭxŭtawa nadaxŭ nixŭ*

<sup>1</sup> —¡Tãxŭ i penaxixãchiãëgŭxŭ i pemax! ¡Tupanaãxŭ peyaxögŭ rŭ choxŭ rŭ ta peyaxögŭ!

<sup>2</sup> —Chaunatŭxŭtawa nangëxma i muxŭchixŭma i nachicagŭ. Ngëxguma chi natauxguma, rŭ tãü chima pemaã nüxŭ chixu na pexcèx chayamexëëxŭcèx i pechicagŭ.

<sup>3</sup> —Rŭ ngëxguma marü ngëma chaxŭxgu rŭ wüxi i pechica chamexëëxgu, rŭ wena táxarü núma chaxŭ. Rŭ pexŭ tá chayagagŭ na ngëma nachica i chomatátama nawa changëxmaxŭwa na pengëxmagŭxŭcèx i pemax.

<sup>4</sup> —Rŭ pema rŭ nüxŭ pecuèx na ngextá tá na chaxŭxŭ, rŭ marü nüxŭ pecuèx i nama i ngëma nadaxŭ —ñanagürü ga Ngechuchu.

<sup>5</sup> Rŭ Tumachi rŭ ñanagürü: —Pa Corix, tama nüxŭ tacuèx na ngextá na cuxŭxŭ. ¿Rŭ ñuxãcü tá i nüxŭ tacuáxŭ i ngëma nama? —ñanagürü.

<sup>6</sup> Rŭ Ngechuchu nanangãxŭ, rŭ ñanagürü: — Choma nixŭ i ngëma nama i Chaunatŭxŭtawa nadaxŭ chiŭxŭ. Rŭ aixcŭma nixŭ i ngëma ore i nüxŭ chixuxŭ. Rŭ choma nixŭ i duŭxŭgŭxŭ

chamaxêxêxũ. Rũ chaugaguxicatama nixĩ i Chaunatũxũtawana nangugũxũ i duũxũgũ.

7—Rũ ngêxguma chi pema rũ aixcũma meã choxũ pecuêxgũgu, rũ Chaunatũxũ rũ chi ta pecuêxgũ. Rũ ñũxmaũcũũ nixĩ i Chaunatũxũ pecuáxũ, erũ marũ nũxũ pedaügüecha —ñanagürũ.

8 Rũ yexguma ga Piripi rũ ñanagürũ: —Pa Corix, ¿Toxũ nũxũ nadauxêê ya Cunatũ! Rũ ngêxĩcatama i tanaxwêxegũxũ —ñanagürũ.

9 Rũ Ngechuchu nanangãxũ, rũ ñanagürũ: — Pa Piripix, ¿ñuxre ya tauncũ marũ petanũwa changêxma rũ ñũxma rũ ta tama choxũ cucuêxégaxũ? Yĩxema choxũ dauxe rũ Chaunatũxũ rũ ta tadau. ¿Rũ tũxcũũ i ngêxguma rũ ta cunaxwêxexũ i pexũ nũxũ na chadauxêêxũ ya Chaunatũ?

10 —¿Tama êxna cuyaxõ na choma rũ Chaunatũmaã rũ wũxitama tixĩgũxũ? Rũ guxũma i ore i pemaã nũxũ chixuxũ rũ tama chauechama nũxũ chixu. Erũ yima Chaunatũ ya wũxiwa chomaã ngêxmacũ, rũ yima nixĩ ya naxücũ i guxũma i noxrütama puracũ.

11 —Chanaxwêxe i choxũ peyaxõgũ na choma rũ Chaunatũmaã wũxitama tixĩgũxũ. Natürũ woo tama ngêma pixõgũgu rũ chanaxwêxe na choxũ peyaxõgũxũ naxcêx i ngêma mexũgũ i taxũ i Tupanaãrũ poramaã chaxũxũ.

12—Aixcũma pemaã nũxũ chixu rũ yĩxema choxũ yaxõxê rũ tá tanaxũ i guxũma i choma chaxũxũ. Rũ ngêma chaxũxũãrũ yexera tá taxũ, erũ choma rũ tá Chaunatũxũtawana chaxũ.

13 —Rũ guxũma i tacũ i chauégagu Tupanaxũtawana naxcêx ípeçaxũ rũ tá pexna

chanaxã. Rũ ngẽmaãcü tá chanaxü na chaugagu nangóxcèx i Chaunatüarü pora.

14 –Rũ choma tá chanaxü i guxũma i tacü i chauégagu choxna naxcèx pecaxũ.

*Ngechuchu rü norü ngúexũgümaã inaxuneta na naxcèx tá núma namuãxũ i Naãe i Üünexũ*

15 –Rũ ngẽxguma aixcüma choxũ pengechaũgu, rü naga tá pexĩnüë i chorü mugü.

16 –Rũ choma tá Chaunatüna naxcèx chaca na núma pexcèx namuãxcèx i to i perü ngüxẽẽruũ i Naãe i Üünexũ, na guxũgutáma petanüwa nangẽxmaxüçèx. Rũ núma tá nixĩ i pexcèx nangoxẽãxũ i ore i aixcüma ixĩxũ.

17 –Rũ ñoma i naãnecũãx i duũxũgü rü taxucürüwama nanayauxgü, erü tama nüxũ nadaugü rü tama nüxũ nacuèxgü. Natürü i pema rü marü nüxũ pecuèx, erü núma rü petanüwa nangẽxma. Rũ guxũgutáma pemaã inarüxãũx.

18 –Rũ täütáma núma pexũ chawogümare i chomax, erü wena táxarü pexcèx chataegu, na petanüwa changẽxmaxüçèx.

19 –Rũ paxa tá nixĩ na täütáma choxũ nadaugüxũ i ñoma i naãnecũãx i duũxũgü. Natürü i pema rü tá choxũ pedaugü. Rũ tá pemaxẽ, erü choma rü chamaxũ.

20 –Rũ ngẽxguma yuwa ícharüdagü rü wena chamaũxgu, rü ngẽxguma tá nüxũ picuèxãchitanü na choma rü Chaunatüwa chamaxũxũ rü pema i chowa rü choma i pewa.

21 –Yíxema texé ya nüxũ cuáxe rü naga ñnüxẽ i chorü mugü, rü tanangoxẽẽ na aixcüma choxũ tangechaũxũ. Rũ Chaunatü tá tüxũ nangechaũ

ya yíxema choxũ ngechaũxẽ, rü choma rü tá ta tüxũ changechaũ. Rü tüxũ tá chaugü chawẽx — ñanagürü ga Ngechuchu.

<sup>22</sup> Rü nayexma ga to ga Ngechuchuarü ngúexũ ga Yudagu ãegaxũ ta. Rü yema rü ñanagürü: —Pa Corix, ¿tüxcüũ toxũ cugü cuwẽx, rü tama ñoma i naãnecũãx i duũxũgũxũ cugü cuwẽx? —ñanagürü.

<sup>23</sup> Rü Ngechuchu nanangãxũ, rü ñanagürü: —Yíxema choxũ ngechaũxẽ rü naga taxĩnü i ngẽma ore i tümamaã nüxũ chixuxũ. Rü Chaunatü tá tüxũ nangechaũ. Rü choma rü Chaunatümaã wüxigu tümaxũtawa tá tangẽxmagü.

<sup>24</sup> —Yíxema tama choxũ ngechaũxẽ rü tama naga taxĩnü i ngẽma chorü ore. Rü ngẽma ore i chauxũtawa nüxũ pexĩnüexũ rü tama chorü ore nixĩ, natürü guma Chaunatü ga núma choxũ mucüarü ore nixĩ.

<sup>25</sup> —Ñoma rü ta petanüwa changẽxma rü pemaã nüxũ chixu i guxũma i ngẽma ore i pexcèx choxũ ngẽxmaxũ.

<sup>26</sup> —Natürü Chaunatü rü tá chauégagu núma nanamu i Naãẽ i Üünexũ na pexũ nangũxẽẽxũcèx. Rü nüma i Naãẽ i Üünexũ tá pexũ nangúexẽẽ i guxũma, rü tá nüxna pexũ nacuèxãchixẽẽ i guxũma i ore ga pemaã nüxũ chixuxũ.

<sup>27</sup> —Rü ñuxma na pexna íchixũxũ, rü pexna chanaxã i taãẽ. Natürü ngẽma taãẽ i pexna chaxãxũ, rü tama ñoma i naãnecũãx pexna ãxũ i taãerũ nixĩ. Rü tama chanaxwèxe i penaxixãchiãégü rü pemuũẽ.

<sup>28</sup> —Marü pemaã nüxũ chixu na pexna tá íchixũxũ rü wena táxarü pexcèx chataeguxũ na

pemaã changẽxmaxüçèx. Rũ choxũ pexĩnüẽ ga yexguma yema ñachaxgu. Rũ ngẽxguma aixcüma choxũ pengechaũgu rũ tá petaãẽgũ ega nüxũ pecuẽxgu na Chaunatüçèx chataeguxũ, erũ Chau-natü rũ chorü yexera nixĩ.

<sup>29</sup> —Rũ naxũpa na nangupetüxũ i ngẽma, rũ pemaã nüxũ chixu na choxũ peyaxõgũxüçèx i ngẽxguma nangupetügu.

<sup>30</sup> —Marü tâütáma poraãcü pemaã chidexa, erũ marü ínangu i Chataná i ñoma i naãneãrũ ãẽxgacü ixĩxũ. Natürü nüma rũ taxuwama choxũ narüyexera.

<sup>31</sup> —Natürü ngẽma tá choxũ ngupetüxũ, rũ ngẽmaãcü tá nixĩ na guxüma i ñoma i naãnecũãx i duũxügu nüxũ nacuáxüçèx na choma rũ Chau-natüxũ na changechaũxũ, rũ chanaxüxũ i ngẽma nüma choxũ namuxũ. ¡Rũ ipechigü, rũ ngĩxã ítixĩ! —ñanagürü ga Ngechuchu.

## 15

### *Ubanegu nügü nangu ga Ngechuchu*

<sup>1</sup> Rũ ñanagürü ga Ngechuchu: —Choma nixĩ i ñoma wüxi i ubanerüũ chiĩxũ rũ Chaunatü nixĩ ya norü yora ixĩcü i ngẽma uba.

<sup>2</sup> —Rũ chorü duũxügu rũ ngẽma ubachacüügürü nixĩgü. Rũ ngẽma ubachacüü i tama oxü, rũ norü yora rũ nayadae. Natürü ngẽma nachacüü i oxü, rũ meã nanamexẽetanü na yexeraãcü poraãcü naxoxüçèx.

<sup>3</sup> —Pema rũ marü pime, yerü naga pexĩnüẽ ga yema ore ga pexũ changúexẽxũ.

4—Rü name nixĩ i guxũguma chowa peyaxũxgũ, ngẽma na choma rü pewa chayaxũxũrũũ. Erũ wũxi i ubachacũũ rü tama nüxĩca naxo, ega tama nanewa yaxũxgux. Rü ngẽxgumarũũ ta i pema rü taxuacũma chauxcèx pemaxẽ, ega tama chowa peyaxũxgũechagu.

5—Choma nixĩ i ubane, rü pema i nachacũügũ. Rü yĩxema chowa yaxũẽchaxe rü choma i tũmawa, rü aixcũma tá chauxcèx tamaxũ. Rü ngẽmaãcü wũxi i ubachacũũ i oxũrũũ tá tixĩ. Natürũ ngẽxguma tama chowa peyaxũxgũechagu, rü taxucürũwama tacü pexũe.

6—Rü texé ya tama chowa yaxũẽchaxe rü tá ítatèxũchi. Rü wũxi i ubachacũũ i daexũ rü ipaxũ rü iguxũrũũ tá tixĩ, rü ngẽxma tá tayarũxo.

7—Rü ngẽxguma chowa peyaxũxgũechagu rü taguma nüxũ ipeyarũngũmaẽgu i ngẽma ore i pexũ changúexẽexũ, rü marũ name i naxcèx ípeca i tacü i penaxwèxexũ, rü choma rü tá pexna chanaxã.

8—Rü ngẽxguma aixcũma meã chauxcèx pemaxẽgu, rü Chaunatũxũ tá nicuèxũũgũ i duũxũgũ. Rü ngẽmaãcü aixcũma chorũ ngúexũgũ tá pixĩgũ.

9—Choma rü pexũ changechaũ ngẽma na Chaunatũ choxũ ngechaũxũrũũ. Rü chanaxwèxe i aixcũma meã chauga pexĩnũẽẽcha, erũ choma rü guxũguma pexũ changechaũ.

10—Choma rü naga chaxĩnü i Chaunatũarũ mugũ rü nüma rü guxũguma choxũ nangechaũ. Rü ngẽxgumarũũ tá ta nixĩ ega naga pexĩnũẽgu i chorũ mugũ, rü guxũgutãma pexũ changechaũẽcha.

11—Choma rü ngẽmaãcü pemaã nüxũ chixu na wũxigu chomaã petaãẽgũxũcèx. Rü ngẽmaãcü tá



aixcūma petaãēgū.

12 –Rū choma pexū chamu na pemüçügüxū pengechaŭgüxüçèx, ngēma choma na pexū changechaŭxürüŭ.

13 –Rū ngēxguma wüxie aixcūma tümamüçüxū ngechaŭgu, rü nüxū tangechaŭãma rü nüetama ega woo tümamüçüçèx tayuxgu. Rū nataxuma i to i ngechaŭ i ngēmaârü yexera.

14 –Pema rü chomüçügü pixīgü i ngēxguma chauga pexīnüēgu.

15 –Choma rü marü tama chorü duŭxügümareãcü pexū chaxu. Erü wüxi i coriarü duŭxümare rü tama nüxū nacuèx i ngēma norü cori üxū. Natürü ñuxma rü chomüçügümaã pexū chaxu, erü pexū nüxū chacuèxēē i guxūma i ore ga Chaunatü chomaã nüxū ixuxū.

16 –Pema rü tama pexira chauxçèx pedaugü, natürü chaxira nixī ga pexçèx chadauxū rü pexū chamuxū na aixcūma chauxçèx pemaxèxüçèx rü chauxütawa penagagüxüçèx i muxūma i duŭxügü na guxüguma choxū yaxōgüãxüçèx. Rū Chaunatü ya Tupana tá pexna nanaxã i guxūma i tacü i chauégagu nüxna naxçèx peçaxū.

17 –Rü ngēma nixī i pexū chamuxū na pemüçügüxū pengechaŭgüxüçèx.

*Ñoma i naãnecüãx i duŭxügü rü Ngechuchuchi rü norü ngüexügüchi naxaie*

18 –Ngēxguma ñoma i naãnecüãx i duŭxügü pexchi aiegu, rü ñuxna pecuèxãchie ga chaxira chauxchi na naxaiexū!

19 –Rü ngēxguma chi ñoma i naãnecüãx i duŭxügürüŭ pixīgügu, rü ñoma i naãnecüãx

i duŭxŭgŭ rŭ chi pexŭ nangechaŭgŭ ngĕma natanŭxŭgŭxŭ na nangechaŭgŭxŭrŭŭ. Natŭrŭ choma nixĭ ga pexcĕx chadauxŭ natanŭwa ga ñoma ga naānecŭāx ga duŭxŭgŭ. Rŭ ngĕmacĕx nixĭ i pexchi naxaieŭ, erŭ marŭ tama naxrŭŭ pixĭgŭ.

<sup>20</sup> —iNŭxna pecuĕxāchie ga pemaā ñachagu:

“Taxuxŭma i wŭxi i coriarŭ duŭxŭ rŭ norŭ coriĕtŭwa nŭgŭ nangexmaxĕĕ”, ñachagu! Rŭ yema na chauxchi na naxaieŭ, rŭ pexchi rŭ tá ta naxaie. Rŭ yexguma chi chauga naxĭnŭĕgu rŭ ñuxma rŭ chi ta pega naxĭnŭĕ.

<sup>21</sup> —Rŭ ngĕmaācŭ ta chaugagu pexchi naxaie i ñoma i naānecŭāx i duŭxŭgŭ erŭ tama nŭxŭ nacuĕxgŭ ya Chaunatŭ ga nŭma choxŭ mucŭ.

<sup>22</sup> —Rŭ ngĕxguma chi choma tama namaā chanangoxĕĕgu na ñuxācŭ chixri na namaxĕxŭ, rŭ tāŭ chima nŭxŭ nacuĕxgŭ ga pecadu na naxŭgŭxŭ. Natŭrŭ ñuxma namaā nŭxŭ na chixuxŭ na ñuxācŭ chixri namaxĕxŭ, rŭ ngĕmacĕx i ñuxma rŭ taxuacŭma nŭxŭ nixugŭ na yangearŭ pecaduāxŭ.

<sup>23</sup> —Rŭ guxŭma i duŭxŭgŭ i chauxchi aieŭ rŭ Chaunatŭchi rŭ ta naxaie.

<sup>24</sup> —Rŭ ngĕma duŭxŭgŭpĕxewa rŭ Tupanaārŭ poramaā chanaxŭ i mexŭgŭ i taxŭ i taguma texĕ ya togue ŭxŭ. Rŭ ngĕxguma chi tama napĕxewa chanaxŭxgu i ngĕma mexŭgŭ rŭ tāŭ chima Tupana namaā nanaxuegu na nagagutama yapecaduāxgŭxŭ. Natŭrŭ na woo marŭ nŭxŭ nadaugŭxŭ i ngĕma mexŭgŭ i taxŭ i Tupanaārŭ poramaā chaxŭxŭ, rŭ ngĕxguma rŭ ta chauxchi naxaieama rŭ Chaunatŭchi rŭ ta naxaie.

<sup>25</sup> —Natŭrŭ ngĕmaācŭ nangupetŭ erŭ Tupana nayanguxĕĕchaŭ i norŭ ore i ũmatŭxŭ i ñaxŭ:

“Chauxchi naxaie woo taxuŭma i chixexŭ  
chaxŭxgu”,

ñaxŭ.

<sup>26</sup> —Natürŭ choma rŭ tá Chaunatuégagu pexcèx  
núma chanamu i perŭ ngŭxèẽruŭ i Tupanaãe i  
Üünexŭ i tá pexŭ nüxŭ cuèxèẽxŭ i ore i aixcŭma  
ixixŭ. Rŭ núma tá nixĩ i meãma pemaã nüxŭ  
yaxuxŭ i chauchiga.

<sup>27</sup> —Rŭ pema rŭ tá ta chauchigaxŭ pixugŭe, yerŭ  
noxri ichanaxŭgŭgu ga duŭxŭgŭmaã nüxŭ na chix-  
uxŭ ga chorŭ ore, rŭ woetama marŭ chauxŭtawa  
peyexmagŭ —ñanagŭrŭ ga Ngechuchu.

## 16

<sup>1</sup> Rŭ Ngechuchu rŭ ñanagŭrŭ nüxŭ: —Rŭ pe-  
maã nüxŭ chixu i ñaã ore na tama nüxŭ na  
perŭxoexŭcèx na choxŭ peyaxŭgŭxŭ.

<sup>2</sup> —Rŭ ngutaquẽxepataŭgŭwa tá pexŭ ínawoxŭ.  
Rŭ aixcŭma tá nawa nangu na texé pexŭ dèixŭ rŭ  
tá nagu tarŭxinŭxŭ na ngẽmaãcŭ mexŭ Tupanacèx  
taxŭxŭ.

<sup>3</sup> —Rŭ ngẽmaãcŭ tá pemaã namaxè i duŭxŭgŭ,  
erŭ taguma nüxŭ nacuèxgŭ ya Chaunatu, rŭ choxŭ  
rŭ ta tama nacuèxgŭ.

<sup>4</sup> —Rŭ pemaã nüxŭ chixu i ñaã ore i ñuxmax,  
na nüxna pecuèxãchiexŭcèx i ngẽxguma yixcŭra  
ngẽmaãcŭ pexŭ nangupetŭgu.

### *Tupanaãe i Üünexŭãrŭ puracŭchiga*

—Noxri rŭ tama pemaã nüxŭ chixu i ñaã ore,  
yerŭ petanŭgu charŭxãŭx.

<sup>5</sup> —Natürŭ i ñuxma rŭ tá pexna íchixŭ na  
Chaunatu ga núma choxŭ mucŭxŭtawa na

changẽxmaxũcèx. Rũ pema rũ taxúema choxna peca na ngextá tá na chaxũxũ.

6—Natürũ poraãcü pengechaũgũama erũ pemaã nüxũ chixu i ngẽma ore.

7—Natürũ aixcüma pemaã nüxũ chixu rũ pexcèx narũmemaẽ nixĩ na Chaunatũcèx chataeguxũ. Rũ ngẽxguma chi tama Chaunatũxũtawa chaxũxgu rũ tãũ chima núma naxũ i Naãẽ i Üünexũ i pexũ rüngũxẽxũ. Natürũ ngẽxguma ngema chaxũxgu rũ choma tá núma chanamu i Naãẽ i Üünexũ.

8—Rũ ngẽxguma Naãẽ i Üünexũ núma ũxgu rũ tá guxũ i duũxũgũxũ nüxũ nacuèxẽẽ na yapecaduãxgũxũ. Rũ tá nanangoxẽẽ i ñuxãcü na yĩxũ i ngẽma maxũ i Tupanapẽxewa aixcüma mexũ. Rũ tá duũxũgũxũ nüxũ nacuèxẽẽ na Tupana tá napoxcuexũ i duũxũgũ naxcèx i norũ pecadugũ.

9—Rũ nüma i Naãẽ i Üünexũ tá duũxũgũxũ nüxũ nacuèxẽẽ na pecaduãxgũxũ yĩxũ erũ tama choxũ nayaxõgũ.

10—Rũ tá nanangúexẽẽ i ñuxãcü na yĩxũ i ngẽma maxũ i Tupanapẽxewa aixcüma mexũ, erũ choma rũ tá Chaunatũxũtawa chaxũ, rũ pema rũ tãũtama marũ choxũ pedaugũ.

11—Rũ Naãẽ i Üünexũ tá duũxũgũxũ nüxũ nacuèxẽẽ na Tupana tá napoxcuexũ i duũxũgũ i chixexũ ügũxũ, erũ Tupana rũ namaã nanaxuegu na marũ napoxcuãxũ i Chataná i ñoma i naãnemaã icuáxũ.

12—Choma rũ choxũ nangẽxma i muxũma i to i ore i pemaã nüxũ chixuxchaũchiréxũ. Natürũ ega ñuxma chi pemaã nüxũ chixuxgu rũ tãũ chima

nüxů pecuèxgü.

13 —Rü Tupanaãē i Üünexů rü nüxů nixu i ore i aixcüma ixĩxůĩcatama. Rü ngëxguma núma naxůxgu rü nüma tá pexů nangúexëē i guxůma i ore i aixcüma ixĩxů. Erü nüma rü tama nüēchama tá nidexa, natürü ngēma ore i Chaunatüxůtawa rü chauxůtawa nüxů naxĩnüxůxůxica tátama nixu. Rü tá pexů nüxů nacuèxëē i guxůma i tacü i yixcúra tá ngupetüxů.

14 —Rü nüma rü tá choxů nataxëē, erü chauxůtawa tá nanayaxu i norü nguxëētae, rü ñuxůchi tá pexů nangúexëē namaã i ngēma nguxëētae.

15 —Guxůma i Chaunatüaxů ngëxmaxů rü choxrü ta nixĩ. Ngëmacèx pemaã nüxů chixu rü Naãē i Üünexů rü chauxůtawa tá nanayaxu i norü nguxëētae, rü ñuxůchi pexů tá namaã nangúexëē.

16 —Rü paxa täütáma choxů pedau. Natürü ngēmawena rü wena táxarü choxů pedau erü Chaunatüxůtawa tá chaxů —ñanagürü ga Ngechuchu.

*Ngema guxchaxůgü rü yixcüama rü tá taãxů nananguxuchi*

17 Rü yexguma ñuxre ga toma ga Ngechuchuarü ngúexůgü rü togüna tacagü, rü ñatarügügü: —¿Tacüchiga nixĩ na ngēma ñaxů:

“Rü paxa täütáma choxů pedaugü. Natürü ngēmawena rü wena táxarü choxů pedaugü”, ñaxů?  
¿Rü tacüchiga ta nixĩ na ñaxů:

“Choma rü Chaunatüxůtawa tá chaxů”, ñaxů?

18 —¿Rü tacüchiga ta nixĩ na ñaxů:

“Rü paxa täütáma choxŭ pedaugŭ”, ñaxŭ? Rü yixema rü tama nüxŭ tacuèxgüéga na tacüchigaxŭ tamaã yaxuxŭ —ñatarügügü.

19 Rü Ngechuchu rü nüxŭ nacuèxama ga nüxna na tacagüchaŭxŭ ga tomax. Rü yemacèx ñanagürü toxŭ: —Choma rü marü pemaã nüxŭ chixu rü paxa täütáma choxŭ pedau, natürü ngēmawena rü wena táxarü choxŭ pedau. ¿Rü ngēma dexacèxtama i pegüna pecagüxŭ?

20 —Rü aixcüma pemaã nüxŭ chixu rü pema rü tá pexauxe, rü tá pengechaŭgü. Natürü ñoma i nañecŭãx i duŭxŭgü rü tá nataãégü. Natürü woo pema tá pengechaŭgü, rü ngēma perü ngechaŭ rü tá taãxŭ nananguxuchi.

21 —Ngëxguma wüxi i nge íraxacüchaŭgu rü inaxixãchiãë, erü inguxneca. Natürü ngëxguma marü tabuxgu ya ngîrü õxchana, rü nüxŭ iyarüngüma na ñuxãcü poraãcü ngîxŭ na nanguxchiréxŭ i noxrix, erü tümamaã itaãë ya ngîrü õxchana.

22 —Rü ngëxgumarüŭ tá ta pexŭ nangupetü i pemax, erü ñuxma rü penaxixãchiãëgü. Natürü wena táxarü chataegu rü pexŭ íchayadau. Rü ngëxguma rü tá pexŭ nangëxma i wüxi i taãë i taxucürüwama texé pexna yaxuxŭ.

23 —Rü ngëxguma ínanguxgu tá i ngēma ngunexŭ na yanguxŭ i ñaã pemaã nüxŭ chixuxŭ, rü taxucèxtáma tacücèx choxna pecagü erü aixcüma Chaunatü tá nixŭ ya pexna naxãcü i guxŭma i tacü i chauégagu nüxna naxcèx pecaxŭ.

24 —Ñuxmarüta i pema rü taxuücèxma chauégagu ípecagü. ¡Naxcèx ípeca rü tá penayaxu i ngēma

naxcèx ípeçaxŭ! Rŭ ngẽmaãcŭ rŭ tá aixcŭma petaãẽgŭ.

*Ngechuchu rŭ marŭ nŭxŭ narŭyexera i guxŭma i tacŭ i ñoma i naãnewa ngẽxmaxŭ*

<sup>25</sup> —Ñŭxma rŭ cuèxruŭgŭgu chayaxuãcŭma pemaã nŭxŭ chixu i ore. Natŭrŭ nawa tá nangu i ngunexŭ i marŭ tãŭtãma ngẽmaãcŭ pemaã nŭxŭ chixu. Rŭ ngẽxguma rŭ tá noxtacŭma meã pemaã chanangoxẽẽ i Chaunatuçhiga.

<sup>26-27</sup> —Rŭ ngẽma ngunexŭgu i pema rŭ Chaunatuçtawata tá chauégagu naxcèx ípeca i tacŭ i penaxwèxexŭ. Rŭ taxucèxma tŭxcŭŭ choma tá Chaunatuçtawata pexŭ naxcèx íchaca, erŭ nŭmatama ya Chaunatu rŭ woetama pexŭ nangechaŭ, erŭ pema rŭ choxŭ pengechaŭ rŭ peyaxõgŭ na naxŭtawata ne chaxŭxŭ.

<sup>28</sup> —Chaunatuçtawata ne chaxŭ na ñoma ga naãnewa chaxŭxŭcèx. Rŭ ñŭxma rŭ tá nŭxna chataegu i ñoma i naãne na wenaxãrŭ Chaunatuçtawata chaxŭxŭcèx —ñanagŭrŭ.

<sup>29</sup> Rŭ yexguma ga toma ga norŭ ngúexŭgŭ rŭ ñatarŭgŭgŭ: —Ñŭxma waxi nixŭ i meãxŭchima tomaã cunangoxẽẽxŭ i curŭ ore i tomaã nŭxŭ quixuxŭ. Rŭ tama tacŭgu ixuxŭãcŭma tomaã nŭxŭ quixu.

<sup>30</sup> —Rŭ ñŭxma rŭ nŭxŭ tacuèx na aixcŭma guxŭxŭma na cucuáxŭ. Rŭ taxuacŭma texé ñŭxŭ ñatagŭrŭ cuxŭ. Rŭ ngẽmacèx nixŭ i tayaxõgŭxŭ na aixcŭma Tupanaxŭtawata na ne cuxŭxŭ —ñatarŭgŭgŭ.

<sup>31</sup> Rŭ Ngechuchu toxŭ nangãxŭ rŭ ñanagŭrŭ: —¿Aixcŭma peyaxõgŭxŭ i ñŭxmax?

32 –Rü nawa tá nangu i ngunexũ rü ñuxmatátama nixĩ i na pegü pewoonexũ. Rü wüxichigü i pema rü tá pepatawa pexĩ, rü chaxica tá nuã choxũ petêx. Natürü tama chaxica tá icharüxãũx, erü Chaunatü rü chauxütawa nangêxma.

33 –Rü guxũma i ñaã ore rü pemaã nüxũ chixu na chaugagu petaãëgüxcèx. Rü ñoma i naãnewa rü tá ngüxũ pinge. Natürü jpeporae! erü choma rü marü nüxũ charüyexera i guxũma i tacü i ñoma i naãnewa ngêxmaxũ –ñanagürü.

## 17

### *Ngechuchu rü norü ngúexũgücèx nayumüxê*

1 Rü yema ñaxguwena rü Ngechuchu daxũgu nadawenü, rü ñanagürü: –Pa Chaunatüx, marü nawa nangu i ngunexũ na chayuxũ. Rü chanaxwèxe na duũxũgüxũ nüxũ cucuèxëxũ na aixcüma choma rü cune chíxũ. Rü ngêmaãcü i choma rü tá nüxũ nüxũ chacuèxëê na cuma rü aixcüma Tupana na quiĩxũ.

2 –Erü marü guxũ i duũxũgüarü ãëxgacüxũ choxũ quixĩxëê, na chanamaxëxëxüxcèx i guxũma i duũxũgü i choxna cumugüxũ.

3 –Rü ngêma duũxũgü tá nüxũ nangêxma i maxũ i taguma gúxũ ega cuxũ nacuèxgügu na cuxicatama Tupana na quiĩxũ, rü choxũ nacuèxgügu na choma rü Cristu ga núma choxũ cumucü na chíxũ.

4 –Choma rü marü cuxũ chataxëê i ñoma i naãnewa rü chayanguxëê i guxũma i puracü ga nawa choxũ cumuxũ.



5 –Rü ñuxma Pa Chaunatux, rü chanaxwèxe i cuguxütawa choxũ cungẽxmaxẽẽ na choxũ nangẽxmaxũcèx ga yematama pora ga cumaã choxũ yexmaxũ ga noxri tauta naãne üxgu.

6 –Rü guxema duũxẽgü ya tüxũ quidexechege ga ñoma ga naãnewa na choxna tüxũ cumugüxcèx, rü marü tüxũ nüxũ chacuèxẽẽ i texé na quiĩxũ i cumax. Rü woetama cuxrügü tixĩgü rü cuma nixĩ ga choxna tüxũ cumugüxũ. Rü tümagü rü marü naga taxĩnüẽ i curü ore.

7 –Rü ñuxma rü marü nüxũ tacuèx rü guxüma i ngẽma choxna cuxãxũ, rü aixcüma cuxütawa ne naxũ.

8 –Rü choma rü marü tümamaã nüxũ chixu ga curü ore ga chomaã nüxũ quixuxũ. Rü tümagü rü marü tayaxõgü i ngẽma ore. Rü nüxũ ticuèxãchitanü na aixcüma cuxütawa na ne chaxũxũ i chomax. Rü tayaxõgü ga cuma núma choxũ na cumuxũ.

9 –Rü ngẽmacèx cuxna chaca na tüxũ na curüngüxẽxũcèx. Rü tama cuxna chaca na nüxũ curüngüxẽxũcèx i ñoma i naãnecũãx i duũxügü, natürü cuxna chaca na tüxũ curüngüxẽxũcèx ya guxema choxna tüxũ cumugüxe, erü curü duũxügü tixĩgü.

10 Rü guxãma ya yixema choxrügü ixĩgüxe rü cuxrügü tixĩgü. Rü guxãma ya cuxrügü ixĩgüxe rü choxrügü tixĩgü. Rü tümagagu rü duũxügü choxũ nicuèxüügü.

11 –Choma rü marü täütãma ñoma i naãnewa changẽxmaẽcha, natürü i tümagü rü ngẽmããcü ñoma i naãnewa tá tangẽxmagü ngẽxguma cuxütawa chaxũyane. Pa Chaunatü ya Üünecüx, rü

chanaxwèxe na curü pora ga choxna cuxãxümaã tüxna cudaduxü ya yíxema choxna tüxü cumugüxe, na ngẽmaãcü guxãma wüxigu rüxĩnũëxüçèx, ngẽma cuma rü choma na wüxigu rüxĩnũëxürüü.

12 –Rü yexguma guxema choxna tüxü cumugüxetanüwa chayexmagu ga ñoma ga naãnewa, rü curü pora ga choxna cuxãxümaã tüxna chadau rü tüxü íchapoxü. Rü taxúema ga guxema choxna tüxü cumugüxe rü itayarütauxe. Rü Yuda ga woetama iyarütaxuxüxicatama inayarütaxu na yanguxüçèx i curü ore i ümatüxü.

13 –Rü ñuxma rü cuxütawa tá chaxü. Natürü ñomarüta ñoma i naãnewa changẽxma-yane rü nüxü chixu i ñaã curü ore na tümagü rü ta tüxü nangẽxmaxüçèx i ngẽma taãë i aixcüma ixĩxü i choma choxü ngẽxmaxü.

14 –Choma rü marü tümamaã nüxü chixu i curü ore. Natürü ñoma i naãnecüãx i duüxügü rü tümachi naxaie, erü tüma rü tama naxrüü tixĩgü, ngẽxgumarüü i choma rü tama ñoma i naãnecüãxrüü chixĩ.

15 –Tama cuxna tümacèx chaca na tüxü na quigagüxüçèx i ñoma i naãnewa. Natürü cuxna chaca na tüxü na ícupoxüxüçèx nüxna i ngoxo i Chataná.

16 –Choma rü tama ñoma i naãnecüãx chixĩ. Rü tümagü rü ta tama ñoma i naãnecüãx tixĩgü, erü cuxrügü tixĩgü i ñuxmax.

17 –Curü ore rü aixcüma nixĩ. Rü chanaxwèxe i tüxü cungüexëë i curü ore, na aixcüma cupèxewa tixüünexüçèx ya yíxema choxna tüxü cumugüxe.

18 –Rü yexgumarüü ga ñoma ga naãnecüãx ga duüxügütanüwa choxü na cumuxürüü, rü

ngëxgumarüŮ i choma rü ta ñoma i nañnecŮãx i duŮxŮgŮ-tanüwa tüxŮ chamugŮ.

19 —Rü tŮmagagu chaugŮ ichaxã na tüxŮ changŮexëexŮcèx i curü ore i aixcŮma ixŮxŮ, na cupëxewa tixŮünexŮcèx ya yŮxema choxna tüxŮ cumugŮxe.

20 —Natürü tama yŮxema ñŮxma yaxŮgŮxecèxicatama cuxna chaca. Natürü cuxna chaca ta tŮmacèx ya yŮxema yixcŮra tá yaxŮgŮxe nagagu i tŮmaärü ore ya yŮxema ñŮxma yaxŮgŮxe.

21 —Rü guxãma ya yŮxemacèx cuxna chaca na aixcŮma wŮxitama tixŮgŮxŮcèx. Rü ngëma cuma rü choma na wŮxitama ixŮgŮxŮrŮŮ, Pa ChaunatŮx, rü chanaxwèxe i guxãma i tŮma rü ta wŮxitama tixŮgŮ. Rü ngëmaãcü i ñoma i nañnecŮãx i duŮxŮgŮ, rü tá nayaxŮgŮ na cuma núma choxŮ cumuxŮ.

22 —Rü choma rü marü tüxna chanaxã i ngëmatama pora i cuma choxna cuxãxŮ na ngëmaãcü wŮxitama tixŮgŮxŮcèx ngëma cuma rü choma na wŮxitama ixŮgŮxŮrŮŮ.

23 —Rü chanaxwèxe na tŮmawa changëxmaxŮ rü cuma i chowa na cungëxmaxŮ na ngëmaãcü aixcŮma wŮxi-tama ixŮgŮxŮ i guxãma i yixema. Rü ngëmaãcü i ñoma i nañnecŮãx i duŮxŮgŮ rü tá nüxŮ nicuèxãchitanü na cuma núma choxŮ cumuxŮ, rü tá nüxŮ nicuèxãchitanü na tüxŮ cungechaŮxŮ ya yŮxema choxna tüxŮ cumugŮxe ngëma na choxŮ cungechaŮxŮrŮŮ.

24 —Pa ChaunatŮx, cuma choxna tüxŮ cumugŮ. Rü chanaxwèxe i chauxŮtawa tangëxmagŮ i ngëma tá íchangëxmaxŮwa, na nüxŮ tadaugŮxŮcèx i chorü pora ga choxna cuxãxŮ. Yerü choxŮ cungechaŮ ga yexguma tauta nañne ixŮgŮgumama.

<sup>25</sup> —Pa Chaunatü ya Mecüx, ñoma i naãnecüãx i duũxügü rü tama cuxü nacuèxgü. Natürü choma rü cuxü chacuèx. Rü yíxema choxna tüxü cumugüxe rü ta marü nüxü tacuèxgü na cuma núma choxü cumuxü.

<sup>26</sup> —Rü marü tüxü nüxü chacuèxêê na texé quiixü. Rü guxügutáma tüxü nüxü chicuèxêêãmachigü na cuma choxü cungechaũxürü tügü tangechaũgüxücèx rü choma rü tümaxütawa na changèxmaxüçèx — ñanagürü ga Ngechuchu.

## 18

### *Ngechuchuxü niyauxgü*

(Mt 26.47-56; Mr 14.43-50; Lc 22.47-53)

<sup>1</sup> Rü yema ñaxguwena ga Ngechuchu rü tomaã inaxüãchi, na Cheduruarü ngatexüãrü tocutüwa taxüçèx. Rü yéma nayexma ga wüxi ga nanetüñecü. Rü yemawa naxü ga Ngechuchu tomaã.

<sup>2</sup> Rü Yuda ga yema bexma cúãcü Ngechuchuxü íyaxuaxüxü rü nüxü nacuèx ga yema nachica, yerü Ngechuchu rü muèxpüxcüna yéma tomaã nangutaquèxexü.

<sup>3</sup> Rü yéma nangu ga Yuda namaã ga ñuxre ga churaragü rü ñuxre ga tupauca ga taxüñeãrü purichíagü ga yéma namugüxü ga paigüarü ãèxgacügü rü parichéugü. Rü meãma nixãxne, rü yéma nanangegü ga omügü.

<sup>4</sup> Natürü ga Ngechuchu rü marü nüxü nacuèx ga guxüma ga tacü tá nüxü na ngupetüxü. Rü yemacèx naxcèx nixü, rü nüxna naca, rü ñanagürü: —¿Texécèx nixí i pedaugüxü? —ñanagürü.

<sup>5</sup> Rŭ nŭmagŭ rŭ Ngechuchuxŭ nangãxŭgŭ, rŭ ñanagŭ-rŭgŭ: —Nacharétucŭãx i Ngechuchucèx nixĩ i tadaugŭxŭ —ñanagŭrŭgŭ. Rŭ Ngechuchu nanangãxŭ, rŭ ñanagŭrŭ: —Choma chixĩ —ñanagŭrŭ. Rŭ Yuda ga bexma cúãcŭ ínaxuaxŭxŭ rŭ yema churaragŭtanŭwa nayexma.

<sup>6</sup> Rŭ yexguma yema ñaxgu ga Ngechuchu: “Choma chixĩ”, ñaxgu, rŭ nŭgŭweama nacaixŭtanŭ ga yema churaragŭ, rŭ yexma nayayi.

<sup>7</sup> Rŭ yexguma ga Ngechuchu rŭ wena nŭxna naca, rŭ ñanagŭrŭ: —¿Texécèx nixĩ i pedaugŭxŭ? —ñanagŭrŭ. Rŭ nŭmagŭ rŭ nanangãxŭgŭ rŭ ñanagŭrŭgŭ: —Nacharétucŭãx i Ngechuchucèx nixĩ i tadaugŭxŭ —ñanagŭrŭgŭ.

<sup>8</sup> Rŭ Ngechuchu rŭ wenaxãrŭ ñanagŭrŭ nŭxŭ: —Marŭ pemaã nŭxŭ chixu rŭ choma chixĩ. Rŭ ngẽxguma chauxcèx pedaugŭgu rŭ ¡ípeyaxĩxẽẽ i ñãã chorŭ ngúexŭgŭ! —ñanagŭrŭ.

<sup>9</sup> Rŭ yemaãcŭ nangupetŭ na yanguxŭcèx ga norŭ ore ga nŭmatama ga Ngechuchu nŭxŭ yaxuxŭ ga ñaxgu:

“Yíxema Chaunatŭ choxna tŭxŭ mugŭxe rŭ taxúetáma itayarŭtauxe”, ñaxgu.

<sup>10</sup> Rŭ Chimáũ ga Pedru rŭ nŭxŭ iyexma ga wŭxi ga cŭxchi. Rŭ ngĩxŭ nayaxu ga norŭ cŭxchi rŭ yemamaã ínadaechinŭ ga paigŭarŭ ãẽxgacŭarŭ duŭxŭ ga Macugu ãegaxŭ. Rŭ norŭ tŭgŭnechinŭ ínadae.

<sup>11</sup> Natŭrŭ ga Ngechuchu rŭ Pedruxŭ ñanagŭrŭ: —¡Ngĩxchixŭgu ngĩxŭ ixŭcuchi i curŭ cŭxchi! ¿Tama ěxna nŭxŭ cucuèx na choma rŭ tá ngúxŭ chingexŭ ngẽma Chaunatŭ chomaã naxueguxŭrŭ? —ñanagŭrŭ.

*Anápatawa Ngechuchuxũ nagagũ*  
(Mt 26.57-58; Mr 14.53-54; Lc 22.54)

<sup>12</sup> Rũ yexguma ga churaragũarũ ãëxgacũ, namaã ga norũ churaragũ rũ tupaucaarũ purichíagũ, rũ Ngechuchuxũ niyauxgũ. Rũ nayanèixchacũgũ.

<sup>13</sup> Rũ noxri rũ ãëxgacũ ga Anápatawa nanagagũ. Rũ Aná rũ Caipánèxtũ nixĩ. Rũ guma taunecũgu ga Caipá rũ paigũeru nixĩ.

<sup>14</sup> Rũ yema Caipá nixĩ ga ũpaacũ yema Yudíugũarũ ãëxgacũgũmaã nũxũ ixuxũ ga na namemaëxũ ga wũxitama ga yatũ guxũma ga Yudíugũcèx na yuxũ.

*Pedru rũ Ngechuchuxũ nixã*  
(Mt 26.69-70; Mr 14.66-68; Lc 22.55-57)

<sup>15</sup> Rũ choma rũ Chimáũ ga Pedru rũ wũxigu Ngechuchuwe tarũxĩ. Rũ yema paigũarũ ãëxgacũ rũ choxũ nacuèx. Rũ yemacèx ga choma rũ wũxigu Ngechuchumaã tichocu ga ãëxgacũpataèxtũwa.

<sup>16</sup> Natürũ ga Pedru rũ ãëxãrũ düxétũgutama narũxãũx. Rũ yemacèx íchaxũxũ ga choma, rũ yema ãëxãrũ dauruũ ga ngecũmaã chayarũdexa rũ yexguma Pedruxũ iyamucuchi.

<sup>17</sup> Rũ yexguma ga yema ngecũ ga ãëxãrũ dauruũ, rũ Pedruna ica, rũ ngĩgürũgũ: —¿Tama èxna cuma rũ ta wũxi i norũ ngúexũ quiixũ i ngẽma yatũ i yayauxgũxũ? —ngĩgürũgũ. Rũ Pedru ngĩxũ nangãxũ, rũ ñanagürũ: —Tama nixĩ —ñanagürũ.

<sup>18</sup> Rũ yema ãëxãrũ rũ ãëxgacũarũ duũxũgũ rũ purichíagũ rũ nanaxũgũ ga wũxi ga üxũ, yerũ nagáuane. Rũ guma üxüxetũarũ ngaicamagu

nachigü, rü yéma nügü ninaixügü. Rü Pedru rü ta yéma nügü nanaixü naxëtüwa ga guma üxü.

*Paigüarü äëxgacü rü Ngechuchuna naca  
(Mt 26.59-66; Mr 14.55-64; Lc 22.66-71)*

19 Rü yema paigüarü äëxgacü rü inanaxügü ga Ngechuchuna na naçaxü, rü ñanagürü: —¿Tacü nixi ga duüxügüxü namaã cungúexëëxü? ¿Rü texégü tixi ya yixema curü ngúexügü? —ñanagürü.

20 Rü Ngechuchu ñanagürü nüxü: —Choma rü guxü ga duüxügüpëxewa nüxü chixu ga chorü ore. Rü ngutaquëxepataügüwa rü tupauca ya taxünewa i ngextá guxüma i Yudíugü íngutaquëxegüxüwa chanangúexëë ga duüxügü. Rü yemaäcü taxüma ichicux ga chorü ore.

21 —¿Rü tüxcüü i choxna cuçaxü i ñuxmax? Êcü, jnüxna naca i ngëma duüxügü ga nüxü ñnüëxü ga chorü ore! Rü nümagü tá cumaã nüxü nixugüe ga tacüchigaxü namaã na chixuxü. Erü nümagü rü nüxü nacuëxgü i guxüma ga tacü ga namaã nüxü chixuxü —ñanagürü.

22 Rü yexguma Ngechuchu yema ñaxgu, rü wüxi ga tupauca ga taxüneärü purichía ga naxütagu chixü, rü Ngechuchuchiwegu nidagü. Rü ñanagürü Ngechuchuxü: —¿Tüxcüü ngëmaäcü cunangãxü ya daa paigüarü äëxgacü? —ñanagürü.

23 Rü Ngechuchu nanangãxü rü ñanagürü: —Rü ngëxguma tacü rü chixexüxü chixuxgu, jrü nüxü ixu na ñuxäcü chixri na chidexaxü! Natürü ega chorü ore rü aixcüma yixígu, rü ¿tüxcüü i choxü quidagüxü i ñuxmax? —ñanagürü.

24 Rŭ yexguma ga Aná rŭ Ngechuchuxŭ yanáĩcŭma paigŭarŭ ãĕxgacŭ ga Caipáxŭtawa nanamu.

*Pedru rŭ wenaxãrŭ tama Ngechuchuxŭ nacuĕxneta*

*(Mt 26.71-75; Mr 14.69-72; Lc 22.58-62)*

25 Rŭ yoxni ga Pedru rŭ ũxŭarŭ ngaicamagu nachiecha, rŭ yĕma nŭgŭ nanaĩxŭãma. Rŭ yema yĕma yexmagŭxŭ rŭ nŭxna nacagŭe, rŭ ñanagŭrŭgŭ: —¿Tama ĕxna cuma rŭ ta norŭ ngŭexŭ quiĩxŭ i ngĕma yatŭ i yayauxgŭxŭ? —ñanagŭrŭgŭ. Natŭrŭ ga Pedru rŭ tama nŭgŭ nixu, rŭ ñanagŭrŭ: —Tama nixĩ —ñanagŭrŭ.

26 Rŭ yĕma nayexma ga wŭxi ga paigŭarŭ ãĕxgacŭarŭ duŭxŭ. Rŭ yema rŭ Pedru ídaechinŭxŭtanŭxŭ nixĩ. Rŭ Pedruna naca, rŭ ñanagŭrŭ: —¿Tama ĕxna cuma yĩxŭ ga nanetŭnecŭwa Ngechuchumaã cuxŭ chadauxŭ? —ñanagŭrŭ.

27 Rŭ Pedru rŭ wena tama nŭgŭ nixu. Rŭ yexgumatama nica ga otá.

*Ngechuchu rŭ Piratu- pĕxewa nayexma*

*(Mt 27.1-2, 11-14; Mr 15.1-5; Lc 23.1-5)*

28 Rŭ yexguma Ngechuchumaã nŭxŭ nachauegu ga nŭxna na nacagŭxŭ, rŭ Caipápatawa ínanagaxŭchigŭ rŭ Yudĕaaneãrŭ ãĕxgacŭ ga Dumacŭãxpatawa nanagagŭ. Natŭrŭ marŭ ningóonechaŭ ga yexguma rŭ yemacĕx ga yema Yudŭgŭ rŭ tama guma ãĕxgacŭpatagu nachocu, yerŭ norŭ mugŭ nŭxŭ nixu rŭ taxŭ ga pecadu nixĩ na wŭxi ga Dumacŭãxpatagu na nachocuxŭ ga yema ngunexŭgu. Rŭ yemaãcŭ tama



Tupanapēxewa nügü nixüxaarü maxüãxēēgüchaŭ, yerü yexguma nügü yaxüxaarü maxüãxēēgügu, rü taxucürüwa nanangōxgü ga òna ga Üpetüchigaarü petacèx namexēēxü.

<sup>29</sup> Rü yemacèx ga guma ãëxgacü ga Dumacüãx ga Piratu rü napatawa ínaxüxü ga duüxügümaã na yadexaxüçèx. Rü ñanagürü nüxü: —¿Tacücèx ípenaxuaxü ya daa yatü? —ñanagürü.

<sup>30</sup> Rü nümagü rü Piratuxü nangãxügü, rü ñanagürügü: —Ngëxguma chi tama wüxi i taxü i chixexü naxüxgu, rü tãu chima cuxütawa tanaga —ñanagürügü.

<sup>31</sup> Rü yexguma ga Piratu rü ñanagürü nüxü: —¿Ëcü perü ãëxgacügüxütawa penaga, rü perü mugü pemaã nüxü ixuxüãcüma penapoxcux! —ñanagürü. Natürü ga yema Yudíugü rü Piratuxü nangãxügü, rü ñanagürügü: —Natürü pema i Dumacüãxgü rü marü toxna penachuxu na texéxü timèxgüxü tümaãrü chixexüçèx —ñanagürügü.

<sup>32</sup> Rü yemaãcü ningu ga yema ore ga Ngechuchu üpaacü nüxü ixuxü ga ñuxãcü tá na nayuxü.

<sup>33</sup> Rü Piratu rü wenaxãrü napatagu naxücu, rü Ngechuchucèx nangema. Rü nüxna naca, rü ñanagürü: —¿Cuma yíixü i Yudíugüarü Æëxgacü quiixü? —ñanagürü.

<sup>34</sup> Rü Ngechuchu ñanagürü nüxü: — ¿Cuechamatama i nagu curüxínüxü na ngëmaãcü choxna cuçaxü, rü éxna togü marü cumaã nüxü nixu na ngëmaãcü choxna cuçaxüçèx? —ñanagürü.

<sup>35</sup> Rü Piratu Ngechuchuxü nangãxü, rü ñanagürü: —¿Éxna cuma nagu curüxínügu rü Yudíu chíixü? Rü ngëma cuchiüãnecüãxgü rü paigüarü

ãĕxgacügütama nixĩ i chauxütawa cuxũ gagüxũ.  
¿Ĕxna tacü rü chixexũ cuxü? —ñanagürü.

<sup>36</sup> Rü yexguma ga Ngechuchu rü nanangãxũ, rü ñanagürü: —Choma rü tama ñoma i naãnewa ãĕxgacü chixĩ. Rü ngĕxguma ñoma i naãnewa ãĕxgacü chixĩgu, rü chorü duũxũgü rü chi Yudíugüarü ãĕxgacügümaã nügü nadai rü tãũ chima choxũ niyauxgü i ngĕxguma. Natürü tama ñoma i naãnewa ãĕxgacü chixĩ —ñanagürü.

<sup>37</sup> Rü yexguma ga Piratu rü ñanagürü nüxũ: —¿Ĕxna to i nachiuãneãrü ãĕxgacü quixĩ i cumax? —ñanagürü. Rü Ngechuchu nanangãxũ rü ñanagürü: —Cumatama marü nüxũ quixu na ãĕxgacü chiĩxũ. Rü yemacèx ga choma rü chabu rü ñoma ga naãnewa chaxũ na duũxũgümaã nüxũ chayarüxuxüçèx i ore i aixcüma ixĩxũ. Rü guxãma ya texé ya nüxũ cuáxchaũxê i ngĕma ore i aixcüma ixĩxũ, rü choxũ itarüxĩnüë i ngĕma ore i nüxũ chixuxũ —ñanagürü.

<sup>38</sup> Rü Piratu rü ñanagürü nüxũ: —¿Tacü nixĩ i ngĕma ore i aixcüma ixĩxũ? —ñanagürü.

*Ngechuchumaã nanaxuegu na yamèxgüãxũ  
(Mt 27.15-31; Mr 15.6-20; Lc 23.13-25)*

Rü yemaãcü Ngechuchuna nacaxguwena ga Piratu, rü wenaxãrü Yudíugümaã nayarüdexa. Rü ñanagürü nüxũ: —Taxuũma i chixexũxũ nawa chadau i ñaã yatü. ¿Rü tüxcüũ chi inapoxcuxũ?

<sup>39</sup> —Natürü guxũguma ega Üpetüchigaarü petawa nanguxgu, rü pecüma nixĩ na choxna naxcèx na pecaxũ na íchananguxuchixẽẽxüçèx i wüxi i duũxũ i poxcuxũ. ¿Rü penaxwèxexũ na pexcèx

íchananguxuchixẽẽxũ i ñaã perü ãẽxgacü, Pa Yudíugüx? —ñanagürü.

<sup>40</sup> Rũ yexguma ga guxũma ga yema duũxũgũ, rũ tagaãcü aita naxũe, rũ ñanagürügü: —Tama tanaxwèxe na cuya-ngéxũ i ngẽma yatü. Rũ Barabá waxi nixĩ i tanaxwèxexũ na cuyangéxũ —ñanagürügü. Rũ yema Barabá rũ wüxi ga máẽtaxũ nixĩ.

## 19

<sup>1</sup> Rũ yexguma ga Piratu rũ churaragüxũ namu na Ngechuchuxũ naçuaixgüxũcèx.

<sup>2</sup> Rũ yema churaragü rũ chuchuxũwa nanaxügü ga wüxi ga boxũ, rũ ñuxũchi naẽruwa nayangèxcuchigü. Rũ wüxi ga máxũ ga naxchiru ga daucharaxũgu nayacuxẽẽgü.

<sup>3</sup> Rũ ñuxũchi naxcèx naxĩ, rũ nüxũ nacugüeãcüma ñanagürügü nüxũ: —¡Namaxũ, Pa Yudíugüarü ãẽxgacüx! —ñanagürügü. Rũ nanapechiwegü.

<sup>4</sup> Rũ Piratu rũ wenaxãrũ düxétüwa naxũ, rũ Yudíugüxũ ñanagürü: —¡Dücèx! ñuxma tá nuã pepẽxewa chanaga na nüxũ pecuáxũcèx na taxuũma i chixexũxũ nawa chadauxũ —ñanagürü.

<sup>5</sup> Rũ düxétüwa naxũ ga Ngechuchu. Rũ namaã nangèxcueru ga yema boxũ ga chuchuxũwa naxügüxũ. Rũ nagu nicux ga yema máxũ ga naxchiru ga daucharaxũ. Rũ yex-guma ga Piratu rũ Yudíugüxũ ñanagürü: —Daa nixĩ ya yima yatü —ñanagürü.

<sup>6</sup> Natürü yexguma Ngechuchuxũ nadaugügu ga paigüarü ãẽxgacügü rũ purichíagü, rũ inanaxügüe ga aita na naxüexũ. Rũ ñanagürügü: —¡Curuchawa

yapota! ¡Curuchawa yapota! —ñanagürügü. Rū Piratu rü ñanagürü nüxü: —¡Ëcü, peyaga rü pe-matama curuchawa peyapota! Erü choma rü taxuüma i chixexüxü nawa chadau —ñanagürü ga Piratu.

<sup>7</sup> Natürü ga yema Yudíugü rü Piratuxü nangãxügü, rü ñanagürügü: —Toma toxü nangëxma i wüxi i torü mu. Rü ngëma torü mu toxü nüxü nacuëxëë na namexü na nayuxü i ñaã yatü, yerü nüma rü nüxü nixu ga Tupana Nane na yüxü —ñanagürügü.

<sup>8</sup> Rū yexguma yemaxü naxĩnügu ga Piratu, rü yexeraãcü namuü.

<sup>9</sup> Rū wena Ngechuchumaã napatagu naxücu. Rū yéma Ngechuchuna nayaca, rü ñanagürü: —¿Ngextácüãx quixĩ i cumax? —ñanagürü. Natürü ga Ngechuchu rü tama nanangãxü.

<sup>10</sup> Rū yexguma ga Piratu rü Ngechuchuxü ñanagürü: —¿Ëxna ngëma täütáma choxü cungãxü? ¿Tau ëxna i nüxü cucuáxü na choxmëxwa cungëxmaxü na curuchawa cuxü chipotaxü rü ëxna cuxü na íchanguxuchixëëxüçëx? —ñanagürü.

<sup>11</sup> Rū Ngechuchu nanangãxü, rü ñanagürü: —Tãü chima cuxmëxwa changëxma, ega tama Tupana naxwëxegu. Rū ngëmacëx nixĩ i ngëma duüxügü i cuxna choxü mugüxü rü curü yexera poraãcü napacaduãxgü —ñanagürü.

<sup>12</sup> Rū yemawena rü Piratu nagu narüxĩnü ga ñuxãcü Ngechuchuxü na ínanguxuchixëëgaxü. Natürü yema Yudíugü rü poraãcü aita naxüe, rü ñanagürügü: —Ngëxguma tá ícunanguxuchixëëxgu rü tama curü ãëxgacü ya tacü ya Dumacüãx ya

Chécharuxŭ cungechaŭ. Erü ngexerŭxe ya ãëxgacü ya tacüxŭ tügü ingucuchixëxë, rü Dumacŭãx ya ãëxgacü ya tacü ya Chécharuarü uwanü tixĩ — ñanagürügü.

13 Rŭ yexguma yemaxŭ naxĩnŭgu ga Piratu, rü churaragüxŭ namu ga Ngechuchuxŭ düxétüwa na nagagüxŭcèx. Rŭ nawa nayarŭto ga wüxi ga tochicaŭ ga taxŭ ga nutagünaxcèx ga togawa rü Gabatagu äegaxŭ. Rŭ yema nachicawa nixĩ ga poxcuexŭ ga duŭxŭgüna naçaxŭ ga ãëxgacü.

14 Rŭ wüxi ga ngunexŭ nataxu ga Üpetüchigaarü petawa na nanguxŭ ga yexguma, rü marü tocuchiwa nangu. Rŭ Piratu rü Yudíugüxŭ ñanagürü: —¡Daa nixĩ ya yima perü ãëxgacü! ñanagürü.

15 Natürü ga nŭmagü rü aita naxüe, rü ñanagürügü: —Tanaxwèxe na nayuxŭ. Rŭ ¡curuchawa yapota! —ñanagürügü. Rŭ Piratu nŭxna naca rü ñanagürü nŭxŭ: —¡Ñuxãcü i choma rü ichanamu na curuchawa yapotagüãxŭcèx ya perü ãëxgacü? —ñanagürü. Natürü ga paigüarü ãëxgacügü rü Piratuxŭ nangãxŭgü, rü ñanagürügü: —Yima ãëxgacü ya tacü ya Chécharu ya Dumawa ngëxmacü rü yima nixĩ ya torü ãëxgacü, rü nataxuma i to —ñanagürügü.

16 Rŭ yexguma ga Piratu rü yema Yudíugüna Ngechuchuxŭ namu na curuchawa yapotagüãxŭcèx. Rŭ nŭmagü rü nayagagü.

*Curuchawa Ngechuchuxŭ nipotagü*

*(Mt 27.45-56; Mr 15.33-41; Lc 23.44-49)*

17 Rŭ ínaxŭxŭ ga Ngechuchu, rü norü curucha ngŭxŭ ininge. Rŭ yéma nanagagü nawa ga wüxi ga

nachica ga “Duŧxēēruchinèxãgu” ãegaxŧ. Rŧ yema rŧ Górguta nixŧ ga naega ga togawa.

18 Rŧ yéma curuchawa Ngechuchuxŧ nayarŧpotagŧ. Rŧ Ngechuchurŧ curuchawa nayapotagŧ ga taxre ga to ga yatŧgŧ, rŧ wŧxi ga norŧ tŧgŧnecŧwawa rŧ to ga norŧ toxwecŧwawa.

19 Rŧ Piratu rŧ churaragŧxŧ namu na Ngechucharŧ curuchatapēxewa na yapocuchigŧãxŧcèx ga wŧxi ga mŧrapewaxacŧ ga ãegatachinŧxŧ ga ñaxŧ:

“Ngechuchu ya Nacharétucŧãx ya Yudŧgŧarŧ ãēxgacŧ”, ñaxŧ.

20 Rŧ muxŧma ga yema Yudŧgŧ nŧxŧ nadaumatŧ ga yema namatŧ ga mŧrapewaxacŧgu ŧxŧ. Yerŧ yema nachica ga Ngechuchuxŧ curuchawa íyanapotagŧxŧwa, rŧ ñãneãrŧ ngaicamana nixŧ. Rŧ tomaēxpŧx ga nagawa naxŧmatŧ ga yema naega ga yema mŧrapewawa. Rŧ togawa rŧ Griégugŧgawa rŧ Dumacŧãxgŧgawa naxŧmatŧ.

21 Rŧ yemacèx ga yema Yudŧgŧarŧ paigŧarŧ ãēxgacŧgŧ rŧ Piratuxŧ ñanagŧrŧgŧ: —Toma rŧ tama tanaxwèxe i cunaxŧmatŧ i “Yudŧgŧarŧ ãēxgacŧ”, ñaxŧ. Rŧ narŧmemaē nixŧ i cunaxŧmatŧ rŧ ñacurŧgŧ:

“Nŧgŧ ixucŧ na Yudŧgŧarŧ ãēxgacŧ yŧxŧ”, ñacurŧgŧ.

22 Natŧrŧ Piratu nanangãxŧ rŧ ñanagŧrŧ: — Ngēma chaxŧmatŧxŧ rŧ marŧ ngēxma naxŧmatŧ — ñanagŧrŧ.

23 Rŧ curuchawa marŧ Ngechuchuxŧ yapotagŧguwena ga churaragŧ, rŧ nanade ga Ngechuchuchiru. Rŧ yema ãgŧmŧcŧ ga

churaragü rü nügümaã nayatoye ga naxchiru. Rü nanayauxgü ta ga norü gáuxŭchiru ga máxŭ. Natürü taxuwama narüngèixte, yerü woetama yemaãcü naxü.

<sup>24</sup> Rü yemacèx ga yema churaragü rü nügümaã ñanagürügü: –¡Tãütáma nagu tagaugü! Rü narümemaẽ nixĩ i naxcèx tá naxĩnücèxwèxegü rü ngĩxŭ tañanagügü i wüxi i dñeru na ngẽmawa nüxŭ icuèxgüxŭcèx na texéarü tá na yĩxŭ –ñanagürügü. Rü yemaãcü ningu ga Tupanaãrü ore ga ümatüxŭ ga ñaxŭ:

“Nügümaã nayatoye i chauxchiru, rü naxcèx ngĩxŭ tanañanagügü i wüxi i dñeru”, ñaxŭ. Rü aixcüma yemaãcü nixĩ ga naxügüãxŭ ga churaragü.

<sup>25</sup> Rü Ngechucharü curuchapünewa iyexma ga naẽ ga María, rü ngĩyèx, rü María ga Creopá naxmèx, rü María ga Magadácŭãx.

<sup>26</sup> Rü yexguma Ngechuchu naẽxŭ dèuxgu ga yexma chauxŭtagu na nachixŭ, rü ñanagürü ngĩxŭ: –Pa Mamax, yima nixĩ ya cune, –ñanagürü.

<sup>27</sup> Rü yemawena, rü ñanagürü choxŭ: –Ngẽma iyixĩ i cue –ñanagürü. Rü yexgumamama rü chopatawa ngĩxŭ chayaxu. Rü chauxŭtawa iyexmaẽcha.

### *Nayu ga Ngechuchu*

<sup>28</sup> Rü Ngechuchu nüxŭ nacuèx ga marü na yanguxŭ ga guxŭma ga norü puracü ga ñoma ga naãnewa. Rü yema Tupanaãrü ore ga ümatüxŭ na yanguxẽxŭcèx, rü ñanagürü: –Chitawa –ñanagürü.

29 Rŭ yéma iyexma ga wŭxi ga tŭxŭxăcŭ ga binu ga marŭ ŭxchiŭcŭmaăăăăcuxcŭ. Rŭ wŭxi ga tŭèxmŭ guma binumaăă niwaixèègŭ, rŭ wŭxi ga dexnemenèxăwa nayanèix. Rŭ yemamaăă naăxgu nanawèxgŭ.

30 Rŭ Ngechuchu nayaxaxŭ ga guma binu ga ŭxchiŭcŭ rŭ ñanagŭrŭ: —Marŭ ningu i guxŭma i chorŭ puracŭ —ñanagŭrŭ. Rŭ ñŭxŭchi inayarŭmaxăchieru, rŭ nayu.

*Wŭxi ga churara rŭ wocaxemaăă Ngechuchuxŭ nacanapacŭtŭxŭ*

31 Natŭrŭ ga yema Yudŭgŭarŭăăăxgacŭgŭ rŭ tama nanaxwèxegŭ ga curuchagŭwa na nayexmagŭxŭ ga yema naxŭnegŭ. Yerŭ moxŭăcŭ rŭ ngŭxchigaarŭ ngunexŭ nixŭ. Rŭ yema Yudŭgŭcèx rŭ yema nixŭ ga guxŭ ga ngŭxchigaarŭ ngunexŭărŭ yexera ga ŭŭnexŭ, yerŭ norŭ peta ga Ŭpetŭchigaarŭ ŭgŭ nixŭ. Rŭ yemacèx Piratuna naxcèx nacagŭ na churaragŭ yéma namugŭxŭcèx na yapoyeparagŭăăxŭcèx na paxa nayuexŭcèx ga yema curuchawa ipotagŭxŭ, rŭ paxa na nadeăxŭcèx ga curuchawa naxŭpa ga ngŭxchigaarŭ ngunexŭ.

32 Rŭ yéma naxŭ ga churaragŭ rŭ inanapoeparagŭ ga yema taxre ga yatŭgŭ ga Ngechuchumaăă yéma curuchawa ipotagŭxŭ.

33 Rŭ Ngechuchucèx naxŭ ga churaragŭ, natŭrŭ nŭxŭ nadaugŭ ga marŭ na nayuxŭ. Rŭ yemacèx tama nayapoyeparagŭ.

34 Natŭrŭ wŭxi ga churara rŭ Ngechuchuxŭ nacanapacŭtŭxŭ. Rŭ yexgumatama ínayèxŭchi ga nagŭ rŭ dexă.



35 Rŭ choma i Cuáŭ rŭ nüxŭ chadau i guxŭma ga ñaã pemaã nüxŭ chixuxŭ. Rŭ aixcŭma nixĩ i ñaã chorŭ ore. Rŭ chomatama nüxŭ chacuèx i aixcŭma na yixŭ, rŭ pemaã nüxŭ chixu na pema rŭ ta peyaxŭgŭxŭcèx.

36 Rŭ yema nangupetŭ na yanguxŭcèx i Tupanaãrŭ ore i ũmatŭxŭ i ñaxŭ:

“Rŭ taxúnetáma ya naxchinèxã nipoyegŭ”,  
ñaxŭ.

37 Rŭ toxnamana i Tupanaãrŭ ore i ũmatŭxŭwa rŭ ñanagŭrŭ:

“Tá nüxŭ narŭdaunŭ ya yima nacana-  
pacŭtŭxŭgŭãcŭ”,  
ñanagŭrŭ.

*Ngechuchuxŭ inatèxgŭ*

(Mt 27.57-61; Mr 15.42-47; Lc 23.50-56)

38 Rŭ nayexma ga wŭxi ga yatŭ ga Arimatéacŭãx ga Yúchegu ãegacŭ. Rŭ nŭma rŭ ta Ngechuchuaxŭ nayaxŭ, natŭrŭ cúãcŭ nayaxŭ yerŭ natanŭxŭ ga Yudíugŭarŭ ãëxgacŭgŭxŭ namuŭ. Rŭ guma nixĩ ga Piratuna yaçacŭ na nayauxãxŭcèx ga Ngechuchuxŭne. Rŭ Piratu rŭ: –Ngŭ, –ñanagŭrŭ. Rŭ yexguma ga Yúche rŭ yéma naxŭ ga curuchawa íyapotaxŭwa, rŭ curuchawa nayayaxu ga naxŭne ga Ngechuchu.

39 Rŭ yéma nangu ga Nicodému ga ũpaacŭ chŭtacŭ Ngechuchuxŭtagu naxŭãnecŭ. Rŭ yéma nanange ga 30 kilo naguxŭ ga pumara ga yixichixŭ na Ngechuchuxŭ namaã nachaxŭnegŭxŭcèx.

40 Rŭ yemaãcŭ ga Yúche rŭ Nicodému rŭ curuchawa nanayauxgŭ ga naxŭne ga Ngechuchu. Rŭ naxchiru ga marŭ

pumaracharaxũmaã nayanáixpũxũgũ. Yerũ yema nixĩ ga tocũma ga toma ga Yudĩgũ ga yexguma wũxi ga yueta tũxũ itatèxgũgu.

<sup>41</sup> Rũ yema nachica ga Ngechuchu curuchawa ípotaxũwa nayexma ga wũxi ga nanetũnecũ. Rũ yema nanetũnecũwa nayexma ga wũxi ga naxmaxũ ga yexwacaxũxũ ga taguma texéxũ nagu natèxgũxũ.

<sup>42</sup> Rũ yema naxmaxũgu nayaxũcuchigũ ga Ngechuchuxũne yerũ nangaicama, rũ paxa tá ningune ga ngũxchigaarũ ngunexũcèx.

## 20

### *Ínarũda ga Ngechuchu*

*(Mt 28.1-10; Mr 16.1-8; Lc 24.1-12)*

<sup>1</sup> Rũ yũxũarũ pèxmamaxũchi ga tauta meã yangóonegu, rũ María ga Magadácũãx rũ Ngechuchuxũ íyaxũcuchigũxũwa ixũ. Rũ nũxũ idau ga guma nuta ga Ngechuchumaxũ namaã rũngũxtaũcũ, rũ marũ na ínaxũgachixũ.

<sup>2</sup> Rũ yexgumatama iiñaãchi, rũ yema choma rũ Chimáũ ga Pedrumaã ítayexmagũxũwa iña. Rũ ngĩgũrũgũ toxũ: –Rũ marũ nanayauxgũ ya Cori ya Ngechuchu i naxmaxũwa. Rũ tama nũxũ tacuèx na ngexta na naxũgũãxũ –ngĩgũrũgũ.

<sup>3</sup> Rũ yexguma ga choma rũ Pedru rũ Ngechuchuxũ íyaxũcuchigũxũwa taxĩ.

<sup>4</sup> Rũ wũxigu itaxũãchi ga tomox, natũrũ ga choma rũ poraãcũ Pedruarũ yexera ichañaãchi. Rũ chaxira Ngechuchuxũ íyaxũcuchixũwa changu.

<sup>5</sup> Rũ ichayarũmaxãchi na nagu chidau-cuchixũcèx. Rũ nũxũ chadau ga naxchiru ga

namaã yanáixpüxügüãxŧ ga yexma na naxüxŧ. Natürü tama aixepegu chaxücu.

<sup>6</sup> Rŧ choweama ínangu ga Chimáũ ga Pedru. Rŧ nüma rŧ yema naxmaxŧgu naxücu. Rŧ nüma rŧ ta nüxŧ nadau ga yema naxchiru ga namaã yanáixpüxŧchiréxŧ.

<sup>7</sup> Rŧ nüxŧ nadau ta ga naxchiru ga namaã yanèixêrugüãxŧ ga meãma dixcumüxŧ ga nüxrüguma üxŧ. Rŧ tama wüxigu namaã nanu ga yema naxchiru ga namaã yanáixpüxügüãxŧ.

<sup>8</sup> Rŧ yexguma ga choma ga chaxiraxüchi yéma na changuxŧ, rŧ choma rŧ ta chixücu. Rŧ nüxŧ chadau ga guxŧma, rŧ chayaxŧ ga Ngechuchu rŧ marü wena na namaxŧxŧ.

<sup>9</sup> Yerü noxri rŧ tama nüxŧ tacuèxgüéga ga yema Tupanaärü ore ga ümatüxŧ ga ñaxŧ:  
“Cristu rŧ tá wena namaxŧ”,  
ñaxŧ.

<sup>10</sup> Rŧ yexguma ga toma rŧ tochiüçèx tawoegu.

*Ngechuchu rŧ ngïxcèx nangox ga María ga Mag-  
adácüãx*

*(Mt 16.9-11)*

<sup>11</sup> Natürü ga María rŧ yexma irüxãũx naxŧtagu ga Ngechuchumaxŧ. Rŧ yéma ixaxu. Rŧ nax-  
auxâcüma iyarümaxãchi, rŧ nagu iyadaucuchi ga  
naxmaxŧ.

<sup>12</sup> Rŧ nüxŧ idau ga taxre ga daxüçüãx ga  
Tupanaärü orearü ngeruŧgü ga icómüchiruxŧ.  
Rŧ Ngechuchuxŧne ixüchiréxŧwa narütogü, rŧ  
wüxi ga Ngechuchueru ixüxŧwaama rŧ to ga  
nacütawaama.

<sup>13</sup> Rŧ yema daxüçüãx ga duüxŧgü rŧ ngïxna  
nacagüe, rŧ ñanagürŧgü: —Pa Ngeçx, çtacüçèx

cuxaxu? –ñanagürügü. RŦ ngĩma rŦ inangãxŦ, rŦ ngĩgürügü: –Chaxaxu erŦ nayangegŦ i naxŦne ya chorŦ Cori, rŦ tama nŦxŦ chacuèx na ngexta naxŦgŦãxŦ –ngĩgürügü.

<sup>14</sup> RŦ yexgumatama yema ngĩxgu, rŦ ngĩgŦweama idau. RŦ nŦxŦ idau ga Ngechuchu ga ngĩxŦtawa na nayexmaxŦ. NatŦrŦ tama nŦxŦ icuèx ga Ngechuchu na yĩxŦ ga guma.

<sup>15</sup> RŦ yexguma ga Ngechuchu rŦ ngĩxna naca, rŦ ñanagŦrŦ: –Pa NgecŦx, ¿tacŦcèx cuyaxu? ¿RŦ texécèx nixĩ i cudauxŦ? –ñanagŦrŦ. RŦ ngĩma nŦxŦ nacuèxgu rŦ yema nixĩ ga yema nanetŦnecŦarŦ dauruŦ. RŦ yemacèx ngĩgŦrŦgŦ nŦxŦ: –Pa Corix, ega cuma cuyangexgu i naxŦne ya Ngechuchu, rŦ ;chomaã nŦxŦ ixu na ngexta na cunaxŦxŦ na choma chayayaxuxŦcèx! –ngĩgŦrŦgŦ.

<sup>16</sup> RŦ yexguma ga Ngechuchu rŦ ñanagŦrŦ ngĩxŦ: –Pa Marĩax –ñanagŦrŦ. RŦ ngĩma rŦ naxcèx idaueguãchi, rŦ togawa ngĩgŦrŦgŦ nŦxŦ: –Pa Rabunix –ngĩgŦrŦgŦ. RŦ ngẽma rŦ “Pa NgŦxẽẽruŦx”, ñaxŦchiga nixĩ.

<sup>17</sup> RŦ Ngechuchu rŦ ñanagŦrŦ ngĩxŦ: –;TãxŦ i choxŦ quingögŦxŦ, erŦ tauta ChaunatŦxŦtawa chaxŦ! ;NatŦrŦ ngẽma chaueneẽgŦtanŦwa naxŦ rŦ namaã nŦxŦ yarŦxu na choma rŦ tá ChaunatŦ ya chorŦ Tupana ya PenatŦ ya perŦ TupanaxŦtawa chaxŦxŦ! –ñanagŦrŦ.

<sup>18</sup> RŦ yexguma ga Marĩa ga MagadácŦãx rŦ tomaã nŦxŦ iyarŦxu ga marŦ nŦxŦ na nadauxŦ ga Cori ga Ngechu-chu. RŦ ñuxŦchi tomaã nŦxŦ iyaxu ga yema ore ga Ngechuchu ngĩmaã nŦxŦ ixuxŦ.

*Norü ngúexügücèx nangox ga Ngechuchu  
(Mt 28.16-20; Mr 16.14-18; Lc 24.36-49)*

19 Rù yema yùxüarü ngunexüärü chütacü, rù tangutaquëxegü ga toma ga Ngechuchuarü ngúexügü. Rù togü tarüwãtaügü, yerü yema Yudíugüarü ãëxgacügüxü tamuüë. Rù Ngechuchu rù ngürüãchi yéma nangox, rù torü ngãxütanügu nachi. Rù toxü narümoxë, rù ñanagürü: — ¡Petaãëgü! —ñanagürü.

20 Rù yema ñaxguwena rù toxü nügü nawémëx, rù nügü inawëpacütüxü. Rù tomagü ga norü ngúexügü rù tataãëgü, yerü nüxü tadaugü ga guma torü Cori.

21 Rù yexguma rù wenaxãrü ñanagürü toxü: — ¡Petaãëgü! Rù yema Chaunatü núma choxü na muxürüü tátama nixi i pexü chamuxü i chomax — ñanagürü.

22 Rù yexguma rù toëtü “cue” ñanagürü ga Ngechuchu. Rù ñuxüchi ñanagürü toxü: — ¡Penayauxgü i Tupanaãë i Üünexü!

23 Rù ngëxguma duüxügü nüxü rüxoegu i norü pepadugü, rù pema rù pexü nangëxma i pora na namaã nüxü pixuxü na Tupana marü nüxü nüxü rüngümaxü i norü pepadugü. Natürü ngëxguma duüxügü tama nüxü rüxoegu i norü pepadugü, rù pema rù pexü nangëxma i pora na namaã nüxü pixuxü na marü ngëma norü pepadugüwatama nangëxmagüxü —ñanagürü ga Ngechuchu.

*Tumachi nüxü nadau ga Cori ga wena maxücü*

24 Natürü totanüxü ga Tumachi ga Wüxigu Buexümaã taxugüxü, rù tama totanüwa nayexma ga yexguma Ngechuchu toxcèx ngoxgu.

25 Rũ yixcama ga toma rũ Tumachimaã nüxũ tixugũe, rũ ñatarũgũgũ: —Marũ nüxũ tadau ya tórũ Cori ya Ngechuchu —ñatarũgũgũ. Natürũ ga Tumachi rũ toxũ nangãxũ rũ ñanagürũ: —Ngẽxguma tama nüxũ chadèuxgu i norũ itapua-maxũ i naxmẽxwa rũ tama nüxũ chingõgũgu i ngẽma itapuamaxũ rũ ngẽma norũ cana-pacütũxũ, rũ tãütãma chayaxõ i ngẽma ore i chomaã nüxũ pixuxũ —ñanagürũ.

26 Rũ 8 ga ngunexũguwena rũ wenaxãrũ tangutaquẽxegũ ga toma ga wũxi ga ñpatawa. Rũ totanũwa nayexma ga Tumachi ga yexguma. Rũ woo ga na nawãntaxũ ga ñãx, rũ ngürũãchi yẽma nangox ga Ngechuchu, rũ torũ ngãxũtanũgu nachi. Rũ toxũ narũmoxẽ, rũ ñanagürũ: — ¡Petaãẽgũ! —ñanagürũ.

27 Rũ yexguma Tumachixũ ñanagürũ ga Ngechuchu: —¡Nüxũ ingõgũ i ñaã chorũ itapuamaxũ i choxmẽxwa ngẽxmaxũ, rũ nüxũ nadau ya daa choxmẽx! ¡Rũ nuxa chorũ canapacütũxũgu ingõgũ! ¡Rũ nüxũ rüxo na tama cuyaxõxũ! ¡Rũ meãma yaxõ i ñuxmax! —ñanagürũ.

28 Rũ yexguma ga Tumachi rũ Ngechuchuxũ nangãxũ, rũ ñanagürũ: —Pa Chorũ Corix, cuma nixĩ i chorũ Tupana quiĩxũ —ñanagürũ.

29 Rũ Ngechuchu rũ ñanagürũ nüxũ: —Pa Tumachix, cuma cuyaxõ i ñuxma erũ choxũ cudau. Natürũ tataãẽgũ ya yixema tama choxũ daugũãcũma yaxõgũxe —ñanagürũ.

### *Tacücèx naxümatü i ñaã popera*

30 Rũ Ngechuchu rũ topẽxewa nanaxũ ga muxũma ga to ga mexũgũ ga cuèxruũgũ i tama

ñaã poperagu ümatüxŭ.

<sup>31</sup> Natürü guxŭma i ñaã poperagu ümatüxŭ, rü naxümatü na peyaxõgüxŭcèx na Ngechuchu rü Cristu ya Tupana Nane na yĩxŭ. Rü ngèxguma nüxŭ peyaxõgügu rü tá pexŭ nangèxma i maxŭ i taguma gúxŭ.

## 21

### *Ngechuchu rü 7 ga norü ngúexŭgücèx nangox*

<sup>1</sup> Rü yemawena ga Ngechuchu rü wenaxärü toxcèx nangox naxtaxa ga Gariréaanacüwa. Rü Tibéria nixĩ ga to ga naega. Rü ñaãcü nixĩ ga toxcèx nangóxŭ.

<sup>2</sup> Rü wüxiwa tayexmagü ga choma rü Chaŭtiágu ga Zebedeu nanegü rü Chimáũ ga Pedru, rü Tumachi ga Wüxigu Buexŭmaã taxugüxŭ, rü Natanae ga Gariréaanegune ga Iãne ga Canácũãx, rü to ga taxre ga tomücügü ga Ngechuchuarü ngúexŭgü.

<sup>3</sup> Rü Chimáũ ga Pedru rü ñanagürü toxŭ: –Tá chayapüchae –ñanagürü. Rü yexguma ga toma rü tanangãxŭgü, rü ñatarügügü nüxŭ: –Toma rü tá ta cuwe tarüxĩ –ñatarügügü. Rü yéma taxĩ, rü wüxi ga nguegu tichoŭ. Natürü yema chütaxŭgu rü taxuŭma ga choxni tiyauxgü.

<sup>4</sup> Rü yexguma noxri yangóonegu rü Ngechuchu toxcèx nangox ga naxtaxaanacüwa. Natürü ga toma rü tama nüxŭ tacuèxgü ga Ngechuchu na yĩxŭ.

<sup>5</sup> Rü yexguma ga Ngechuchu rü toxna naca, rü ñanagürü toxŭ: –Pa Ngextüxücügüx, ¿éxna taxuŭma i choxni piyauxgü? –ñanagürü. Rü

toma rü tanangãxügü rü ñatarügügü: –Taxuŭma –ñatarügügü.

<sup>6</sup> Rŭ yexguma ga Ngechuchu rü ñanagürü toxŭ: –¡Peweŭärü tŭgŭnecŭwawaama penatáe i perü pŭcha! rü tá ípenayauxŭ i choxni –ñanagürü. Rŭ yémaãma tanatáegŭ ga torü pŭcha, rü taxucürüwa ítanatúãchigŭ, yerü muxŭchixŭ ga choxni tiyauxgŭ.

<sup>7</sup> Rŭ yexguma ga choma rü Pedruxŭ ñacharügü: –Yima nixŭ ya Cori ya Ngechuchu –ñacharügü. Rŭ yexguma yemaxŭ naxŭnŭgu ga Pedru ga guma na yŭxŭ ga Cori, rü nicuxcuchi ga naxchiru yerü noxri rü ínacuxuchichirëx. Rŭ natŭchiüwa nayuxu, rü naxãnacüwa naxcèx nawëxë.

<sup>8</sup> Rŭ toma ga natanŭxŭ rü nguemaãtama naxãnacüwa taxãgŭ. Rŭ yéma tanatúgŭ ga yema pŭcha ga choxnimaã ããcuxŭ yerü 100 metruxicatama nataxu ga na naxãnacüwa na tangügŭ.

<sup>9</sup> Rŭ yexguma nguewa ítachoŭgu rü yéma nüxŭ tadau ga wŭxi ga ŭxü, rü naxëtügu naxü ga wŭxi ga choxni. Rŭ yéma nayexma ta ga wŭxi ga pãŭ.

<sup>10</sup> Rŭ Ngechuchu rü ñanagürü toxŭ: –¡Nuãta penge i ñuxre i ngëma choxni i ípeyauxŭxŭ! –ñanagürü.

<sup>11</sup> Rŭ Chimãŭ ga Pedru rü nguegu nixŭe. Rŭ yema pŭchamaã naxnücŭgu ínanatúãchiwetaŭ ga choxni ga ínayauxŭxŭ. Rŭ 153 ga choxni ga itaxŭ nayexma nawa ga yema pŭcha. Rŭ woo ga na namuxŭchixŭ, rü tama narügáu ga pŭcha.

<sup>12</sup> Rŭ yexguma ga Ngechuchu rü ñanagürü toxŭ: –¡Nuã pexŭ rü peyachibüe! –ñanagürü. Rŭ taxúema ga toma rü nüxna tacaxchaŭ na texé yŭxŭ ga nümax, yerü marü nüxŭ tacuèxgŭ ga guma na



yĩxũ ga Cori ga Ngechuchu.

<sup>13</sup> Rũ yexguma ga Ngechuchu rũ yéma toxũtawa naxũ. Rũ nanayaxu ga pãũ rũ wũxichigũ toxna nanaxã. Rũ yexgumarũũ ta ga choxni rũ toxna nanaxã.

<sup>14</sup> Rũ yema nixĩ ga norũ tomaẽxpũxcũna ga toxcèx na nangóxũ ga Ngechuchu ga yuwa ínadxuwena.

### *Ngechuchu rũ Pedrumã nidexa*

<sup>15</sup> Rũ yexguma chibüewa tingugũguwena rũ Ngechuchu rũ Chimáũ ga Pedruna naca, rũ ñanagürü: —Pa Chimáũ Pa Cuáũ Nanex, ¿aixcũma choxũ cungechaũxũ i ñãã cumücügũxũ na cungechaũxũãrũ yexera? —ñanagürü. Rũ Pedru nanangãxũ, rũ ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rũ Ngechuchu rũ ñanagürü nüxũ: —¡Nachibüexẽẽ i chorũ duũxũgũ! —ñanagürü.

<sup>16</sup> Rũ wenaxãrũ Pedruna naca, rũ ñanagürü: —Pa Chimáũ Pa Yoná Nanex, ¿aixcũma i choxũ cungechaũxũ? —ñanagürü. Rũ Pedru nanangãxũ, rũ ñanagürü: —Ngũ, Pa Corix, cuma nüxũ cucuèx na cuxũ changechaũxũ —ñanagürü. Rũ Ngechuchu rũ ñanagürü nüxũ: —Ëcü, ¡nũxna nadau i chorũ duũxũgũ! —ñanagürü.

<sup>17</sup> Rũ norũ tomaẽxpũxcũna wenama Pedruna naca, rũ ñanagürü: —Pa Chimáũ Pa Yoná Nanex, ¿aixcũmaxũchi yĩxũ i choxũ cungechaũxũ? —ñanagürü. Rũ yexguma ga Pedru rũ dũxwa nangechaũ, yerũ norũ tomaẽxpũxcũna Ngechuchu nüxna naca ngoxi aixcũma nüxũ nangechaũ. Rũ ñanagürü ga Pedru: —Pa Corix,

cuma nüxŭ cucuèx i guxŭma. Rŭ cuma nüxŭ cucuèx na aixcŭmaxŭchi cuxŭ changechaŭxŭ — ñanagŭrŭ. Rŭ Ngechuchu ñanagŭrŭ nüxŭ: —Ëcŭ jnachibŭexêê i chorŭ duŭxŭgŭ!

<sup>18</sup> —Rŭ aixcŭma cumaã nüxŭ chixu rŭ yexguma cungextŭxŭgu rŭ cugŭ quicuxcuchi ga na ngextá cuma ícunaxwèxexŭwa cuxŭxŭcèx. Natŭrŭ ngêxguma yaguãx quixígu rŭ tá quixuuchiacŭŭ na togue cuxŭ icuxcuchixŭcèx. Rŭ ngêma tama cuma ícunaxwèxexŭwa tá cuxŭ nagagŭ —ñanagŭrŭ.

<sup>19</sup> Rŭ Ngechuchu rŭ yema ñanagŭrŭ na nüxŭ nüxŭ nacuèxêêxŭcèx ga ñuxãcŭ tá na nayuxŭ ga Pedru na yemaãcŭ Tupanaxŭ nataxêêxŭcèx. Rŭ yemawena ga Ngechuchu rŭ ñanagŭrŭ nüxŭ: — ¡Chowe rŭxŭ! —ñanagŭrŭ.

*Yema ngúexŭ ga Ngechuchu poraãcŭ nüxŭ ngechaŭxŭchiga*

<sup>20</sup> Rŭ yexguma nügŭweama nadèuxgu ga Pedru rŭ choxŭ nadau ga naweama na ne chaxŭxŭ. Rŭ chomachirêx nixí ga chibŭwa Ngechuchucŭwawa charŭtoxŭ rŭ nüxna chaçaxŭ rŭ ñachaxŭ:

“Pa Corix, ¿texé tá tixí ya yíxema bexma cuechita cuxŭ íxuaxŭxê?” ñachaxŭ.

<sup>21</sup> Rŭ yexguma Pedru choxŭ dèuxgu rŭ Ngechuchuna naca, rŭ ñanagŭrŭ: —Pa Corix, ¿ñaã Cuáŭ rŭ tacŭ tá nüxŭ ũpetŭxŭ? —ñanagŭrŭ.

<sup>22</sup> Rŭ Ngechuchu nanangãxŭ, rŭ ñanagŭrŭ nüxŭ: —Ngêxguma choma chanaxwèxegu rŭ chanamaxêê ñŭxmatáta wena núma chaxŭ. ¿Rŭ tŭxcŭxŭ i nagu curŭxñnüxŭ i ngema? Rŭ cuma ¡rŭ chowe rŭxŭ! — ñanagŭrŭ.

<sup>23</sup> Rŭ yexguma yema chomŭcŭgŭ nŭxŭ ĩnŭĕgu ga yema chauchiga, rŭ nagu narŭxĭnŭe na taxŭtáma chayuxŭ. Natŭrŭ Ngechuchu rŭ tama nŭxŭ nixu ga tãxŭtáma na chayuxŭ. Natŭrŭ ñanagŭrŭmare:

“Ngĕxguma choma chanaxwĕxegu rŭ chanamaxĕĕ ñŭxmatáta wena núma chaxŭ. ¿Rŭ tŭxcŭxŭ i nagu curŭxĭnŭxŭ i ngĕma?”, ñanagŭrŭmare.

<sup>24</sup> Rŭ chomatama nixĭ ga nŭxŭ chadauxŭ i guxŭma i ñaã pemaã nŭxŭ chixuxŭ, rŭ chomatama nixĭ i pexcĕx chanaxŭmatŭxŭ i ñaã ore. Rŭ guxãma i toma rŭ nŭxŭ tacuĕx na aixcŭma na yĭxŭ i ñaã pemaã nŭxŭ chixuxŭ.

<sup>25</sup> Rŭ nayexma ga to ga muxŭchixŭma ga tacŭ ga Ngechuchu ŭxŭ. Rŭ ngĕxguma chi naxŭmatŭgu i guxŭma ga yema naxŭxŭchiga, rŭ nagu charŭxĭnŭgu rŭ tãŭ chima ñoma i naãnegu name i ngĕma poperagŭ i nachiga ŭmatŭxŭ.

**Tupanaarü Ore i Tóru Cori ya Ngechuchu ya  
Cristuchiga  
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6